

San Juan

Cohamacu ya duserore yahuriro masunota ji ducaha

1 ¹ Dóiputa ahri yahpa to jihto panoputa Cohamacu ya duserore yahuriro Cristo masare yuhdũchũ yoahtiro dóihta ji tuhsua tiha. Tiro Cohamacu mehne jiha. ã yoa tirota Cohamacuta jinocahno niha. ² Dóiputa wahmanoputa Cristo Cohamacu mehne jiha. ³ ã yoa wahmanopure ne mariahri cjrيره bajuamehneha. Ahri yahpare, mũanore, jipihtiare, jipihtina cũhũre bajuamehne dutiha Cohamacu tirore. ã jiro ahrire bajuamehne pahũoha tiro. Ahrire mipũre mari ñũare, mari ñũera cũhũre to bajuamehnerachũ ne mariaboa. ⁴ Cristo catiare wariro jiro nina. Buhriaro marine to noano ñũ masichũ yoaro seheta tiro to Pũcũro mũano macarirore noano masichũ yoara. ã yoaro to Pũcũro mũano macarirore masichũ yoara masare. ⁵ Ahri yahpa macaina ñaare ti wacũ ti goa pjaa nahitiano yoaro sehe jia nina. Cohamacu ya duserore yahuriro buhriaro noano marine to ñũ masichũ yoaro seheta masare masichũ yoara. ã yoa nahitiano buhriarore to yuhdũrũcaeraro seheta Cristore ñaa ne yuhdũrũcaerara.

⁶⁻⁷ Cohamacu João wama tirose sehere warocaha, Cristore buhriaro yoaro sehe jirirore masare yahu mũhta dutiro. To ã warocachũ João sehe masare yahuro tare to yahurirore Cristore jipihtina ti wacũ tuahti cjihtire. ⁸ João sehe Cristo jierare. ã jieraro tiro Cristo sehere masare yahu mũhtano tare. ⁹ Cristo buhriaro yoaro sehe jiriro jipihtina masare Cohamacure masichũ yoahtiro sehe ahri yahpapũ tari jire. Potocã tjira ahri. Tiro buhriaro yoaro sehe jiriro waro tjira.

¹⁰ Cristo ahri yahpai jia timare. Ahri yahpare bajuamehneriro jiri jimare. To ã jipachũta ahri yahpa macaina sehe tirore ne masierare. ¹¹ To ya yahpai tiro masa bajuari jimare. To ya yahpai masa bajuariro to jipachũta to ya yahpa macaina sehe ne tirore cahmaerare. ¹² Ti ã cahmaerapachũta, tirore cahmaina sehere, tirore wacũ tuaina sehere Cohamacu to pohna jichũ yoari jire. ¹³ Tina Cohamacu pohmata jia nina. ã jia masa ti masa bajuariro seheta jierara, Cohamacu pohna ti wahachũ.

Tuhsu, masa ti cahmariro seheta jierara, Cohamacu pohna ti wahachu.

14 Ñ jiro Cristo masuno to ji ducari baharo mari mehneta jire tiro. To ñ jichu ñuna masare cahiro, potocã jiare yahuriro to jichu sã masii. Tiro dihta Cohamacu macuno jiro tuariro noariro jire. To ñ jiriro jichu sã masii. 15 João Cristore yahu muhtano õ sehe ni sañurucure masare yahuro:

—Siro tara yu õ sehe ni yahuriro: “Tiro yu baharo tariro jira. Ñ jiparota tiro yu yuhdoro tuariro jira. Tiro yu masa bajahto panoputa ji tuhsuha. Ñ jiro tiro yu yuhdoro tuariro jira”, masare yu ni yahuriro ahriro tjira —nire João Cristore masare yahuro.

16 Tiro Cristo sehe noariro tuaro masare cahiro jiro marine jiphtinare noano yoarucure. 17 Cohamacu dutiare Moise cjiro sehe cūbasa muhtaa tiha marine. Jesucristo sehe Cohamacu masare to cahiare buhero tare. Cohamacu to potocã durucua cūhure buhero tare tiro. 18 Masa ne Cohamacure ñnerara. Tirore mari ñnerapachuta to macuno to tuaro cahiro cūirota jiriro sehe to Pucurore marine masichu yoare.

Paina João masare bautisarirore sinituha

(Mt 3.11-12; Mr 1.7-8; Lc 3.15-17)

19 Sã coyea judio masa puhto Jerusalēi jinare sacerdotear, Cohamacu wuhui dahraina cūhure João caharu warocari jire. “¿Diro baro jijari muhu?” ni sinitu dutia warocari jire tinare. Ti ñ ni sinituchu õ sehe ni yahure João sehe. 20 Ne yaro marieno yahure. Potota yahure:

—Yuhu Cristo Cohamacu masare yuhduchu yoa dutiro to warocariro jieraja —nire tiro.

21 To ñ nichu tina sehe tirore pari turi siniture tjao:

—¿Muhu Cristo jieracu, Elia sehe jijari muhu? —nire tina.

—Jieraja yuhu —nire tiro.

—¿Sã cohtariro Cohamacu yare yahu muhtariro sehe jijari muhu? —nire tina.

—Tiro jieraja yuhu —nire João sehe.

22 To ñ nichu tina tirore pari turi õ sehe ni siniture tjao:

—Sãre sinitu dutiare sã noano yahuhto sehe poto sãre yahu bahrañoga. ¿Diro baro sehe jijari muhu? ¿Mu basi muhu sehe dohse jiriro baro “Jija yuhu”, nijari muhu? —nire tina João.

23 Ti ã nichu õ sehe ni yũhtire tiro:

—Masa marienopu õ sehe ni sañurucuriro jija yũhu Cohamacu yare yahu mũhtariro Isaia cjiro to ni yahuriro seheta: “Mari pũhtoro to tahto pano masa ñaa tũhotuare cohtota, cahno mũhtaga masa”, ni masare yahu sañurucuriro jija yũhu —nire João tinare.

24 Joãore sinituina fariseo curua macaina ti warocarina jire. 25 ã jia tina Joãore õ sehe ni siniture tjoa:

—¿Mũhu Cristo, Elia, Cohamacu yare yahu mũhtariro sã cohtariro jierapacũta dohseacu masare bautisajari mũhu? —nire tina.

26 Ti ã nichu tũhoro õ sehe ni yũhtire tiro:

—Yũhu co mehne masare bautisaja. Pairo sehe masa masierariro masa watoi ji tuhsũra. 27 Tiro sehe yũ baharo tariro yũ yũhgoro tuariro jira. Noa yũhduariro jira. Tiro yoaro sehe jieraja yũhu sehe. ã jicu tirore tũhotucu, “Wiho jiriro jija yũhu”, ni tũhotuja yũhu —nire João tinare.

28 ã ni durucure tina, Betaniapu Jordão wama tiri ma pa bũhũsehe coapu, João masare to bautisariopu.

Jesu Cohamacu to warocariro to oveja yoaro sehe jiriro jira

29 Pa dachoi Jesu João cahai cahacã curero to tachũ João tirore ñũno õ sehe nire:

—Ñũga. Ahriro Cohamacu to warocariro to oveja yoaro sehe jiriro jira. Ovejare mari wajãriro seheta masa ahriro cũhũre wajãahca. ã yariaro ahri yahpa macainare ti buhiri tiare cohãnohca tiro. 30 Ahrirota jira yũ õ sehe niriro: “Yũ baharo tariro yũ yũhgoro tuariro jira. Yũ masa bajahto pano tiro ji tuhsũha. ã jiro tiro yũ yũhgoro tuara”, yũ niriro ahrirota jira. 31 Yũhu sehe ahrirore noano waro masiera tih. ã masierapaihta co mehne bautisai tai nii yũ coyea Israe masa ahrirore ti masihtõ sehe —nire João.

32 ã ni tuhsũ João to ñũri cjirire õ sehe ni yahu namore tjoa:

—Espĩritu Santo mũanopu buja yoaro sehe duji ta, Cristo mehne to tjuachu ñũhi. 33 Cohamacu yũhũre to yahuerachu tirore ne masieraboa yũhu. Wiho mejeta tiro yũhũre masare co mehne diapũ bautisa duti warocariro Cohamacu sehe õ sehe ni yahu mũhta tuhsũre yũhũre: “Espĩritu Santo duji ta to bui to tjuaracu sũriro tirota jirohca. Tiro sehe Espĩritu Santore to

yaina mehne ã jirucuchũ yoarohca”, nire Cohamacũ yũhũre.
 34 Mipũ pinihtare to ã ni yahurirore ñũ tuhsũhi yũhũ. Æ ñũcũ
 “Ahriro potocãta Cohamacũ macũno jira”, ni yahuja yũhũ
 musare —ni yahure João sãre.

Jesu buheina to pji mũhtaina jira

35-36 Pa dachoi João mehne sã pũaro to buheina sã
 ducuchũ, Jesu sã cahai yũhdũ wahcãno nire. To ã yũhdũ
 wahcãchũ João tirore ñũno, pari turi õ sehe nire sãre:

—Ñũga. Ahriro Cohamacũ to oveja yoaro sehe jirore jira
 —nire João.

37 To ã nichũ sã pũaro to buheina sehe tíre tũhona Jesu
 baharo wahahi. 38 Sã ã wahachũ ñũno Jesu sãre majare ñũ,
 õsehe ni siniture:

—¿Nohopũ wahajari mũsa? —nire tiro.

To ã nichũ sã cũhũ õ sehe ni sinitu ñũni tirore:

—Rabi, ¿nohopũ jijari mũhũ? —nihi sã tirore. (Rabi sã ya
 mehne nina “buheriro”, nina nija.)

39 —Yũhũ mehne tatjiãhna ñũna taga —nire Jesu sãre.

To ã nichũ sã sehe to jirore ñũna wahai. Tí pjare
 ñamichahapũ cuatro hora jire. Æ jina tí dachore tiro mehne
 tjuai sã.

40 Sã pũaro Joãore tũhoina, Jesure nũnũ ti wahcãina yũ
 piti Andre mehne jii. Andre sehe Simo bahũro jire. 41 Æ jiro
 tiro dõihita to wahminore Simore maca, boca, tirore õ sehe ni
 yahuha:

—Mesiare Cohamacũ marine yũhdũchũ yoa dutiro to
 warocarirore sã bocahi —niha Andre Simore. (Mesia sã ya
 mehne nina “Cristo”, nina nija.)

42 Æ ni tuhsũ tiro Simore Jesu cahai naahre. To cahai ti
 sũchũ ñũno Jesu sehe Simore õ sehe nire:

—Mũhũ Simo wama tirore, Jona macũno jira. Mipũre
 mũhũre Cefa ni wama pisuihtja —nire Jesu Simore. (Cefa sã
 judio masa ya mehne nina “Pedro”, nina nija.)

Felipere, Natanae cũhũre pjiha Jesu

43 Pa dachoi Jesu Galilea yahpapũ waha duare. Æ jiro to
 wahahto pano tiro Felipere piti boca, õ sehe nire:

—Yũhũ mehne macariro cjihto taga —nire Jesu.

44 Felipe sehe Betsaida macariro jire. Tiro, Andre, Pedro mehne cū maca macaina jire tina. 45 Æ yoa Felipe Natanaene maca, tirore bocaro ò sehe ni yahure:

—Cohamacu dutiare Moise cjiro to joari pūpū to yahurirore paina Cohamacu yare yahu mūhtaina cjiri cūhū ti yahurirore sã bocahi. Jesu Nazare macariro, José macuno tjira —nire tiro Natanaene.

46 —Nazarepūre ne cūiro noariro mariahna —nire Natanae.
—Ñui taga mūhū —nire Felipe.

47 Æ yoa Jesu cahai to sūchū ñūno Jesu sehe ò sehe nire Natanaene:

—Ahriri mipū tariro potocāta noariro judio masūno waro jira. Tirore mahñoa ne mariahna —nire Jesu Natanae sehere.

48 To ã nichū tūhoro Natanae sehe tirore ò sehe ni siniture:
—¿Dohseacu yūhūre noano masijari mūhū? —nire.

—Felipe mūhūre to pjihto pano, higeracu docai mū jichū ñūhi yūhū mūhūre —nire Jesu.

49 To ã nichū Natanae sehe tirore ò sehe nire tjoa:

—Buheriro, potocāta mūhū Cohamacu macūno jira. Mūhū Israe masa sã Pūhtoro cjihto jira —nire Natanae.

50 To ã nichū tūhoro ò sehe ni yūhtire Jesu:

—Higeracu docai mūhūre yū ñūrire masicū yūhūre “Cohamacu macūno jira”, ni wacū tuara mūhū. ¿Títa mūhūre ã masichū yojari? Ahri mūhūre yū ñūri yūhdoro Cohamacu tuaa mehne yoa ñoihca yūhū. Yū ã yoa ñochū ñūihca mūhū —nire Jesu Natanaene.

51 Æ ninota ò sehe ni yahu namore:

—Potocāta mūhūre niita nija. Yūhū masūno Cohamacu warocariro tjija. Mūanopū parī mūachū Cohamacu to yaina anjoa yū bui ti duji tachū, ti mūjachū cūhūre ñūihca mūhū —nire Jesu tirore.

Caná wama tiri macapū ti wamomaca dūhteropū Jesu wahaha

2 ¹ Tia dacho baharo Canái Galilea yahpai jiri macai wamomaca dūhteri bose nūmū jire. Æ jiro Jesu pocoro tí wūhūpū jire. ² Jesu mehne sãre to buheina cūhūre wamomaca dūhteropū pjirocare tina. ³ Ti bose nūmū macaa vino pihtichū Jesu pocoro tirore ò sehe ni yahure:

—Mipūre vino pihtia wahare —nire ticoro Jesure.

4 To ã nichū tūhoro Jesu ò sehe nire:



—Inõ, ¿dohseaco taco tíre yũhũre yahujari mũhũ? Masa yũhũre ti masihto dũhsasinina mini —nire Jesu to pocorore.

⁵ To ã niri baharo to pocoro sehe ti cahamacare õ sehe ni dutire:

—Yũ macũ to dutiriro seheta yoaga —nire ticoro.

⁶ Tí pjarũre sã coyea judio masa Cohamacũ yare yoaa taa masare ti pjacũrire ã cosarucunoca dutia tire. Æ yoa tí wũhũ seis situ pari tãa mehne ti yoaa situ pari co posa tia situ pari jire. Tí situ pari Cohamacũ yare yoaa taa ti cosaa co posa tia pari cjiri jire. Tí situ parire cincuenta a setenta litro posa mũ sũre. ⁷ Tói ti jichũ ñũno tí wũhũ macaina cahamacare õ sehe ni dutire Jesu:

—Ahri situ parire co mehne pio sãa namoga wahpaa pari ti wahahto sehe —nire Jesu.

To ã nichũ tina sehe noano wahpo dapo pahñonocare ti parire.

⁸ Ti ã yoari baharo Jesu tinare õ sehe ni dutire tjoa:

—Mipure tí core wa na, wuhũ macarirore waga —nire.

To ã nichũ tuhoa tí core wa na, wuhũ macarirore ware.

9 Ti ã wachũ tiro sehe tí core vino to wahachũ yoaa core sihni ñure. Tí core nohoi to tarirore masierare tiro. To ã masierapachũta to cahamaca tí core waina sehe masire. Wuhũ macariro ã masieraro wamomaca dũhterirore pjiroca, 10 ò sehe ni yahure:

—Paina masa noaa core vinore wa muhtana. Masa ti noano sihñiri baharo ña curea core wara tina. Mũhũ sehe noaa core wihbo, baharo curero tí core ware sãre —nire wuhũ macariro wamomaca dũhterirore.

11 Canái Galileai jiri macai Jesu core vino to wahachũ yoari cjiri coã to bajuamehne dũcari jire. Æ yoaro painare to tuaare ñore Jesu. To ã ñori baharo sã to buheina tirore wacũ tuai.

12 Baharo Jesu to pocore, to bahanare, sãre to buheina cũhũre Capernaupũ suho sure. Tópũ suna, mahaa dachoricã tjuasinii sã.

Jesu Cohamacũ wuhũpũre suha

(Mt 21.12-13; Mr 11.15-18; Lc 19.45-46)

13 Pascua jichũ judio masa sã bose nũmũri cjihti mahanocã dũhsatjiãhre. Æ jiro Jesu Jerusalẽpũ sure. 14 Tópũ sũro tiro Cohamacũ wuhũpũ sãa sũro, wachũare, ovejare, bujaare duainare boca sure. Tuhsũ, niñerure cohtotaina ti mesaripũ ti dujichũ tina cũhũre boca sure. 15 Æ boca sũro yuta dari mehne tjanari da yoa, tinare jipihtinare sopacarpũ tjana nũnũ wionocare. Oveja, wachũa cũhũre tjana nũnũ wionocare tiro. Æ yoa niñeru cohtotaina ti mesarire na majareroca doca cũnocare. Ti niñeru tũri cũhũre doca sitenocare. 16 Æ yoa tuhsũ bujaare duainare ò sehe nire:

—Musa bujaare na wijaahga. Yũ Pũcũ ya wuhũre pache duari wuhũ yoarena tjiga —nire Jesu tinare.

17 To ã yoachũ ñũna sã to buheina sehe Cohamacũ yare ti joari pũi to niri cjirire wacũi: “ ‘Cohamacũ, mũ wuhũre tuaro cahĩja. Æ cahĩcũ mũ wuhũre ñano ti yoachũ ñũcũ tuaro cahyaja yũhũ’, ni joaa tiha Cohamacũ yare ti joari pũi”, ni wacũi sã Jesu buheina.

18 Jesu to ã yoari baharo sã coyera judio masa pũhũa tirore ò sehe ni siniture:

—¿Dohseacu m̄h̄u ahrinare Cohamacu w̄h̄ur̄e jinare cohã wiori? Cohamacu m̄h̄ure tíre yoa dutiuro to jichu Cohamacu tuaa mehne yoa ñoga m̄h̄u sã ñ̄hti cjihtire —nire tina Jesure.

19 Tí ã nichu Jesu õ sehe ni yãhtire:

—Ahri w̄h̄ure masa cohãchu tia dacho wahaboroi tuhsũhtja ȳh̄u —nire Jesu tinare.

20 —Tia dacho mehne ahri w̄h̄ure tuhsusi m̄h̄u. Cuarenta y seis c̄hm̄ari waro ti yoari w̄h̄u jira ahri w̄h̄u —nire tina Jesure.

21 To ã nichu tina tirore noano t̄hoerare. Jesu “Ahri w̄h̄ure” nino, to pjac̄ure nino niri jimare.

22 Æ yoa to yariari baharo, to masa wijaari baharo sã to buheina sehe to niri c̄jirire wac̄una, Cohamacu yare ti joari p̄ire Jesu to yahuri c̄h̄ure “Tí potocã tjira”, ni wac̄u sã.

Jipihtina ti wac̄ure Jesu masina

23 Pascua bose n̄m̄uri jichu Jesu Jerusal̄ep̄u jire. Tóti to jichu masa payu Cohamacu tuaa mehne to yoa ñochu ñ̄u tirore wac̄u tuare. 24 Tí ã wac̄u tuapach̄ta Jesu masa ti wac̄ure noano masino, “Ȳh̄ure ã wac̄u tuarucuahca”, ni t̄hotueraha. 25 Tiro masa ti t̄hotuare noano masire. Æ masino masa ti t̄hotuare painare ne sinitu ñ̄erare.

Jesu Nicodemore yahuha

3 1 Tí macai Nicodemo wama tiro, judio masa p̄h̄toa mehne macariro jire. Tiro fariseo curua macariro jire.


2 Cũ ñami tiro Jesu cahai ta, tiro mehne õ sehe ni s̄h̄uduri jire:

—Buheriro, m̄h̄u Cohamacu to buhe dutiro to warocariro m̄u jichu sã masija. M̄h̄u payu tahari Cohamacu tuaa mehne yoa ñona. Cohamacu m̄h̄ure to yoadoherach̄u, m̄h̄u sehe to tuaa mehne ne ã yoa ñoeraboa —niri jire Nicodemo Jesure.

3 To ã nichu t̄horo Jesu sehe õ sehe ni yahuri jire:

—Potocã m̄h̄ure niita nija. Pari turi masa bajaruro yoaro sehe waharuro dihta mari p̄htoro Cohamacu mehne ji masina —niha Jesu.

4 —Cuenah. ¿Buc̄uro sehe dohse yoa pari turi masa bajarobocari tiro? To pocoro niji suhtirop̄u majare sã, pari turi baja masieraboca tiro —niri jire Nicodemo.



To ã nichu tũhoro Jesu õ sehe ni yũhtiri jire tjoa:

5 —Potocã niita nija mũhũre. Co mehne, Espĩritu Santo to tuaa mehne pari turi masa bajuariro dihta mari pũhtoro Cohamacũ mehne ji masina. 6 Numia nijipocosanumia jia, macanacãre masa bajuachu yoara. Espĩritu Santo sehe masare Cohamacũ pohna jichũ yoara. 7 “Pari turi masa bajuariro yoaro sehe wahariro dihta mari pũhtoro Cohamacũ mehne ji masina”, yũ nichũ, tũho wisiecu tjiga. 8 Espĩritu Santo masare Cohamacũ pohna to yoachu wihnono yoaro sehe jira. Wihnono to tariropũ tara. To taro coa tachũ mari tũhoja. ã tũhopenahta to tarirore, to waharirore ne masieraja. Tó seheta yoara Espĩritu Santo masare Cohamacũ pohna jichũ yoaro —niri jire Jesu Nicodemore.

9 —Mũ niare noano masieraja —niri jire Nicodemo.

10 To ã nichu tuhoro õ sehe niri jire Jesu:

—Muhu judio masare buheriro jipaihta, ¿dohseacu yu niare tuhoerajari? 11 Potocã mûhure niita nija. Sã masirire, sã ñûrîre sã yahuja. Sã ã yahupachuta ne mûsa sã coyeya judio masa ne tuho duaerare. 12 Ahri yahpa macaa mehne masa ti masa bajuari mehne mûhure piti dahre yu buhe mûhtarire “Potocã tjira”, nierara mûsa. ã nierana piti dahre buhero marieno Cohamacu yare yu yahuchu cûhure “Potocã tjira”, nisi mûsa.

13 'Ne cûiro mûanorû Cohamacu caharû wahariro ne pari turi tjua tasi. Yuhu masûno Cohamacu warocariro yuhu dihta mûanorû jiriro ahri yahparû tahi. (ã jicu yuhu dihta Cohamacu yare mûsare yahu masija.) 14 Panorûre masa marienorû Moise cjiro bronca wama tiri comaa mehne ti yoarîrore agãre yucûcu ti dapodû sohtoapû duhu õ dapoha. Yuhu cûhure masûno Cohamacu warocarîrore tiro agãre to duhu õ daporîro seheta yuhu cûhure duhu õ dapoahca. 15 Yuhure ti ã yoari baharo jipihtina yuhure wacû tuaina jipihtia dachoripe Cohamacu mehne ã jirucuahca —niri jire Jesu.

Cohamacu jipihtinare cahîna

16 ã ni tuhsu õ sehe ni namori jire Jesu:

—Cohamacu jipihtina ahri yahpa macainare tuaro cahîna. ã jiro yuhure to macûnore cûirota jirîrore Cohamacu warocare jipihtina yuhure wacû tuaina pichacapû ti wahaerahto cjihtore. ã jia Cohamacu ya catia mehne ã catirucuahca tina.

17 Cohamacu yuhure to macûnore masare buhiri dahre dutiro warocaerare ahri yahparûre. Masare pichacapû wahaborinare yuhûchû yoahîro cjihto sehene yuhure warocare.

18 'Yuhure Cohamacu macûnore wacû tuainare ne buhiri dahresi Cohamacu. Yuhure wacû tuaeraina pinihtare Cohamacu buhiri dahre duti tuhsure. Masa yuhure Cohamacu macûnore cûirota jirîrore ti wacû tuaerari buhiri buhiri dahrerohca tinare.

19 Yuhu Cohamacu macûno ahri yahparû tacû buhriaro to noano marine to ñû masichû yoaro seheta Cohamacu yare noano masichû yoaja. Yu ã masichû yoapachuta, yuhure wacû tuaeraina sehe yuhure cahmaerara. Ti ñaa yoaa sehene noano cahmana. Ti ã cahmari buhiri tinare buhiri dahre duti tuhsure. 20 Jipihtina ñaare ã yoarucuina baro ti ñaa yoaa duhu duaerara. ã jia buhriaro to bajuro dahrero seheta ti ñaa yoarîre

“Bajuro dahreri” nia, yũhũre cahmaerara tina. **21** Quihõno yoaina sehe yũhũre, yũ buhea cũhũre cahmana. Cohamacũ yoadohoro mehne to yare ti yoaaare yũ noano bajuro dahrechũ bũo tierara tina. ã jia yũhũre buhriaro yoaro sehe jirirore cahmana —ni yahuri jire Jesu.

Pari turi João masare bautisariro Jesure yahuha

22 Baharo Jesu sãre to buheinare Judea yahpapũ sũho wahare. Tópũ sũro tó macaina mehne mahaa dachoricã tjua, tinare bautisare. **23** João cũhũ masare bautisaro niha Enón wama tiri macai. Enón Salim wama tiri maca cahai jire. Tói dia jire. Tói dia jichũ João bautisaro niha masare. **24** Tirore ti peresu yoahito pano Enóni masare bautisaro niha João.

25 Tí pjare João buheina mehne macaina mahainacã judio masũno mehne bautisaa macaare durucua niha. **26** ã jia tina João cahapũ sũa, tirore õ sehe ni yahuha:

—Buheriro, Jordão sie coapũ mũhũ mehne jiriro “Tiro tjica”, mũ niriro sehe mipũre masare bautisaro nina. To ã yoachũ jipihtina tiro cahapũ dihta wahara —niha tina Joõore.

27 Ti ã nichũ tũhoro João õ sehe ni yũhtiha:

—Tiro tuariro to jichũ Cohamacũ sehe tirore ã jichũ yoariro jira. **28** “Cristo jieraja”, yũ nichũ tũhore mũsa. ã jierapaihta to pano to waroca mũhtariro jija yũhũ. **29** Cristo mehne masa ti wahachũ ñũcũ tuaro wahcheja. Õ sehe jira tí: Wamomaca dũhtericoro to manũno mehne jiro wahara. Wamomaca dũhtehtirore cohtariro sehe dũhtehtiro to namo tichũ ñũno to durucuchũ tũhoro tuaro wahchera. ã jicũ yũhũ wamomaca dũhtehtirore cohtariro to wahcheriro seheta Cristo mehne masa ti wahachũ ñũcũ tuaro wahcheja. **30** Cristo sehere wacũ tuaro cahmana masare. Yũhũ sehere wacũ tuaeraro cahmana masare —ni yũhtiha João.

Cohamacũ macũno mũanopũ tariro jira

31 ã ni tuhsũro õ sehe ni namoha João:

—Mũanopũ tariro jipihtina yũhoro tuariro jira. Ahri yahpapũ jiina jina ahri yahpa macaina jija mari. ã jina ahri yahpa macaare durucuja mari. Mũanopũ tariro sehe jipihtina yũhoro tuariro jira. **32** To ñũri cjirire, to tũhori cjirire tiro yahura. To ã yahupachũta to yahuare masa sehe ne tũho duaerara. **33** Mũanopũ tariro to yahuare masa tũhoa, tíre

cahmaa, “Cohamacu potocã niriro jira”, nia nina tina. ³⁴ Ahriro Cristore Cohamacu warocaritore Espíritu Santo ya tuaare cū pahñona Cohamacu. ã jiro tiro Cohamacu ya durucuare yahura. ³⁵ Cohamacu to macunore tuaro cahina. ã jiro jipihtina bui ti pũhtoro ji dutire to macunore. Jipihtia pũro ji dutire tirore. ³⁶ Cohamacu macunore wacũ tuaina sehe Cohamacu catia mehne ã catirucuahca. To macunore cahmaeraina sehe Cohamacu catia mehne jisi. ã jiro Cohamacu tinare tuaro buhiri dahrerohca —niha João.

Jesu Samaria macaricoro mehne durucuha

4 ¹ Jesu João yũdoro payu buheinare to cjuachũ João yũdoro masare to bautisachũ fariseo curua macaina tũhorocaha. ² Ti ã tũhorocapachũta Jesu sehe to basi masare bautisaerare. Sã to buheina sehe masare bautisahi. ³ Fariseo curua macaina ti ã masichũ tũhoro Jesu sehe Judea yahpai jiro Galilea yahparũ sãre sũho tjuua wahare.

⁴ Tópũ wahana Samaria yahpare sũ yũhdũ wahcãna tana nihi sã. ⁵ ã yũhdũ wahcãna Samaria yahpai jiri macapũ Sica wama tiri macapũ sũhi. Tí maca cahai panopũ macariro Jacobo cjiro to macũno José cjirore to wari yahpa jire. ⁶ Tói Jacobo cjiro co to naari copa jire. ã yoa Jesu sehe yoaropũ tariro cjiro jiro, tiro wahya yũhdũaro tí copa dũhtũ cahai nuju sũre. Tí pja tói to so nuju sũri pja cohari pja waro jire. ⁷⁻⁸ Sã to buheina sehe macapũ chũare sã nuchũna wahari baharo cãirota tiro tói tjuua nuju sũre. ã so nuju sũro Samaria macaricoro tí copapũ co waro to wihichũ Jesu ticorore core sinia:

—Core waga yũhũre —niha.

⁹ —Mũhũ judio masũno jira. Yũhũ sehe Samaria macaricoro jija. ¿Dohseacu yũhũre core sinijari mũhũ? —niha ticoro Jesure. Judio masa Samaria macainare ñũ tuhtiina jira. ã jiro ticoro ã niha.

¹⁰ To ã niri baharo Jesu ticorore õ sehe ni yahuha:

—Mũhũre Cohamacu to yoadoho duarire masico, mũhũre core sinirirore masico, mũhũ yũhũ sehẽre siniboa. Mũ ã sinichũ paye co sehẽre waboa yũhũ. Tí co sehe catichũ yoara —niha Jesu ticorore.

¹¹ To ã nichũ tũhoro ticoro õ sehe ni yũhtiha tirore:

—Ne mũhũre situ mariahna. Wiho mejeta ahri copa cũãri copa jira. ¿Ã jicũ ahri catichũ yoaa core nohorũ wabocari mũhũ? **12** Mari ñũchũ cjiro Jacobo panorũ macariro ahri copare marine cũa tiha. Tiro, to pohna, to nuina cũhũ ahri core sihnia tiha. “Paye core waboa yũhũ” nicũ, ¿Jacobó yũhdoro masiro jijari mũhũ, ã ni tũhotucũ? —niha ticoro.

13 To ã nichũ Jesu õ sehe ni yũhtiha:

—Jipihtina ahri core sihniina, pari turi ñahma yapioahca. **14** Ya co sehere sihniina ne pari turi ñahma yapiosi. ã jia ya core sihniina Cohamacũ mehne ã jirucuahca. Ma pohtarũ co to ã wijaarucuro sehetã ya co ne pihtisi —niha Jesu.

15 To ã nichũ tũhoro numino sehe õ sehe niha:

—Ne pari turi yũ ñahma yapioerahto sehe tí core waga yũhũre. ã jico pari turi ne õpũre co wasi —niha ticoro.

16 To ã nichũ Jesu ticorore õ sehe ni yahuha:

—Tí pja pinihta mũ manũre pjico wahaga. Pji tuhsũ õpũ taga tiro mehne —niha Jesu ticorore.

17-18 —Manũ marienicoro jija yũhũ —niha ticoro.

—Potocãta nimana mũhũ. Mũhũ cinco tahari manũ ti tuhsũmare. Tuhsũ, mipũre mũhũ mehne jiro mũ manũ jierara. ã yoã “Manũ marienicoro jija” nico, potocãta nimana mũhũ —niha Jesu ticorore.

19 To ã nichũ tũhoro õ sehe niha ticoro:

—Ne, Cohamacũ yare yahu mũhtariro jira mũhũ, yũ tũhotuchũ. **20** Sã ñũchũsuma cjiri ahdu tũcũpũ Cohamacũre ño payoa tiha. ã jina mũsa sehe judio masa “Jerusalẽi Cohamacũre ño payoro cahmana masare”, nia tire mũsa judio masa —niha ticoro.

To ã nichũ Jesu õ sehe ni yũhtiha:

21 —Numino yũhũre tũhosiniga. Baharorũ ahdu tũcũi, Jerusalẽpũ cũhũre mari Pũcũre ño payosi mũsa. **22** Mũsa sehe mũsa ño payorirore masierara. Masare yũhdũchũ yoah tiro judio masũnota jira. ã jina sã judio masa sehe sã ño payorirore masija. **23** Mipũre baharorũ cũhũre Cohamacũre potocã ño payoia ti noano tũhotua mehne tirore ño payoahca. Tó sehe mari ño payochũ cahmana Cohamacũ. **24** Cohamacũ pjacũ marieriro to jichũ masa tirore ñũerara. ã jia tirore ño payoa, ti noano tũhotua mehne tirore noano potocã ño payoro cahmana masare —niha Jesu.

25 To ã nichũta ticoro õ sehe ni yũhtiha:

—Mesia, “Cristo” ti niriro sehe masare yuhdũchũ yoah tiro, to tahti cjihtire masija yũhũ. Tiro taro, marine jipihtiare buhe pahñonohca —niha ticoro.

26 —Yũhũta jija Cristo —niha Jesu ticorore.

27 To ã ni yahuchũ waro wihina sã to buheina sehe Jesu numino mehne to durucuchũ ñña, cña wahai. Ñ cñapanahita “¿Dohse cahmajari mũhũ? ¿Dohse nii nijari mũhũ ticorore?” ni sinitu ññerahi. 28 Ñ jiro numino to siture tói duhu daponoca, macarũ waha, masare yahuro, õ sehe niha:

29 —Yũ yoari cjihtire yahu pahñorirore ñña taga mũsa. Tiro potocãta Cristo jiboca pa tehe nino —niha ticoro.

30 To ã nichũ tũhoa tí maca macaina sehe Jesure ñña taa nire. 31 Tí pjare sã Jesu buheina sehe tirore tuaro chũ dutimai:

—Buheriro, chũga —nimai sã.

32 —Soro jia chũare cjuaja yũhũ. Tíre mũsa masierara —nire tiro.

33 To ã nichũ tũhona sã basi õ sehe ni durucui:

—¿Paina tirore chũare wa tuhsũari? —nii sã basi.

Sã ã nichũ Jesu õ sehe ni yahure:

34 —Masa sehe chũ ji coara. Yũhũre warocariro to cahmaare yoacũ ji coaja yũhũ sehe to yoa dutiriro seheta yoa pahñocũ tacũ. 35 “Cuatro sũri dũhsara dicha naahito”, wese pũro to niriro seheta mũsa sehe ni tũhotuena tjiga. “Cohamacũ yare sã yahuhto dũhsasinina”, ni tũhotuena tjiga. Potocã niita nija mũsare. Mipũ pinihtare masare ñũga. Dicha tichũ mũsa naari pja to jiriro seheta, mipũ pinihta masa yũ buheare ti tũhohti pja jiro nina. 36 Toaa dichare naainare ti wapariro seheta yũ yaina cjihti naainare yũ yare buheinare ti ã yoari wapa tinare noano yoaihtja yũhũ. Ti ã buhechũ tũhoa yũ buheare tũhoina yũ yaina sehe Cohamacũ mehne jipihtia dachoripe jirucuahca. Ñ jia tinare buhe mũhtaina, baharo yũ yaina jichũ yoaina cũhũ cãno potori wahcherucuahca. 37 “Cũiro toa mũhtariro jira. Pairo sehe toaa dichare nariro jira”, nia tiha panopũ. Tí potocã tjira. Ti ã niriro seheta cãina yũ yare yahu mũhtaina jira. Paina sehe yũ yare buhea yũ yaina jichũ yoaina jira. 38 Wese pũro to yaina dahraina toaeraina ti jipachũta to toaa dichare tinare naa dutiro warocara. Tó seheta masare buhe mũhtaeraina mũsa jipachũta yũ yaina cjihti yoa duticũ warocaja mũsare. Paina sehe tinare buhe mũhta tuhsũre. Ti buherinapũre pari turi buhe namona, yũ yaina jichũ yoanahca

musa sehe. Ñ jina buhe muhtaina sehe ti yoadohoro mehne painare yu yaina jichu yoanahca musa —nire Jesu.

39 Tí pjare Samaria macaricoro “Yu yoari cjirire tiro yahu pahñore”, to ñ nichu tũhoa Samaria macaina payu Jesure wacũ tua, tirore cahmaha. 40 Ñ jia Samaria macaina Jesu cahai sua, “Sã mehne tjuasiniga”, nire tirore. Ti ñ nichu sã cũhu tiro mehne pua dacho tói tjuasinii. 41 Paina cũhu payu Jesure tũhoa cahmare tirore. 42 Õ sehe nire masa numinore:

—Wahmanopure mu yahurire tũhona, Jesure cahmahi. Mipru pinihtare Jesu to durucuare tũhona tirore wacũ tuana, tirore cahmaja. Ñ jina tiro sehere tũhona ahri yahpa macainare pichacaru wahaborinare yũdũchu yoariro potocã to jichu mipru sã masija —nire masa Samaria macaricore.

Pũhtoro macunore dohatirirore noariro wahachu yoaha Jesu

43 Pua dacho baharo Jesu sare Galilea yahparu sũho wahare. 44 Wahmanopure õ sehe nia tire tiro: “Cohamacu yare yahu muhtarirore to ya yahpa macaina tirore ño payoerara. Ñ jia yũhure ño payoerara õ macaina õi yu bucũariro jichu”, nia tire Jesu. 45 Ñ jia Galilearu to sũchu tó macaina tirore noano piti bocare. Tó pano Jerusalẽi bose numui Jesu Cohamacu tuaa mehne to yoachũ ñurina jire tina.

46 Ñ yoa Canaru Galileai jiri macaru core vino to wahachu yoari macaru wahaah wahi sã tiro mehne. Cana cahai jiri macai Capernau wama tiri macai jipihtina bui pũhtoro docai jiriro pũhtoro macuno dohatiro niha. 47 Tuhsu, Jesu Judearu jiriro Galilearu to sũchu pũhtoro tũhoha. Tíre tũhoro Jesu caharu wihire:

—Yu macu yariaro nihre. Ñ yoa tirore noariro wahachu yoai taga —ni tuaro mehne pjire tirore.

48 To ñ nichu tũhoro Jesu õ sehe ni yũhtire:

—Cohamacu tuaa mehne yu yoachũ ñuerana, ne yũhure wacũ tuaerara musa —nire Jesu tirore.

49 To ñ nichu pũhtoro sehe õ sehe nire:

—Pũhtoro, yu macu to yariahto pano taga —nire tiro Jesure.

50 —Tjuaaahga. Mu macu catica —nire Jesu.

To ñ nichu tũhoro, “To niriro seheta catirohca yu macu” nino, pũhtoro tjuaa wahare. 51 Ñ tjuaarucirirore to cahamaca tirore piti boca, õ sehe ni yahuha:

—Mu macu catihre —ni yahuha tina tirore.

52 —¿Noho waroi sã jichũ noariro wahari tiro? —ni sinituha tiro to cahamacare.

—Canũre cohari pja baharocã juaro suruhre tirore —niha tina.

53 Tĩ ã nichũ tũhoro õ sehe ni tũhotuha tiro: “Jesu yũhũre to ã ni yahuri pjaihta juaro surua wahari jire”, ni tũhotuha pũhoro sehe. “Potocãta nino niri jira yũhũre” nino, tiro jipihtina to coyea mehne Jesure wacũ tuaha.

54 Jesu Judea yahpapũ jiriro Galilea yahpapũ to sũri baharo pũhoro macũnore noariro to waharire mari quihõchũ pũa taha Cohamacũ to tuaa mehne yoa ño tuhsũre Jesu.

Tini masierarirore noariro wahachũ yoaha Jesu

5 1 Baharo judio masa Cohamacũre sã ño payori bose nũmũri jichũ Jesu Jerusalẽpũ sũre tjoa. 2 Tõi oveja wama tiri sopaca cahai cuhsũri copa jihre. Sã judio masa ya mehne nia Betesda wama tiri copa jihre. Tĩ copa cahai cinco tihamahnoera tahti poca jihre. 3 Tĩ tahti pocaĩ payũ dohatiina coãre. Capari ñũeraina, cã bũhũsehe dahporo ñaina, pjacũ bũhaina tina tĩ copa cahai jia, [co ñuhmi mũa mũjanore cohtaa nire. 4 Tõpũ buharo tĩ copa macaa core cãa tahari ñuhmichũ yoa mũjare anjo. Tĩ copa macaa co ñuhmiri baharo ña mio mũhtariro sehe dohse jiare dohatiare cjuariro noariro wahare.] 5 Æ yoa tõi treinta y ocho cũhmari waro dohatiriro jire. 6 Tõi to coãchũ ñũno to ã yoari pja dohatiriro jichũ masire Jesu tirore. Æ masino tirore õ sehe ni siniture:

—¿Pjacũ dohatia marieriro ji duajari mũhũ? —nire Jesu.

7 To ã nichũta dohatiriro õ sehe ni yũhtire:

—Tĩ co to ñuhmichũ yũhũre co jiri copapũ naboriro mariahna. Tĩ copapũ yũ ña mio duapachũta paina sehe yũ pano ã ña mio mũhtarucura —nire tiro Jesure.

8 —Wahcãrũcaga. Mũ coãri cahsarore naa, wahaga —nire Jesu tirore.

9 To ã nichũta dohatiriro sehe to coãri cahsarore naa, ducu dũcare. Tĩ dacho Sabado judio masa sã sori nũmũ jire. 10 Tĩ dachoi Jesu to ã yoachũ ñũa judio masa sã pũhtoa sehe dohatiriro cjirore õ sehe ni yahuha:

—Michare Sabado dacho mari sori nũmũ jipachũta mũ coãri cahsarore naahna mũhũ. Æ yoacũ mari dutiare yũhdũrũcai nina mũhũ —niha tina tirore.

11 —Yũhũre yũ dohatiare cohãiro sehe õ sehe nire yũhũre: “Mũ coãri cahsarore na, wahaga”, nire tiro yũhũre —ni yũhtiha dohatiriro cjiro.

12 —¿Tĩre mũhũre ã niriro sehe diro baro jijari tiro? —ni sinituha tina.

13 Tõi masa payũ ti jichũ ñũno Jesu sehe waha tuhsũha. ã jiro dohatiriro cjiro sehe tirore noariro wahachũ yoarirore to wamare masieraha. 14 Baharo Cohamacũ wũhũi Jesu tirore piti boca, õ sehe ni yahure:

—Tũhosiniga mũhũ yũhũre. Mipũre noano pjacũ tira mũhũ. Ñaare yoa namoi tjiga. Pari turi ñaare yoa namocũ mũ dohatiriro yũhdoro wahaihca mũhũ —nire Jesu tirore.

15 To ã niri baharo dohatiriro cjiro sehe sã judio masa pũhtoa tirore sinituina cjiri cahapũ sũro, õ sehe ni yahuha tinare:

—Jesu wama tirore yũhũre noariro wahachũ yoahre —ni yahuha tiro.

16 ã yoa Sabado jichũ Jesu dohatirirore to dohatiare to cohãchũ masia judio masa sã pũhtoa sehe tirore ñũ tuhtia, yahusãa dua dũcare.

17 ã tirore ti yahusãa duachũ masino Jesu sehe õ sehe ni yahure tinare:

—Yũ Pũcũ mipũre dahrasinina. Yũhũ cũhũ dahrasinii nija —ni yahure tirore yahusãa duainare.

18 To ã nichũ judio masa sã pũhtoa sehe tiro mehne tuaro suaa, tó pano ti niriro yũhdoro tirore wajã duare. Sabado dachore sã sori nũmũre cũirore to noariro yoachũ ñũa tina suare. ã suaa tiro Cohamacũre “Yũ Pũcũ” to nichũ tũhoa, tina sehe tó pano ti niriro yũhdoro sua namoha tjoa. “ ‘Yũhũ Pũcũ’ nino, Jesu to basi ‘Cohamacũ mehne cũno potori jija’, ni wacũca tiro”, ni tũhoture judio masa sã pũhtoa.

Jesu Cohamacũ to warocariro jira

19 ã yoa Jesu tinare õ sehe ni yahure:

—Potocã mũsare niita nija. Yũhũ, Cohamacũ macũno, yũ mũ sũro yoaeraja. Yũ Pũcũ to yoarire ñũcũ, tĩre yoaja. 20 Yũ Pũcũ yũhũre, to macũnore, cahĩna. ã jiro to yoarire yũhũre ño pahũona. Ahri mipũ to tuaa mehne yũ yoari yũhdoro tiro payere yoa dutirohca yũhũre. To ã yoa dutichũ to tuaa mehne

yoa ñoihca yũhũ. Ñ jina ñũ cãanahca mũsa. 21 Yũ Pũcũ yariarinare to masoriro seheta yũhũ cũhũ yũ cahmainare masoihtja. 22-23 Ne yũ Pũcũ sehe masa ti ñaa buhirire buhiri dahreriro jierara. Yũhũ sehere tíre ti ñaa buhirire buhiri dahrehtirore cũre yũ Pũcũ. Jipihtina masa tirore ti ño payoriro seheta yũhũ cũhũre ti ño payohti cjihtire buhiri dahrehtirore cũre yũhũre. Yũhũre to macũnore ño payoerana yũ Pũcũ cũhũre ño payoerara mũsa. Tiro jira yũhũre warocariro —nire Jesu.

24 Ñ ni tuhsũ õ sehe ni yahu namore:

—Potocãta mũsare nii nija. Yũ durucuare tũhoina yũhũre warocarirore wacũ tuaina jipihtia dachoripe mũanopũ ã jirucuahca. Ñ jicũ tinare buhiri dahresi yũhũ. Ñ jia tina pichacapũ wahaborina yũhdũahca. 25 Potocã mũsare niita nija. Pichacapũ wahahtina yũhũre Cohamacũ macũnore ti tũhohti pja mirũ jira. Baharopũ cũhũre yũhũre tina tũhoahca tjoa. Ñ tũhoa tũho nũnũina sehe Cohamacũ mehne ã jirucuahca. 26 Cohamacũ yũ Pũcũ sehe ã jirucuchũ yoariro jira. Ñ jiro yũhũre to macũnore ã jirucuchũ yoah tiro ji dutire tiro yũhũre. 27 Ñ jicũ yũhũ masũno Cohamacũ to warocariro yũ jichũ tiro masare buhiri dahrehtirore cũre yũhũre. 28 Ahrire tũhona, tũho cãaena tjiga mũsa. Pa dachopũre jipihtina yariaina masa coparipũ jiina yũ durucuchũ tũhoahca. 29 Ñ tũhoa, noare yoaina cjiri jipihtia dachoripe Cohamacũ mehne jihtina cjihti masa mũjaahca. Ñaare yoaina cjiri sehe ñaare ti yoari buhiri pichacapũ wahaahca —ni yahure Jesu.

30 Ñ ni tuhsũ õ sehe ni yahu namore:

—Yũhũ yũ mũ sũro ne yoaeraja. Ne yũ basi yũ cahmano yoa duaeraja. Yũhũre warocariro to dutirore seheta yoa duaaja. Ñ jicũ to niriro seheta buhiri dahreja. Tuhsũ yũhũ masare buhiri dahrecũ quihõnota yoaja. 31 “Yũhũ tuariro jija”, yũ ni yahuchũ “Mũ yahua ne quihõno jierara”, ni masiboca mũsa. 32 Pairo jira yũhũre yahuriro. Tiro João sehe masare yahure yũhũre. Masare yũhũre to yahuri cjiri quihõno tjira. Tíre yũhũ noano masija. 33 Mũsa paina sehere Joãopũre yũhũre sinitu dutina warocare. Ñ jiro potocãta yahure tiro mũsare. 34 “Cohamacũ macũno jira ahriro”, yũhũre ni yahuhinare macaeraja. Ñ macaerapacũta João masũno to jipachũta yũhũre “Cohamacũ macũno jira”, to ni yahurire yahui nija. Mũsa

yũhũre wacũ tuahti cjihtire, mũsa pichacapũ wahaborina mũsa yũhdũhti cjihtire yũhũre João to yahurire yahui nija. 35 Sihãria mahaa dachoricã to ñũ masichũ yoaro seheta João mũsare buhe mũhtano mahanocã to catiro puro mũsare masichũ yoare. To ã buhechũ tũhona mahaa dachoricã wahchere mũsa. 36 Yũ jia tiare to ã buhepachũta Cohamacũ sehe yũ jiare noano yahura. To ã yahuchũ João yũ jiare to yahua yũhũdoro jira Cohamacũ ya yahua. ã jicũ Cohamacũ to tuaa mehne yũhũre to yoa dutiri cjihtire mipũ yoai nija. Ahrire yũ yoachũ ñũna potocãta Cohamacũ to warocariro yũ jiare masina mũsa. 37 ã yoa yũ Pũcũ yũhũre warocariro to basi “Tiro yũ warocariro jira”, ni yahura mũsare. To ã ni yahupachũta to durucuare ne tũhoerare mũsa. ã jina mũsa tirore ne masierare. 38 Yũhũre Cohamacũ warocarirore mũsa ne tũho duaerare. ã jina mũsa Cohamacũ yare ne cahmaerare. 39 Cohamacũ yare ti joari pũre mũsa buhena, “Mari ahri pũre buhena jipihtia dachoripe Cohamacũ mehne ã jirucunahca”, nina mũsa. Tí pũita yũhũre yahura. 40 Tí pũ yũhũre to yahupachũta mũsa sehe yũhũre cahmaerara. Jipihtia dachoripe Cohamacũ mehne mũsa ã jirucuhti cjihtire yũhũre sini duaerara mũsa —ni yahure Jesu.

41 ã ni tuhsũ õ sehe ni namore:

—Yũhũre mũsa ño payoerachũ ñũcũ suaeraja yũhũ sehe.

42 Mũsa sehe Cohamacũre mũsa cahĩerachũ masija yũhũ.

43 Cohamacũ yũ Pũcũ yũhũre to dutiriro seheta yũ tapachũta mũsa yũhũre cahmaerare. Pairo sehene Cohamacũ tirore

warocaerariro to jipachũta to mũ sũro to tapachũta tiro

sehene cahmanahca mũsa. 44 Paina masa mũsare ti ño

payochũ cahmana mũsa. Cohamacũ mũsa mehne to ji

coachũ cahmaerara mũsa. Tiro dihta Cohamacũ waro jira.

ã cahmaerana yũhũre tũhoerara mũsa. Yũhũre wacũ

tuaerara. 45 Mũsare yũ Pũcũpũre ne yahusãsi yũhũ. Tíre

masiga mũsa. Moise cjiro to joari pũ sehe mũsare yahusãnohca.

“Tí pũ macaa dutiare mari yoa pahũona, Cohamacũ cahai

wahanahca”, mũsa niri pũ sehe mũsare yahusãnohca. 46 Moise

cjiro to joari pũi yũhũ sehene yahua. ã jina tí pũre “Potocã

tjira” nina, yũ yahua cũhũre “Potocã tjira”, niboahca mũsa.

47 Moise cjiro to joari pũre “Potocã tjira” nierana, yũ ya

durucua cũhũre “Potocã tjira”, nisi mũsa —nire Jesu tinare.

Cinco mil bui masare chua waha Jesu

(Mt 14.13-21; Mr 6.30-44; Lc 9.10-17)

6 ¹ Ñ to buheri baharo yoa cureri pja baharo Galilea wama tiri bucupariro pa buhusehe coapu sa to buheinare Jesu suho pahaa wahare. Ti taro pjiri taro pa wama Tiberia wama tire. ² To pano Galilea yahpai Jesu Cohamacu tuua mehne yoa ño, dohatiinare ti dohatiare to cohachu masa ñua tire. Ñ jia Jesu to pahachu ñua, masa payu tirore nunu ti pahare. ³ Ñ yoa baharo ti taro duhtu cahapu Jesu sare suho pah sa, tucuru muja, tu buiru sare suho dujire. ⁴ Ti dachore Pascua wama tiri bose numu cjihto, sa judio masa ya bose numu suhti dacho cjihto mahaa dachoricã duhsare. ⁵⁻⁶ To pu dujiro, Jesu payu masa to cahapu ti tarucuchu ñure. Ñ ñuno Felipe ñ sehe ni sinitu ñure:

—¿Ahrina masa ti chuhti cjihtire nohoru nuchunahcari mari? —nire Felipe.

Jesu to basi to yoahcure masiparota Felipe ñ sinitu ñure “¿Dohse ni yuhtirohcari?” nino. ⁷ To ñ sinitu ñuchu tuhoru Felipe sehe ñ sehe ni yuhtire:

—Ocho sãri posa dahra wapataa niñeru mehne chũare mari nuchupachuta masare cãinare daacã chũare mari witipachuta ne mu susi —nire Felipe Jesure.

⁸ Ñ yoa paio, sa mehne macariro Andre, Simo Pedro bahuro sehe Jesure ñ sehe ni yahure:

⁹ —Ahriri wahma wahmu taro cinco paõ curirire, ñ jichu wahi puarocã cũhure cjuara. Wiho mejeta masa sehe payubia jira. Ñ jiro ahri mahanocã chua ne mu susi —nire Andre.

¹⁰ To ñ niri baharo:

—Masare duji dutiga musa —nire Jesu sa to buheinare.

Toi daacã tja jiro jire. Sa duji dutichu masa nuju su pihtiare tja bui. Tina mu dihtare sa quihochu cinco mil wahtaroi jire.

¹¹ Ti ñ nuju suchu ñuno Jesu sehe paõre na, Cohamacure “Noana”, nire. Ñ ni tuhsurota sare to buheinare witi dutire. To ñ dutichu sa sehe toi dujiinare witi wahcã. Tuhsu, puaro wahi cũhure witihi tinare. Jipihtinare noano ti chu duaro puro chũare tinare witihi. ¹² Baharo masa sehe yapi yuhduu wahare. Ti ñ yapi yuhduachu ñuno Jesu sare ñ sehe ni yahure:

—Ti chu duharire noano saa cahmachu pahõoga. Ñ yoana ti chu duhare ne bosi —nire.



13 To ã nichu tãhona sã sehe cinco pão curiri dũhsarire sã saa cahmachuchũ doce pũhũse waro wijare. 14 ã jia Jesu tíre to tuaa mehne to yoa ñochũ ñũa, masa sehe õ sehe nire:

—Potocãta jira. Ahriro Cohamacũ yare yahu mũhtariro ahri yahrapũ “Tarohca”, ti niriro mari cohtariro tjira —nire tina.

15 ã jia tina Jesure ti pũhtoro jĩhtiro cjĩhtore ñaha sõ duamare. Jesu ti ã ni tãhotuare masino pari turi cũirota tũcũrũ wahaa wahare.

Jesu co bui ducu wahcãha

(Mt 14.22-27; Mr 6.45-52)

16 Ñamichahapũ sã to buheina bũcũparirorpũ buhai. 17 Tõrũre buhu sũ, dohoriapũ samu, Capernau wama tiri macapũ majare pahãi. Tí pjare sã majare pahãri pjare ñamipũ jire. Jesu sehe sã cahapũ tju wihierasiniire mini. 18 Sã ã majare pahãno watoi wihnono tuaro sãre tachũ, pahcõri bũjũa pahcõri wahcãre. 19 Sã cinco kilómetro sũboro waroi sã sũchũ waro Jesu sãre mũ sũre. Co buipũ to tachũ ñũi sã. ã sã cahai to tachũ ñũna, sã sehe cũa yũhdũa wahacũrũ. 20 Sã ã cũa yũhdũachũ ñũno tiro sãre õ sehe ni yahure:

—Cuiena t̄jiga. Ȳh̄uta jija —nire Jesu.

21 To ã nichu t̄uhona sã wahchea mehne tirore piti boca samu dutihi. To samuri baharocãta wac̄uenoca sã wahari yahpar̄ure pahã s̄u tuhs̄uhi.

Masa sehe Jesure macaha

22 Æ yoa tí ñamine masa buc̄pari ro pa buhusehe coar̄u t̄juaina sehe sã yaria busoca, sã pahãntia c̄uria to jichu ñ̄ure. Tia mehne sã sahsero sã pahã wahachu c̄uh̄ure ñ̄ure tina. Tuhsu Jesu sã mehne to pahãerachu ñ̄ure tina. Æ jia pa dachoi tirore t̄oi cohtaa niri jimare tina. 23 Ti ã cohtaro watoi, paye buso, Tiberia wama tiri macar̄u taa buso Jesu Cohamac̄ure “Noana”, to niriro cahacã cureror̄u, masare to ch̄ua witiro cahacã cureror̄u wahã s̄uri jire tí buso. 24 Æ yoa sãre Jesu to s̄ho jimarirore to mariachu ñ̄ua, masa tí busor̄u samu, Capernaup̄u sãre n̄un̄u ti pahã tari jire, Jesure maca taa.

Jesu catichu yoaa ch̄ua yoaro sehe jiriro jira

25 Ti pahã wihiri baharo, Jesure boca wihi, tina masa ò sehe ni sinitu ñ̄ure tirore:

—Buheriro, ¿dohse jichu tari m̄uh̄u òr̄ure? —ni sinitu ñ̄ure tina.

26 Ti ã ni sinitu ñ̄uch̄u, Jesu tinare ò sehe ni yahure:

—Potocã niita nija musare. Ȳh̄u musare Cohamac̄u tuaa mehne ȳu yoa ñopach̄uta ȳh̄ure sehere wac̄u tuaerara musa. Ȳh̄ure wac̄u tuaerapanahta ȳh̄ure macana musa. Ȳh̄u mehne buj̄ua ch̄u, musa yapirina cjiri jina ȳh̄ure maca tari jira musa. 27 Wiho mejeta ch̄ua ne ã jirucuerara. Baharor̄u pihtia wahara. Æ jina tíre ã macarucuenta t̄jiga musa. Paye baro ch̄ua soro jia ch̄ure macaga musa. Tí soro jia ch̄ure bocana jipihtia dachoripe Cohamac̄u mehne jirucunahca. Æ jia tí ch̄ua pinihta ne pihtisi. Tí ch̄ure ȳh̄u mas̄no Cohamac̄u warocariro musare waihtja. Cohamac̄u ȳu P̄uc̄u ȳh̄ure tí baro ch̄ure wa dutiriro jira. Tirota to warocariro ȳu jiare ño tuhs̄ure musare —nire Jesu.

28 To ã nichu t̄uhua tina ò sehe ni sinitu ñ̄ure tirore:

—¿Cohamac̄u to yoa dutiare yoana tana dohse yoanahcari sã? —ni sinitu ñ̄ure tina.

Jesu sehe ti ã nichu t̄uhoro, ò sehe ni ȳhtire tinare:

—¿Ahriri Jesu José macño jierajari? To p̄ac̄ero, to pocoro cūh̄ere mari masija. Tuhsu mari yoaro sehe p̄jac̄u tiriota jira. ¿Ā jiparota dohsearo “M̄uanop̄u tahi”, nijari tiro? —ni suare tina.

43 Ti ā nichu tūhoro Jesu ō sehe ni yahure tinare:

—Musa yūh̄ere ñano ni durucuena t̄jiga. 44 Yū P̄ac̄u yūh̄ere warocariro sehe masare yūh̄u sehene cahmachu yoara. To ā yoerachū masa sehe yū yaina ji masierabo. Pihtiri dachoi yū yainare masoihca yūh̄u. 45 Cohamacu yare yahu m̄htaina cjiri sehe ō sehe ni joaa tiha: “Cohamacu tinare buherohca”, ni joaa tiha Cohamacu yare yahu m̄htaina cjirip̄. Jipihtina yū P̄ac̄u to buheare tūhoina, tireo yūhtiina yūh̄ere cahmana. Ā jia yū yaina jira.

46 'Yū P̄ac̄ere ne c̄iuro masño ñ̄erare. Yūh̄u Cohamacu warocariro dihta yū P̄ac̄ere ñ̄hi. 47 Potocā niita nija m̄sare. Yūh̄ere wacū tuariro jipihtia dachoripe yū P̄ac̄u mehne ā jirucurohca. 48 Yūh̄u catichū yoaa ch̄ua yoaro sehe jiriro jija. 49 Musa ñ̄uch̄usuma cjiri masa marienop̄u manáre ch̄ua tiha. Ā tíre ch̄upahta yariaa wahaa tiha. 50 M̄uanop̄u taa ch̄uare yū nia ch̄uare masño ch̄uro, ne p̄chacarū wahasi. 51 Yūh̄u m̄uanop̄u taa ch̄ua catichū yoaa ch̄ua yoaro sehe jiriro jija. Ahri ch̄uare ch̄uriro jipihtia dachoripe yū P̄ac̄u mehne ā jirucurohca. Ahri ch̄ua catichū yoaa ch̄ua yoaro sehe jia yū p̄jac̄uta jira. Jipihtiri yahpa macaina Cohamacu mehne ti ā jirucuhti c̄jhtire yū p̄jac̄ure waihtja. Ā wac̄u yariaihca —nire Jesu.

52 To ā nichu tūhoa s̄a coyea judio masa sehe tíre ō sehe ni durucure ti basi:

—¿Ahriri dohse yoa to p̄jac̄ure ch̄uhti c̄jhtire warohcari? —nire tina ti basi.

53 Ti ā nichu tūhoro Jesu ō sehe ni yahure:

—Potocā niita nija m̄sare. Yūh̄u masño Cohamacu warocariro jija. Yū p̄jac̄ure ch̄erariro, yū dire sihnierariro Cohamacu ya catia mehne ā jirucusi. 54 Yū p̄jac̄ure ch̄uriro, yū dire sihniriro yū ya catia mehne ā jirucurohca. Ā jic̄u pihtiri dachoi tireo masoihtja. 55 Yū p̄jac̄u potocāta ch̄ua waro yoaro sehe jira. Yū di potocāta sihnia waro yoaro sehe jira. 56 Yū p̄jac̄ure ch̄uriro yū dire sihniriro yūh̄u mehne wahchea mehne jirucura. Yūh̄u cūh̄u tiro mehne wahchea mehne jirucuja. 57 Yū P̄ac̄u yūh̄ere warocariro ā jirucura. Ā jirucuro, yūh̄u

cũhũre ã jirucuchũ yoara. Ñ jia yũhũre ã jirucurirore masa chũa, Cohamacũ mehne mũanopũ ã jirucuahca tina cũhũ. 58 Ahrita jira mũanopũ taa chũa. Mari ñũchũsuma cjiri manã wama tia ti chũri cjiri yoaro sehe jierara ahri chũa. Tina sehe tí chũare chũpahta yariaa wahaa tiha. Ahri chũa sehere chũriro mũanopũ ã jirucurohca —nire Jesu.

59 Capernaupũ judio masa sã buheri wũhũi Jesu buhero, ãta ni yahure.

Jesu buheare tũhona mũanopũ ã jirucunahca mari

60 Payũ Jesure cahmaina to ã ni buheare tũhoa, õ sehe ni durucure:

—Ahri buhea nucu mijona. Ñ jina mari tũho duaera cureja —ni durucure tina ti basi.

61 Ti ã nichũ Jesu sehe ti durucure masire. Ñ masino tiro õ sehe ni siniture tinare:

—¿Ahri buheare tũhona suajari mũsa? 62 ¿Yũhũ masũno Cohamacũ warocariro mũanopũ yũ tjuaa wahachũ ñũna dohse ni tũhotubocari mũsa? 63 Espíritu Santo masũnore catichũ yoara. Masa sehe ti basi catichũ yoaerara. Espíritu Santo masare to catichũ yoariro seheta yũ buhea sehe mũsare Cohamacũ mehne ã jirucuchũ yoara. 64 Cãina mũsa mehne macaina ne yũhũre wacũ tuaerara —nire Jesu.

Wahmanopũre Jesu tirore wacũ tuaerainare masire. Tirore ñũ tuhtiinare ñohtiro cũhũre masi tuhsũre. Ñ tirore wacũ tuaerainare masino “Cãina mũsa mehne macaina yũhũre wacũ tuaerara”, nire Jesu.

65 Ñ ni tuhsũ õ sehe ni namore:

—Õ sehe ni yahumahi mũsare: “Yũ Pũcu sehe masare yũhũ sehere cahmachũ yoara. To ã yoaerachũ masa sehe yũ yaina ji masieraboa”, mũsare nii nimahi —nire Jesu.

66 To ã ni buhechũ tũhoa payũ Jesure cahmamarina cjiri tirore cohã, tiro mehne pari turi wahaerare. 67 Ti ã yoachũ ñũno Jesu sãre doce to buheinare õ sehe ni siniture:

—¿Mũsa cũhũ yũhũre cohãnahcari? —ni siniture sãre.

68 To ã nichũ Simo Pedro õ sehe ni yũhtire tirore:

—Pũhtoro, sãre paio buheriro mariahna. Mũ ya buheare tũhona Cohamacũ mehne ã jirucunahca sã. Mũ ya buhea dihta tíre yahura sãre. 69 Ñ jina sã mũhũre wacũ tuaja. Ñ yoa mũhũ

noairi, Cohamacu macuno to warocariro mu jichu sa masija. A jina mure cohasi sa —nire Simo Pedro Jesure.

70 To a nichu thoro Jesu o sehe ni yahure sare:

—Yuhu sehe musare doce besehi. Wiho mejeta curo musa mehne macariro watino yairo cjihto jira —nire sare to buheinare.

71 A nino Judare Simo Iscariote macunore nino niri jire. Juda sehe doce buheina sa mehne macariro Jesure nu tuhtiinare nohtiro jire.

Jesu bahana tirore “Cohamacu macuno jira”, ni masieraha

7 1 Baharo Jesu Galilea yahpai tinino wahare. Judea yahpai judio masa tirore waja duare. Ti a waja duachu masino tiro ti yahpahu wahaerare. 2 Judio masa daa wuhuseca sa yohti numuri bese numuri mahanoca dhasatjiahre. 3 A jia Jesu bahana tirore o sehe ni yahure:

—Judeapu wahaga. Toi mu yainare Cohamacu tuua mehne mu nohtiro cjihto wahaga muhu. 4 Masare yoa no duacu yaeraro cahmana mure. Yoa nono cahmana. Potocata Cohamacu tuua mehne yairi jicu tere masare noga —nimare tina.

5 To bahana jipahta Jesure “Cohamacu macuno jira”, nierare. A jia, a nire tina tirore. 6 Ti a niri baharo Jesu o sehe ni yahure tinare:

—Masa yure ti noano masihti pja dhasasinina mini. Musa sehe nu duana bese numuri jichu waha masina. 7 Ahri yahpa macaina musare nu tuhtierara. Yuhu ti naa buhirire yu yahuchu tina yuhu sehere nu tuhtira. 8 Bese numu jichu wahaga musa sahsero. Yure yu wahahto dhasasinina mini. A jicu yuhu sehe bese numurine nu wahaerasinija —nire Jesu tinare.

9 A nino tiro Galileai tjuare.

Jesu daa wuhuseca ti yoari numuri bese numuri jichu wahaha

10 Bese numuripu Jesu bahana ti nu wahari baharo Jesu chu ti baharo wahare. A waharo masa ti neraro watoi wahare. 11 Bese numurihi jiina judio masa sa pautoa tirore macare:

—¿Nohopu jicari tiro? —ni sinituha tina.

12 Ñ jia masa cũhũ Jesure payũ yahuwajaha. Paina “Tiro noariro jira”, niha. Paina sehe “Tiro ñariro jira. Masare mahñoriro jira”, ni yahuwajaha tina.

13 Ñ nipahta judio masa sã pũhtoare cuia, masa ti ñũeragorũ Jesure yahuwajaha.

14 Bose nũmũri dacho macai Cohamacũ wũhũrũ Jesu sãa sũro, buhere. 15 To ã buhechũ sã coyeya judio masa tũho cũaa waha, õ sehe nire:

—¿Ahriro buherorũ buhemahnoerariro jiparota dohsearo noano masi pahñonocajari? —nire tina tireore.

16 Ti ã nichũ Jesu õ sehe ni yahure tinare:

—Yũ buheri cjiri yũ ya durucua jierara. Yũhũre warocariro ya durucua sehe jira ahri buhea. 17 Cohamacũ cahmaare yoa duaina yũ buhea sehere Cohamacũ ya durucua ti jichũ masiahca. Yũ mũ sũro yũ buherachũ cũhũre masiahca tina. 18 Cũiro to mũ sũro to masia mehne buheriro jiro “Yũhũ dihtare ño payoga”, niriro jira tiro. Wiho mejeta yũhũre warocariro sehere mũsa ño payochũ cahmaja yũhũ sehe. Yũ ã nichũ tũhona “Potocã durucuriro jira tiro. Ne mahñoerara”, ni masinahca mũsa.

19 'Cohamacũ dutiare Moise cjiro sehe cũa tiha mũsare. To ã cũpachũta mũsa jipihtina tí dutia sehere ne yũhtierare. ¿Dohseana yũhũre wajã duajari mũsa? —nire Jesu sã coyeya judio masare.

20 —Mũhũ tũho masierariro, watĩno to cohtotariro jira. Mũhũre wajã duaina mariahna —ni yũhtire tina Jesure.

Ti ã nichũ Jesu õ sehe ni yũhtire:

21 —Sori nũmũ Sabado jichũ cũ tahata Cohamacũ tuaa mehne dohatiriro to dohatiare yũ cohãchũ mũsa ñũ cũaa wahare. 22 Mari ñũchũsũma cjiri panorũ macaina sehe ti pjacũre mahanocã cahsarocãre yihsoina ti yoariro seheta Moise cjiro yihso dutiha. To ã dutichũ Sabado mari sori nũmũ jipachũta masũnore to pjacũre mahanocã cahsarocãre yihsoira mũsa. 23 Sabado jichũ masũnore to pjacũre mahanocã cahsarocãre yihsoira mũsa, Moise cjiro dutiri cjirire yoana tana. ¿Mũsa cũhũ Sabado dachoi tíre yoapanahata tí dachoi dohatirirore jipihtia to pjacũre noariro yũ yoachũ ñũna dohseana yũhũ mehne suari mũsa? 24 Yũ yoarire mũsa noano masierapanahata, yũhũre ñano tũhotuena tũjiga. Mũsa noano masiri baharo yũhũre mũsa tũhotua potocã tũjahca —nire Jesu.

Jesu wahmanopu to tarirore yahuha

25 To ã ni yahuri baharo mahainacã Jerusalẽ macaina tirore õ sehe ni yahuwajare:

—¿Ahiro judio masa puhto ti wajã duariro jierajari? 26 Ñã tirore ti wajã duapachuta jipihina panoi masare buhero nina tiro. Wiho mejeta tirore wajã duaina jipahta ã ñnocahna.

“Tiro potocãta Cristo jira”, ¿ni tãhotubocari puhto sehe?

27 Wiho mejeta ahiro Jesu to tarirore sã masija. Cristo sehe masare yũhdũchũ yoahtiro to tachũ to tariro sehere masimahnoerara. Ñã jiro masare yũhdũchũ yoahtiro Cristo waro jierara Jesu —ni yahuwajare tina Jerusalẽ macaina.

28 Ti ã niare masino, Jesu õ sehe ni tuaro sañurucu buhere Cohamacu wũhũi:

—Yũhũre õ sehe ni tãhotura mũsa: “Tirore masija. Ñã jina to tariro cũhũre masija”, ni tãhotumana mũsa. Mũsa ã ni tãhotupanahta yũhũre warocarirore ne masierara mũsa. Yũhũre warocariro potocã niriro, potocã yoariro jira. Tirore ne masierara mũsa. 29 Tirota yũhũre warocare. Ñã jicũ tiro cahapũta tahi. Ñã jicũ yũhũ sehe tirore masija —nire Jesu judio masare.

30 To ã nichũ tũhoa tirore ñaha duamare. Ti ã ñaha duapachuta Jesu to ñano yũhdũhti pja dũhsasinire. Ñã jia tina tirore ñaha masierare. 31 Paina masa sehe payũ tirore wacũ tua, õ sehe nire:

—Ahiro Jesu sehe payũ tahari Cohamacu to tuaa mehne yoa ño tuhsũre. Jipihina paina yũhũro Cohamacu tuaa mehne yoa ñohna tiro. Ñã yoarota Cristo Cohamacu to warocariro tjira ahiro Jesu —nire Jesure wahma wacũ tua dũcaina.

Fariseo curua macaina Jesure peresu yoa dutiha

32 Masa Jesure ti ã ni durucuchũ tũhoa sacerdotea puhto, fariseo curua macaina mehne Jesure ñaha dutia warocaha surarare.

33 Ñã jiro Jesu judio masare õ sehe nire:

—Mahaa dachoricã mũsa mehne jisiniihca. Ñã jicũ baharocãta yũhũre warocariro cahapũ wahaihca. 34 Yũ jihtopũ mũsa waha masierara. Ñã jina yũhũre macapanahata ne bocasi mũsa —nire Jesu judio masare.

35 To ã nichu tũhoa tina ti basi õ sehe ni durucure:

—¿Ahriro ã nino nohopu wahabocari, m̄sa tũhotuchu? ¿Griego masa cahai judio masa waha siteina ti jia macari cjiripu griego masapũre buhero wahabocari ahriro? 36 “Yu jih̄topu m̄sa waha masierara. ã jina m̄sa yũhũre macapanahta ne bocasi”, to nichu ¿dohse nino baro ahriro ã nijari? —ni durucure judio masa ti basi.

Caticu yoaa m̄arine yahuha Jesu

37 Bose n̄m̄uri pihtiri dacho tí dacho waro jiro nire. Tí dachoi Jesu tói ducuro, tuaro mehne sañurucu õ sehe ni yahure:

—Ñahma yapioina core ti tuaro cahmano seheta jipih̄tia dachoripe Cohamacu mehne m̄sa jih̄tire tuaro cahmaina yũhũre siniga. M̄sa ã sinichu Cohamacu yaina m̄sare ji dutihtja. 38 Yũhũre wacũ tuainare õ sehe ni joaa tiha Cohamacu yare ti joari tjui: “M̄ari pohtaripu caticu yoaa co to ã wijaarucuro seheta Cohamacu yaina mehne caticu yoariro ã jirucurohca”, ni joaa tiha Cohamacu yare ti joari tjui —ni yahure Jesu judio masare.

39 ã caticu yoarirore wama payo yahuro “Yũhũre wacũ tuainare Esp̄ritu Santo s̄ar̄acu s̄u m̄a waharohca”, nino nire Jesu. Tiro m̄anopu to m̄jaerasinichu Esp̄ritu Santo sehe wihierasiniha.

Judio masa p̄ua curua tju waha

40 Jesu to ã nichu tũhoa, masa payu õ sehe ni durucure:

—Ahriro potoc̄ata Cohamacu yare yahu m̄htariro mari cohtariro jira —nire masa.

41 Õ sehe nire paina sehe:

—Ahriro Cristo marine yũhd̄uchu yoah̄tiro jira —nire.

Paina sehe õ sehe nire tjoa:

—Cristo taro, Galilea yahpa macariro jisi tiro. Ahriro Jesu sehe tó macariro tjira. 42 Cristo Davi cjiro panamino ji turiariro jirohca. ã jiro Davi ya maca cjiroi Bel̄i Cristo masa bajuarohca. Õ seheta ni yahura Cohamacu yare ti joari p̄i. Ahriro Jesu sehe Bel̄i masa bajueraha. ã jiro tiro Cohamacu to warocariro Cristo waro jierara —nire tina.

43 Ñ jia Jesure tũhmarina cjiri tju ware ti basi p̄na curua.
 44 Mahainacã masa sehe Jesure ñaha duamare. Ñ ñaha duapahta tirore ñahaerare.

Judio masa pũtoa Jesure ne wacũ tuaeraha

45 Ñ yoa surara sacerdotea pũtoa cahapũ fariseo curua macaina cahapũ tjuaa wahaha. Ti tju sũchũ ñua tina surarare sinituha:

—¿Dohseana Jesure ñahaerari m̄sa? —ni sinituha tina sehe.

46 —Tiro noaputiaro durucuro jihre. Paina tiro yoaro sehe durucuina ne mariahna —ni yũhtiha surara tinare.

47 Ti ã nichũ fariseo curua macaina sehe õ sehe ni yahuha:

—¿M̄sare to mahñochũ “Potocã nino nica”, niri m̄sa cũhũ? 48 Mari pũtoa Jesure wacũ tuaeraina jia ne tirore cahmaerare. Sã cũhũ ã jina tirore cahmaeraja. 49 Ahrina masa sehe Cohamacũ dutiare Moise cjirore to cũrire masierara. Ñ masieraina jia Jesure wacũ tuaina jia tirore cahmana. Ti ã cahmari buhiri tinare Cohamacũ buhiri dahrerohca —niha fariseo curua macaina.

50 Fariseo curua macariro Nicodemo Jesure sũhũduro sũriro cjiro tõi jiha tina mehne. Ti ã nichũ tũhoro õ sehe niha tiro cũhũ tinare:

51 —Jesu to ñano yoirire masieraja mari. Ñ masierana tiro marine to yahuhto pano tirore buhiri dahre masieraja mari. Ñ masierapanahata tirore buhiri dahrena, mari ya dutiare yũhdũrucana nija mari —niha Nicodemo tinare.

52 To ã nichũ tũhoa õ sehe ni yũhtiha tina:

—¿Mũhũ cũhũ tiro yoaro seheta Galilea macariro tjijari? Cohamacũ yare ti joari tjure buhe pahñoga. Ñ buhecũ, “Cohamacũ yare yahu mũhtaina ne cũiro mariahna Galileare”, ni buhe masiihca mũhũ. Ñ jiro ã nimacanocano nina Jesu —ni yũhtiha tina Nicodemore.

53 [Ti ã niri baharo ti ya wũhũsep̄nũ tjuaa wahaha.

Mũno mehne ñano yoiricorore judio masa pũtoa wacũenoca sũ pjaha

8 1 Jesu tũcũp̄nũ Olivo wama tidũp̄nũ wahare. 2 Ñ yoa pa dachoi bohrearo jichũ Cohamacũ wũhũp̄nũ tiro sũre tjoa. To ã sũchũ ñua masa payũ tiro cahai cahmachure. Ti ã cahmachuchũ ñũno tiro sehe dũjitjiãhno tinare buhe dũcare.

3 To ã buhero watoi sã coyea judio masa buheina, fariseo curua macaina mehne tí wuhupũ numinore na tare. Ticoro mũno mehne to ñano yoachũ waro wacũenoca sũ pja sũha tina ticorore. Ñ sũ pja sũha ticorore Cohamacũ wuhupũ na sãare tina. Na sãa sũ tuhsũ jipihitina panoi ticorore duhu dapo, 4 õ sehe nire:

—Buheriro, ahricoro mũno mehne ñano to yoachũ waro wacũenoca ticorore sũ pja sũhi. 5 Cohamacũ dutiare Moise cjiropũ marine to cũri õ sehe nina: “Mũno mehne ñano yoaricorore tãa mehne doca, wajãga”, nia tiha Cohamacũ dutia. Mũhũ waro, ¿dohse ni tũhotujari ahrire? —ni siniture tina Jesure.

6 Jesu to ñano nichũ tũho duaa nimare tina tirore yahusã duaa. Ti ã sinitupachũta Jesu sehe puhsa nuju sũ, yahpapũ to wamo pica mehne joare. 7 Ñ jiro ã ti ni siniturucuchũ Jesu sehe wahcãrũca, tinare õ sehe ni yahure:

—Mũsa mehne macariro ñano yoaerario sehe ticorore tãa mehne doca mũhtajaro —nire Jesu.

8 Ñ ni tuhsũ pari turi tiro puhsa nuju, yahpapũ joare tjoa. 9 Tĩre tũhoia ti ñaa yoarire wacũa, ti wahmisũma sehe wijaa mũhtare. Ti baharo tina mehne macaina cũhũ wijaa pihtia wahare. Ñ ti wijaa pihtiaro baharo numino tói ducuricoro Jesu mehne tjuare. 10 Ñ jiro Jesu wahcã nuju sũ, ticorore õ sehe ni sinitu ñũre:

—¿Nohopũ wahari tina? ¿Mũhũre buhiri dahre duamarina mariajari mipũre? —nire ticorore.

11 —Mariahna, pũhtoro —ni yũhtire ticoro.

—Yũhũ cũhũ buhiri dahreraja mũhũre. Wahaga. Ñ jico ñaare yoa namoeco tjiga —nire Jesu ticorore.]

**Buhriaro marine to ñũ masichũ yoaro seheta Jesu ahri
yahpa macainare Cohamacũre masichũ yoara**

12 Pari turi Jesu tí wuhupũ jiinare õ sehe ni yahure:

—Buhriaro marine to ñũ masichũ yoaro seheta yũhũ ahri yahpa macainare Cohamacũre masichũ yoaja. Yũhũre wacũ tuariro jipihitia dachoripe Cohamacũ mehne ã jirucurohca. Ñ jiro tiro noaare wacũnohca. Ñ yoa tiro ñaare wacũ duasi —ni yahure Jesu.

13 To ã nichũ tirore fariseo curua macaina õ sehe nire:

—Mũhũ mũ basi mũ jia tiare ã ni durucui nina. Ñ jia mũ õ sehe ni, mũ mũ sũro mũ nimacanocachũ tí yaba cjihti jierara —nire tina Jesure.

14 Ti ã nichũ Jesu õ sehe ni yũhtire:

—Yũ tarirore masija yũhũ. Yũ wahahto cũhũre masija yũhũ. Mũsa sehe ne tíre masierara. Mũsa õ sehe nipachũta yũ jia tiare mũsare yũ yahuri potocã tjira. 15 Mũsa mũ sũro mũsa ñũri dihtare masina mũsa. Ñ jina noano masierara mũsa. Ñ masierapanahta yũhũre ñano ni durucura mũsa. Yũhũ sehe yũ mũ sũro masare ne ã nieraja. 16 Ñ jicũ masa ti jia tiare ñũ masicũ yũ mũ sũro ñũ masieraja. Yũhũ pini yũ Pũcũ yũhũre warocariro mehne ñũ masija. Ñ jicũ masa ti jia tiare yũ ñũ masia tí potocã tjira. 17 Mũsare dutia ti joari pũi õ sehe ni yahura: “Pũaro masa cũno potori ti yahuchũ ti yahua potocã tjira”, ni yahu joari jira. 18 Yũhũre yahuriro mehne sã pũaro tjija. Yũhũ yũ jia tiare yahuja. Tuhsũ, yũ Pũcũ cũhũ yahura yũhũ sehere. Tirota jira yũhũre warocariro —nire Jesu.

19 —¿Nohopũ jicari mũ Pũcũ? —ni siniture tina.

—Yũhũre mũsa masierara. Yũ Pũcũ cũhũre masierara mũsa. Yũhũre masina, yũ Pũcũ cũhũre masiboa mũsa —ni yũhtire Jesu tinare.

20 Jesu tinare buhero ã ni durucure Cohamacũ wũhũi ti niñeru duhu sãa caa poca cahai. To ñano yũhdũhti pja dũhsasinire. Ñ jia tina mehne to jipachũta tina tirore ñahaerare.

“Yũ wahahtopũre mũsa sehe waha masisi”, niha Jesu

21 Pari turi Jesu tinare õ sehe ni yahure tjoa:

—Yũ tariropũ wahaihca. Yũ wahari baharo yũhũre macanahca mũsa. Ñ jina mũsa ñaa buhiri tiina yarianahca. Yũ wahahtopũre mũsa sehe waha masisi —ni yahure Jesu.

22 —“Yũ wahahtopũre mũsa sehe waha masisi”, ¿to nichũ tũhoa ahriro to basi wajã yariarohcari ã nino? —nire sã coyega judio masa ti basi.

23 Ti basi ti ã nichũ masino õ sehe ni yahure Jesu tinare:

—Mũsa sehe ahri yahpa macaina jira. Yũhũ sehe mũano macariro jija. Ahri yahpai bajuarina jira mũsa sehe. Mũanopũ tariro jija yũhũ sehe. 24 Mũsa yũ jia tiare yũ nirire “Potocã jierara” nina, mũsa ñaa buhiri tiina yarianahca mũsa. Ñ jicũ “Mũsa ñaa buhiri tiina yarianahca mũsa”, nimahi mũsare —nire Jesu tinare.

25 —¿Noa baro jijari m̄h̄h̄? —ni siniture tina.

—Wahmanop̄ure ȳn nirucuriro seheta jija ȳh̄h̄. 26 M̄sare ȳn yahuhti p̄j̄iro d̄h̄sasinina. Tuhs̄, m̄sa ñano yoari buhirire m̄sare ȳn yahuhto c̄jihto p̄j̄iro d̄h̄sasinina mini. Ñ̄ jic̄ ȳh̄h̄re warocariro to yahuri c̄jirire ahri yahpa macainare yahuja. To yahuri potoc̄ã t̄jira —nire Jesu tinare.

27 “Ȳh̄h̄re warocariro”, to nich̄ t̄h̄oa “Mari P̄c̄u jica”, ni t̄hotuerare tina. 28 Ti ã ni t̄hotuerach̄ ñ̄no Jesu ò sehe ni yahure tinare:

—Ȳh̄h̄re mas̄nore Cohamac̄u warocarirore m̄sa yuc̄c̄u taño mehne wahc̄õ daponahca. M̄sa ã yoana, “Tiro Cohamac̄u warocariro t̄jira”, ni masinahca. Ñ̄ jina ȳn m̄ s̄ro ȳn yoerariro ȳn jia tiare masinahca m̄sa. Ñ̄ jina ȳn P̄c̄u ȳh̄h̄re to buheri dihtare yahuriro ȳn jia c̄h̄h̄re masinahca m̄sa. 29 Ȳh̄h̄re warocariro sehe ȳh̄h̄ mehne jira. To cahmaare jipihtia dachoripe yoarucuja. Ñ̄ jiro ȳh̄h̄re tiro ne coh̄erara —nire Jesu tinare.

30 To ã nich̄ t̄h̄oa, tirore masa paȳn wac̄ũ tuare.

Cohamac̄u poh̄nare, ñ̄are yoaina c̄h̄h̄re yahuha Jesu

31 Ñ̄ jia paina judio masa Jesure wac̄ũ tuare. Ñ̄ jiro Jesu tinare ò sehe ni yahure:

—Ȳn dutiare yoa pah̄ñoina jina, potoc̄ãta ȳn buheina jira m̄sa. 32 Ñ̄ jina potoc̄ã masinahca m̄sa. Potoc̄ã jiare masina, ñ̄aa yoaare duhu masinahca. Ñ̄ jina cahamaca yoaro sehe ji namosi m̄sa —nire Jesu tinare.

33 To ã nich̄ t̄h̄oa tina ò sehe ni ȳhtire:

—S̄a sehe panop̄ macariro Abrah̄ã c̄jro panamana ji turiaina jija. Ñ̄ jina ne paina ti cahamaca jieraja s̄ã. Ñ̄ jic̄ “Cahamaca yoaro sehe ji namosi” nic̄, ¿dohse jiro baro s̄ãre ã nijari m̄h̄h̄? —ni siniture tina Jesure.

34 Ti ã nich̄ t̄h̄oro ò sehe nire tiro:

—Potoc̄ã m̄sare niita nija. Jipihtina ñ̄are yoaina sehe ti ñ̄aa yoaare duhu masierara. Ñ̄ jia tí ñ̄aa sehe ti p̄h̄toro yoaro sehe jira. Ñ̄ jiina jia cahamaca yoaro sehe jira tina. 35 Cahamac̄uno sehe to p̄h̄toro ya curua macariro jipihtia dachoripe jirucuerara. Ñ̄ jiro painare dutiriro jierara. Tí w̄h̄h̄ macariro sehe to mac̄uno sehe jipihtia dachoripe potoc̄ãta tí curua macariro jira tiro. (Ȳh̄h̄ sehe Cohamac̄u mac̄uno jija.

Ã jicũ dutiriro jija. Mũsa ñaa yoaare duhu dutihtja.) 36 Ã jina yũhũ Cohamacũ macũno ñaare yũ duhuchũ yoarina jina potocãta ñaare duhurina jira mũsa. (Ã jina tí ñaa cahamaca yoaro sehe ji namoerara mũsa.) 37 Abrahã cjiro panamana ji turiaina mũsa jichũ masija. Ã jipanahta yũ yahua sehere tũho duaerara mũsa. Ã jina yũhũre wajã duara mũsa. 38 Yũ Pũcũ yũhũre to masichũ yoari cjirore yahuja mũsare. Yũ ã yahupachũta mũsa pũcũ watĩno mũsare to dutiare yoara mũsa cũhũ —nire Jesu tinare.

39 —Abrahã cjiro panopũ macariro sã ñũchũ cjiro jia tiha. Ã jiro watĩno sã pũcũ jierara —ni yũhtire tina.

Ti ã nichũ Jesu õ sehe ni yũhtire:

—Abrahã panamana jina, to yoariro seheta yoaboa mũsa.

40 Cohamacũ yũhũre potocã to yahuaare mũsare yũ yahupachũta yũhũre wajã duara mũsa. Abrahã cjiro sehe ne ã yoaera tiha.

41 Mũsa pũcũ to yoariro seheta yoara mũsa —nire Jesu tinare.

To ã nichũ tina õ sehe ni yũhtire:

—Wamomaca dũhtemahnoeraina pohna jieraja sã. Cũirota jira sã Pũcũ. Tirota jira Cohamacũ —nire tina.

42 Ti ã nichũ Jesu õ sehe ni yũhtire:

—Cohamacũ mehne macariro jicũ, õpũre tahi. Ã jina Cohamacũ mũsa Pũcũ to jichũ yũhũre cahĩboa mũsa. Yũ mũ sũro taerahi yũhũ pinihta. Cohamacũ to warocachũ tahi õpũre.

43 ¿Dohseana yũ durucuare tũhoerajari mũsa? Yũ yahuaare tũhona bihoerara mũsa. Ã jina tũho duaerara mũsa. 44 Mũsa pũcũ sehe watĩno jira. Ã jina watĩno cahmaa sehere yoa duara mũsa. Ahri yahpa wahmanopũ to ji dũcachũpũ, mipũ cũhũre tiro masare wajãrucuriro jira. Tirore potocã durucua mariaha. Ã jiro tiro potocã ne durucuerara. Tiro wahmanopũre mahũno mũhta dũcariro jia tiha. Ã jiro tiro ã mahũnucuriro jiro, mahũnoare yahura. 45 Yũhũ sehe mũsare potocã yahuja. Ã yũ yahuchũ yũhũre tũhoerara mũsa. 46 “Mũhũ ñano yoariro jira”, yũhũre ni masierara mũsa. ¿Potocã mũsare yũ yahupachũta dohseana tũhoerajari mũsa? 47 Cohamacũ pohna sehe to durucuare tũhora. To pohna jierana, to durucuare tũho duaerara mũsa —nire Jesu tinare.

Abrahã cjiro to jightho pano Cristo sehe ji mũhta tuhsua tiha

48 To ã nichũ tũhoa judio masa tirore õ sehe nire:

—“Mũhũ Samaria macariro jira. Ā jicũ tũho masierariro watĩno to cohtotariro jira mũhũ”, sã niri potocã tjira —nire tina Jesure.

49 Ti ã nichũ tũhoro õ sehe ni yũhtire Jesu:

—Tũho masierariro, watĩno to cohtotariro jieraja yũhũ. Yũ Pũcũre ño payoja. Mũsa sehe yũhũre ño payoerara. 50 Yũhũre masa ti ño payohtire macaeraja yũhũ. Yũ Pũcũ sehe masare yũhũre ño payo dutira. Tiro pinihta yũ jia tiare noano ñũ masino, ãta ño payo dutira. Tuhsũ, yũhũre ti cahmaerari buhiri buhiri dahreriro jirohca tiro. 51 Potocãta mũsare nii nija. Yũ dutiare yoariro jipihtia dachoripe Cohamacũ mehne ã jirucurohca —nire Jesu.

52 To ã nichũ tũhoa õ sehe nire tina:

—Mipũ pinihtare tũho masierariro, watĩno to cohtotariro mũ jichũ sã noano masija. Abrahã cjiro yariaa wahaha. Cohamacũ yare yahu mũhtaina cjiri cũhũ yaria pihtia wahaha. Ā jicũ “Yũ dutiare yoariro jipihtia dachoripe Cohamacũ mehne ã jirucurohca” nicũ, ¿dohse nicũ ã nijari mũhũ? 53 ¿Sã ñũchũ cjiro Abrahã yũhdoro tuajari mũhũ? Tiro cjiro, Cohamacũ yare yahu mũhtaina cjiri cũhũ yariaa wahaha. ¿Mũhũ sehe diro baro jijari mũhũ ã ni durucucũ? Mũhũ ã niboriro jierara —nire tina.

54 Ti ã nichũ tũhoro Jesu õ sehe ni yahu namore:

—Yũhũ yũ basi “Tuariro jija yũhũ” nicũ, tuariro jieraboca yũhũ. Yũ Pũcũ sehe “Tiro tuariro jira”, nina yũhũre. “Sã yairo Cohamacũ”, mũsa niriro sehe yũ Pũcũ tjira. 55 Mũsa sehe yũ Pũcũre ne masierara. Yũhũ sehe tiore masija. “Tirore masieraja” nicũ, mũsa yoaro sehetã mahũoa payũriro jiboa yũhũ. Potocãta tiore masija. Ā jicũ to dutiare yoaja. 56 Ahri yahpũpũ yũ tahtore mari ñũchũ cjiro Abrahã cjiro masia tiha. Ā masino tiro wahchea tiha —nire Jesu.

57 To ã nichũ tina õ sehe ni yũhtire:

—Mũhũ cincuenta cũhmari cjuærasinica. Abrahã cjiro paũpũ macariro jira. ¿Mipũre tiro cjiore mũhũ dohsea masiboari? —nire judio masa Jesure.

58 —Potocã mũsare niita nija. Abrahã to jihto pano yũhũ sehe ji mũhta tuhsũa tiĩ —nire Jesu tinare.

59 To ã nichũ tũhoa tina sehe tãare na, tiore doca duamare. Ti ã doca duapachũta Jesu sehe Cohamacũ wũhũi jiriũ duhti wijaa wahare.

Capari ñuerarirore ñuchũ yoaha Jesu

9 ¹ Ñ yoa Jesu sã to buheina mehne mahai wahana paireore capari ñuerarirore boca sũi. Tiro wahma masa bajaropũta capari ñuerariro jia tiha. ² Sã cũhũ tirore ñũna, õ sehe ni sinitu ñũhi Jesure:

—¿Buheriro, ahriro dohsearo capari ñuerariro masa bajua tiari? ¿Ñaaare yoaa tiari ã waharo? ¿O to pũcũsuma sehe ñaaare yoaa tiari to ã wahachũ? —ni sinitu ñũhi sã sehe Jesure.

³ Sã ã nichũ tũhoro õ sehe ni yũhtire tiro:

—Ahriro to ñaaare yoari buhiri capari ñuerariro wahaerare. To pũcũsuma cũhũ ñaaare ti yoari buhiri capari ñuerariro wahaerare. Cohamacũ sehe tirore capari ñuerachũ yoare tirore ñuchũ yoaro taro masare to ñohtire. ⁴ Yũhũre warocariro to cũrire mipũre yoaro cahmana yũhũre. Ñamipũ mari dahra masieraro seheta baharopũ yũhũre warocariro to cũrire yoa masieraja yũhũ. ⁵ Ahri yahpũpũ buhriaro marine to ñũ masichũ yoariro seheta jiro jicũ ahri yahpa macainare Cohamacũ yare masichũ yoaja yũhũ —nire Jesu.

⁶ Ñ ni tuhsũrota yahpũpũ chahcho puti cũre. To ã chahcho puti cũrire dahra more, capari ñuerarirore to caparire wisõre. ⁷ Ñ wisõno õ sehe nire Jesu:



—Siloé wama tiri copai cuhsuri copai m̄ caparire cosai wahaga —nire Jesu. (Siloé sã ya dusero mehne nia “Warocari copa”, nia nire.)

Jesu to caparire cosa dutihiro sehe waha, cosa, capari ñ̄rirop̄ tju wihire. ⁸ To tju wihichu tiro cahai jiina tirore ñ̄re. Tó pano niñeru siniriro cjiro to jichu ñ̄rina tirore ò sehe nire ti basi:

—¿Ahriri sohõ jiriro niñeru siniriro cjiro jierajari? —nire tina.

⁹ —Tirota jira wiho —nire paina sehe.

—Tiro jierara. Ñ̄ jieraparota tiro yoaro sehe bajuriro jira —nire paina.

Ti ã nichu tuhoro capari ñ̄erariro cjiro sehe ò sehe nire:

—Tiro tjija ȳh̄u —nire tinare.

¹⁰ To ã nichu masa tirore ò sehe ni siniture:

—¿Capari ñ̄erariro cjiro jicu dohse waha ñ̄ri m̄h̄u? —ni siniture tina tirore.

¹¹ —Jesu wama tiri dihta sohãare dahra more, ȳ caparire wisõre. Ȳh̄ure wisõ tuhsu “Siloé wama tiri copap̄ m̄ caparire cosai wahaga”, to nichu cosai s̄hi ȳh̄u. Ȳ ã cosari baharo ȳ capari noano bajure ȳh̄ure —ni yahure tiro masare.

¹² —¿M̄h̄ure ã yoariro nohop̄ jicari tiro? —nire tina.

—B̄ah. Nohoi jiro jica —nire tiro.

Capari ñ̄erariro cjirore fariseo curua macaina sinituha

¹³ Ñ̄ ni durucu tuhsu tina capari ñ̄erariro cjirore fariseo curua macaina cahap̄ naahre. ¹⁴ Tí dacho Jesu dihta sohãare dahra more capari ñ̄erarirore noariro to yoari dacho Sabado dacho jire. Tí dacho sã sori n̄m̄u jire. ¹⁵ Ñ̄ jia fariseo curua macaina sehe tirore ò sehe ni sinituha tjoa:

—¿Dohse yoa m̄h̄u ñ̄ri? —ni sinituha tina.

—Dihta sohãa mehne ȳ caparire wisõhre. Ñ̄ jicu ȳ caparire ȳ cosari baharo ñ̄ d̄cahi ȳh̄u —ni yahuha tiro tinare.

¹⁶ —Tiro Sabado dacho mari sori n̄m̄u mari dahra dutierari n̄m̄u dahrahe. Ñ̄ jiro tiro Cohamacu yairo jierara —niha paina fariseo curua macaina sehe.

Paina sehe ò sehe niha:

—Ñ̄aare yoariro ò sehe noariro wahach̄u yoa masierara. Ñ̄ jiro tiro noariro jiboca —niha paina.

Ã jia tina pua curua ti basi tju waha. 17 Ã jia pari turi tina capari ñnerariro cjirore õ sehe ni sinituha tjoa:

—¿Muhure mu caparire noano yoarirore muhu waro dohse ni tuhutujari Jesure? —niha tina tirore.

—Tiro potocãta Cohamacu yare yahu muhtariro jira —niha capari ñnerariro cjiro.

18 Wahmanopure judio masa õ sehe ni tuhutumaha: “Ahiro capari ñnerariro cjiro jierara”, ni tuhutumaha tina. Ã ni tuhutua capari ñnerariro cjiro pucsumare pjirocaha tina. 19 Pjiroca tuhsu, to pucsumare õ sehe ni sinituha fariseo curua macaina puhto:

—¿Ahiro potocãta musa macu jijari? ¿Dõhta tiro capari ñnerariro masa bajuari? ¿Potocãta capari ñnerariro cjiro jiparota dohsearo ñjari mipure? —ni sinituha tina to pucsumare.

20 —Ahiro sã macuta jira. Ã yoa dõhta capari ñnerariro masa baja tire tiro. 21 Tire masipanahta to ñerire, tirore ñchũ yoariro cũhure masieraja sã. Sã macure sinituga. Bucuro jira tiro. Tiro to basi yahu masina —niha to pucsuma.

22 Judio masa sã puhtoah wahmanopure õ sehe nia tiha:

—“Jesuta Cristo Cohamacu warocariro jira”, niinare mari buhea wuhusepu sãa dutisi sã —nia tiha judio masa puhto.

Ti ã nichu tuhoa capari ñnerariro cjiro pucsuma sehe judio masa puhtoare cui niha. 23 Ã cuia, “Bucuro jira tiro. Tiroreta sinituga”, niha tina judio masa puhtoare.

24 Baharo judio masa sã puhtoah pari turi capari ñnerariro cjirore pjirocaha tjoa. Pjiroca tuhsu, õ sehe niha tirore:

—Cohamacu mehne poto yahuga muhu. Jesure mahñoriro to ñaa yoariro jichu sã masija. Ã jicu poto yahuga sãre —niha judio masa capari ñnerariro cjirore.

25 Ti ã nichu tuhorõ õ sehe ni yuhtiha tiro:

—Jesure to ñaa yoariro to jichu masieraja yuhu. Cũnota masija yuhu. Panopure capari ñnerariro jia ticuru yuhu. Mipu sehere ñja yuhu. Tí dihtare masija yuhu —ni yuhtiha capari ñnerariro cjiro tinare.

26 —¿Dohse yoari muhure tiro? ¿Mu capari ñuhto cjihtore dohse yoari tiro muhure? —ni sinituha tina tjoa.

27 —Tíreta musare yahu tuhsamahicu yuhu. Yu ã ni yahupachuta musa ne tuho duaerare yuhure. ¿Dohse yoa

duana pari turi yu yahuchu tuho duajari musa? ¿Musa cūhu to buheina ji duajari? —niha tiro tinare.

28 To ã nichu tuhoa tina tuhtiha tirore:

—Mūhu Jesu buheriro jira. Sã sehe Moise cjiro buheina jija. 29 Potocãta Cohamacu Moise cjirore durucua tiha. Jesu to tarirore sã masieraja —niha tina capari ñuerariro cjirore.

30 Ti ã nichu õ sehe ni yuhtiha tiro:

—¿Tiro to tarirore musa masierachu yuhure ñuchu yoariro jiro Cohamacu warocariro jierabocari tiro? 31 Cohamacu ñaa yoainare ti siniare tuhoerara. Tí pinihtare mari masija. Tinare tuhoeraparota Cohamacure ño payorirore, to dutiare yoarirore to siniare tuhora Cohamacu. 32 Wahmanopure ahri yahpa to ji ducachupure ne coã masa bajaropu capari ñuerarirore ne cūiro baro ñuchu yoariro mariea tiha. 33 ã jiro Jesu Cohamacu warocariro jieraro yuhure ñuchu yoaeraboa tiro —niha tiro tinare.

34 —Mūhu dóihta ñariro jia tiha. ¿Ã jipacuta sãre buhe duajari mūhu? —niha judio masa sã puhto tirore.

Ã ni tuhsuata tina tirore cohã wionocaha.

**Jesu yare cahmaeraina capari ñueraina ti ñu
masieraro seheta Cohamacure masierara**

35 ã yoa capari ñuerariro cjirore ti cohã wiorire Jesu tuhore. ã tuhoro capari ñuerariro cjirore boca sũro, tirore õ sehe ni siniture:

—¿Masunore Cohamacu warocarirore wacũ tuajari mūhu? —nire Jesu.

36 —¿Puhtoro, noa jijari tiro? Tirore masicu wacũ tuaihtja tirore —nire capari ñuerariro cjiro Jesure.

37 —Tirore ñu tuhsure mūhu. Mipure mūhu mehne durucuriro tiro tjija yuhu —nire Jesu capari ñuerariro cjirore.

38 —Puhtoro, mūhure wacũ tuaja —nire capari ñuerariro cjiro.

Ã ninota tiro Jesu panoi na tuhcuca caha sũ, tirore ño payore.

39 To ã ño payochu ñuno õ sehe nire Jesu:

—Noaina, ñaina cūhu ti yoarire masichu yoai tai ahri yahrapure tahi. Capari ñueraina ti ñu masieraro seheta tina yoaro sehe jiina yu Pucure masierara. ã masierainare yu Pucure masichu yoai tai tahi yuhu. “Sã noano masija”, ni

tũhotumarina noano ti masierarire masichũ yoai tai tahi yũhũ —nire Jesu.

40 To ã nichũ tũhoa mahainacã fariseo curua macaina tirore õ sehe nire:

—“Capari ñũeraina ti ñũ masieraro seheta noano masierara mũsa cũhũ”, ¿nii nijari mũhũ sãre? —nire fariseo curua macaina Jesure.

41 Ti ã nichũ Jesu õ sehe nire:

—Capari ñũeraina ti ñũ masieraro seheta potocã mũsa noano masierachũ, mũsare buhiri mariaboa. “Sã noano masiina jija”, mũsa niri buhiri buhiri tiina jisinina mũsa mipãre —nire Jesu tinare.

Ovejare ñũ wihboriro quitire yahuha Jesu

10 ¹ Baharo quititi mehne piti dahre buhero taro õ sehe nire Jesu:

—Potocãta nii nija mũsare. Ovejare wihbori sahrĩno sopacai sãaerariro, sopaca marienopũ sãariro sehe yaca bũcũro jira.

² Sopacai sãariro sehe ovejare ñũ wihboriro jira. ³ Sopacare cohtariro sopacare pjõohna ovejare ñũ wihboriro to sãahto

sehe. Ovejare ñũ wihboriro to durucuchũ tũho tara to nuina oveja perĩ. Tinare pjirocaro, ti wama mehne pisurocarucura tiro. Æ yoaro tinare sahrĩnopũ jiinare pji wiorucura sopacarpũ.

⁴ To yainare jipihtinare pji wio tinare mũ tãrucura. Oveja sehe to durucuarẽ masia, to baharo nũnũ tirucura. ⁵ Pairore ti masierarirore nũnũ tierara tina. Æ jia paina ti durucuarẽ tũhoa, cui mũrocaa wahara —nire Jesu tinare.

⁶ Ahri quitire to ã yahupachũta to yahuarẽ tũho ñahaerare tina.

Jesu ovejare noano ñũ wihboriro yoaro seheta to yainare noano ñũ wihbora

⁷ Pari turi Jesu tinare õ sehe ni yahure tjoa:

—Potocãta mũsare nii nija. Ovejare wihbori sahrĩno sãari sopaca yoaro sehe jija yũhũ. ⁸ Jipihtina yũ pano tarina

quihõno yũ durucuarẽ buheraina, ovejare ñũ wihbo mahñoina yacaina yoaro sehe jira. Ti ã jipachũta yũ yaina sehe oveja

yoaro sehe jiina painare ne tũho wahcãerara. ⁹ Yũhũ ovejare wihbori sahrĩno sãari sopaca yoaro sehe jija. Tĩ sopacai sãaina

yoaro sehe tjira yũhũre wacũ tuaina. Æ jicũ yũhũ tinare

pichacapu wahaborinare yuhduchu yoaihtja. Oveja sehe tinare nu wihboriro mehne ti cahmaare bocaro yoaro seheta yu yuhduchu yoaina cuhu yuhu mehne ti cahmaare bocaahca. Yuhu tinare noano ducata, noano nu wihboihca —nire Jesu.

10 A ni tuhsu o sehe ni namore:

—Musare mahnoare buheina, ovejare nu wihbo mahnoina sehe ovejare yacaina yoaro sehe jira. Yaca taa, waja taa, dojomehnea taa tara tina. Wiho mejeta yuhu sehe yu yainare, oveja yoaro sehe jiinare, tuaro waro ti wahchea mehne a catirucuchu yoai tahi. 11 Ovejare noano nu wihboriro yoaro sehe jija yuhu. Ovejare noano nu wihboriro tinare noano ducata, to yariahtore ne cuierara. To yoaro seheta yuhu cuhu yainare noano ducata, yariahca, tinare ne soro wahaerahto sehe. 12 Oveja puo cahamacuno sehe potoca ovejare nu wihboriro jierara. A jia oveja to yaina jierara. A jiro yairo ovejare to churo tachu nu to cahamacuno sehe ovejare cohã cunoca, muroca wahara. To a cohã curi baharo, yairo ovejare to nahachu nu oveja peri muroca site wahca wahara. 13 To cahamacuno sehe to wapataa dihtare cahmana. A jiro tiro ovejare noano nu wihbo ji coerara —nire Jesu.

14 A ni tuhsu o sehe ni namore:

—Ovejare noano nu wihboriro yoaro sehe jija yuhu. A jicu yu yainare masija yuhu. A jia yu yaina sehe yuhure masina. 15 To seheta yu Pucu cuhu yuhure masina. A jicu yuhu cuhu yu Pucure masija. Oveja yoaro sehe jiina yu yaina Cohamacu mehne ti a jirucuhti cjihtire yariaihca yuhu. 16 Paina oveja pa sahrino macaina yoaro sehe jiina paina masa cuhu yu yaina jahca. Tina cuhure naaihca. A jia yu durucuchu tuho wahcaahca tina cuhu. A jia yu yaina jipiltina cu curuata jahca. A jicu yuhu dihta yu yainare nu wihboihca —nire Jesu.

17 A ni tuhsu o sehe ni namore:

—Yu yaina Cohamacu mehne ti a jirucuhti cjihtire yariaihca. Yu yariari baharo masa mujaihca. Yu a yoah tiro jichu yu Pucu yuhure cahina. 18 Yu waja dutierachu yuhure waja masieraboa tina. Yu cahmano seheta yuhure wajaahca. A jicu yu yaina Cohamacu mehne ti a jirucuhti cjihtire yariaihca. Yaria masija yuhu. A yoa masa mija masija. Yu Pucu yuhure treta yoa dutire —nire Jesu.

19 To a nichu tuhoa judio masa pu curua tju ware. Paina soro tuhotu, paina cuhu soro tuhoture:

20 —Tiro watĩno to cohtotariro jira. Ñ jiro tũho masierariro jira. ¿Dohseana tirore pari turi tũhojari masa? —nire paina payu judio masa.

21 Paina sehe õ sehe nire:

—Watĩno to cohtotariro jiro ã ni durucueraboa. Capari ñnerarirore ñuchũ yoa masierara watĩno to cohtotariro. Ñ jiriro jiro tiro watĩno to cohtotariro jierara —nire paina judio masa.

Judio masa Jesure cahmaeraha

22 Pa dachoi sã coyera judio masa Jerusalēi bose numuri yoaa nire pari turi. Cohamacu wũhure panopu tirore ti wari cjirire ti wacũhti dachori jire. Tí pjare puhiro jire. 23 Tí dachoi Salomo wama tiri tahtiapu Cohamacu wũhũ jiri tahtiapu Jesu ñũ tinino nire. 24 Tí tahtiapu to jichũ ñũa sã coyera judio masa tiro cahapu cahmachu, tirore õ sehe ni siniture:

—Yoaputiaro pja sãre noano yahueraca mũhũ. Poto sãre noano yahu bahrañoga mũhũ. ¿Cristo Cohamacu to warocariro tjijari mũhũ? —nire tina Jesure.

25 Ti ã nichũ tũhorõ õ sehe ni yũhtire Jesu:

—Mũsare yahu tuhsũmajacu yũhũ. Yu ã yahupachũta yũhure tũho duaerare masa. Yu Pũcu yũhure to dutiriro seheta to tuua mehne yoa ñoja. Ñ yoacu yu Cristo jiareta mũsare ñoi nija. 26 Yu ã ñopachũta yũhure tũho duaerara masa. Mũsa sehe yu yaina jierara. Ñ jina paio yaina oveja yoaro sehe jiina jina, yũhũ sehẽ tũhoerara masa. 27 Ovejare ñũ wihborirore to yaina ti tũhoriro seheta yũhũ cũhure yu yaina tũhora. Ñ jicu yu yainare masija yũhũ. Ñ jia tina yũhũ mehne wahara. 28 Ñ jicu jipihtia dachoripe Cohamacu mehne ã catirucuchũ yoaja tinare. Ñ jia tina sehe pichacapu ne wahasi. Ñ jia yu yainare yu ñũ wihbochũ paina sehe ne cũirore yũhure ma masierara tinare. 29 Ñ yoa yu Pũcu yu yainare yũhure wariro jipihtina yũhoro tuariro jira. Ñ jiro yu Pũcu sehe yu yainare to ñũ wihbochũ, ne cũiro tiro cũhure ma masierara tinare. 30 Yũhũ yu Pũcu mehne cũirota jija —nire Jesu judio masare.

31 To ã nichũ tũhoa judio masa sehe tirore ti doca wajãhti tãare pari turi namare tjoa. 32 Ti ã yoachũ ñũno Jesu õ sehe ni siniture tinare:

—Yu Pũcu ya tuua mehne payu tahari yoa ñomahi mũsare. ¿Di baro sehẽre yu yoari buhiri yũhure tãa mehne doca wajã duajari masa? —ni siniture Jesu.

33 To ã nichu tuhoa õ sehe nire tina:

—Cohamacu tuaa mehne mu yoa ñori buhiri mũhure tãa mehne doca wajã duaeraja sã. Cohamacure mu ñano durucuri buhiri mũhure tãa mehne doca wajã duaja sã. Masuno jipaihta “Cohamacu jija yuhu”, mu nia buhiri mehne mũhure tãa mehne doca wajã duaja sã —ni yũhtire tina.

34 Ti ã ni yũhtichu tuhoro Jesu tinare õ sehe ni yahure:

—Musa cũhure “Cohamana”, ni pisure Cohamacu. Æta ni joaa tiha to dutiare ti joari pũi. 35 Cohamacu yare ti joari pũ quihõno to jichu mari masija. “Mahõnoa jira”, tí pũre ni masieraja mari. Æ jiro to yare masiinare potocãta tiro “Cohamana”, ni pisura. 36 Cohamacu yuhure besetjiãhno, ahri yahrapure warocare. Æ jicu yuhu “Cohamacu macno jija”, yu niri buhiri “Cohamacure ñano durucuro nina Jesu”, nina musa yuhure. ¿Dohseana yuhure ã nijari musa? 37 Yu Pucu to cahmariro seheta to tuaa mehne yu yoa ñoerachu pinihtare yu buherire “Potocã tjira”, nieraboca musa. 38 Yu Pucu to tuaa mehne yu yoa ñopachuta yuhu sehere tuho duaeraboca musa. Æ tuho duaerapanahta to tuaa mehne yu yoa ñochu ñna yu yoarire “Potocã tjira”, niga musa. Musa ã nina, yu Pucu mehne sã cũno potori sã jichu masinahca musa. Æ jina yuhu yu Pucu mehne cũno potori yu jichu masinahca musa. Æ jina tuho ñahanahca musa —nire Jesu tinare.

39 To ã nichu tina pari turi tirore ñaha duamare. Ti ã ñaha duachu ñno tiro duhti wijaa wahare.

40 Æ wijaariroputa João masare to bautisa mũhtariopu Jordão sie seheru pari turi wahare tjoa. Tõpu sũro tjuanocare tiro. 41 Æ jia masa payu tirore ñua sure. Õ sehe nire tina ti basi:

—João sehe Cohamacu tuaa mehne yoa ñoerare. Æ to yoa ñoerapachuta jipihtia Jesure to yahuri cjiri sehe potocãta jira —nire masa ti basi.

42 Æ jia tõpũre masa payu wacũ tua dũcare Jesure.

Lázaro wama tiro yariaa wahaha

11 1 Æ yoa cũiro Lázaro wama tiro to wahmiosãnumia María, Marta cũhu mehne Betania wama tiri macai jia tire. Tiro cũ numu dohatia wahari jire. 2 Tiro wahmiono María sehe baharo Jesu to dahporire me sitia wisõ, to pjoari mehne tirore pahã cohãhticoro jiri jire. 3 Æ yoa to dohatia

wahachũ ñña, to wahmiosãnumia sehe painare Jesure yahu dutirocari jire:

—Pũhoro, mũ cahĩriro dohatiro nina —ni yahu dutirocari jire Lázaro wahmiosãnumia.

4 Tí quitire tũhoro õ sehe nire Jesu:

—Mipũre Lázaro to dohatia to variahti cjihti jierara.

Cohamacũ tuaare masare ñohti cjihtire mipũre tiro dohatira. Æ jia yũhũ to macũno tuariro yũ jia cũhũre ñũahca masa —nire Jesu.

5 Jesu Martare, to bahoro cũhũre, Lázaro cũhũre tuaro cahĩa tire. 6 Æ nino Lázaro dohatiriro to jichũ tũhoparota tói Jesu sehe pũa dacho tjuasinire. 7 Pũa dacho baharo Jesu õ sehe nire sãre to buheinare:

—Pari turi Judea yahpũpũ tjuaa wahajihna tjoa —nire sãre.

8 —Buheriro, canũpũcãta judio masa tó macaina mũhũre tãa mehne doca wajã duamare. ¿Dohseacũ tórpũ pari turi tjuaa waha duajari mũhũ? —nihi sã to buheina.

9 Sã ã nichũ tũhoro, tirore ti wajã masierasininore yahuro, piti dahre buhero sãre õ sehe nire:

—Pjĩro tũhotuena tjiga. Cũ dachore doce horari waro jira.

Sũ dacho macariro to jisnichũ, noano ñũja mari. Æ jina dachore tinina ne pũha tu mũa boraeraja mari. 10 Wiho mejeta nahitianoĩ tiniina sehe pũha tu mũa boraahaca. Sũ dacho macariro mariachũ noano ñũerara tina —nire Jesu. (Æ nino õ sehe nino niri jimare: “Mipũre yũ Pũcũ yare yũ yahu pahũohto dũhsasinina. Æ jia yũhũre wajã masierasinina”, nino niri jimare.)

11 Æ nino sãre õ sehe ni yahu namore tjoa:

—Mari mehne macariro Lázaro, carĩno nica. To ã carĩpachũta yũhũ tirore wahcõĩ wahaihtja —nire sãre.

12 —Pũhoro, Lázaro carĩriro jiro, yũhdũrohca —nimahi sã.

13 Sã ã nipachũta Jesu “Carĩno nica” nino, “Yariaa wahaca”, nino niri jimare. To ã nichũ tũhona “Lázaro soro nica”, ni tũhotumai sã sehe. 14 Sã ã ni tũhotuchũ masino Jesu pota yahure sãre:

—Lázaro yariaa wahaca. 15 Yũ marieno to yariachũ, noa nina. Æ jina mũsa yũhũre wacũ tua namonahca. Mũsa yũ jia tiare masi namo, mũsa yũhũre wacũ tua namohti cjihti jiahca ahri. Æ yoana basata. Mari ñũna wahajihna to cahapũ —nire Jesu.

16 Toma sũhũduariro wama tirore õ sehe nire sãre:
—Mari cũhu Jesu mehne wahajihna. Tirore wajãa, mari
cũhũre wajãjaro —nire Toma.

Jesu ã jirucuchũ yoariro masare masoriro jira

17 ã yoa sã tũpũre sã sũna cahachũ waro tó macaina õ sehe
ni yahure Jesure:

—Pititia dachori wahara Lázaro cjirore masa copapũ ti siõ
sãari baharo —ni yahuha tirore.

18 Betania wama tiri maca sehe Jerusalẽ cahacãi tia
kilómetro yoaro jire. 19 ã jia Lázaro to yariari baharo, payũ
Jerualẽ macaina sã coyera judio masa Martare, María cũhũre
ñahacaha tiia taa tari jire. 20 Tũpũre sã sũna cahachũ tũhoro,
Marta sehe sãre piti bocaro wihire. Wiho mejeta to bahoro
María sehe to ya wũhũpũ tjuari jire. 21 Marta sehe Jesure piti
boca wihĩ, õ sehe nire tirore:

—Pũhtoro, yũ bahũ to yariahto pano mũ õi jichũ, tiro
yariaeraboa. 22 Mipũ cũhũre Cohamacũre mũ sini payochũ,
tiro mũ sinino seheta yoarohca —nire Marta Jesure.

23 —Mũ bahũ masa wijaarohca —nire Jesu tiorore.

24 —ãja. Ahri yahpa to pihtiri dachoi yariarina cjiri ti
masa wijaahiti dachoi to masa wijaahitore masija yũhũ —nire
ticoro sehe.

25 To ã nichũ Jesu õ sehe ni yahure tjoa:

—Yũhũ masa wijaachũ yoariro jija. Yũhũ ã jirucuchũ
yoariro jija. Yũhũre wacũ tuariro yariaparota ã catirucurohca.

26 ã jia jipihtina Cohamacũ mehne ã catirucuina, yũhũre
wacũ tuaina pichacapũ ne wahasi. ¿Ahrire masijari mũhũ?
—nire Jesu tiorore.

27 —Pũhtoro, masija yũhũ. Cristo Cohamacũ macũno,
masare yũhdũchũ yoariro “Ahri yahpapũ tarohca”, ti niriro
mũ jichũ masija yũhũ —nire Marta Jesure.

Lázaro to masa copa cahai Jesu tiuha

28 Marta ã ni tuhsũ to bahoro Maríare pjiro wahare:

—Marine buheriro mari ya macai taro nina. Mũhũre pjihre
—ni yaroca yahuri jire Maríare.

29 To ã nichũ tũhoro María ño duaro wahcãrũca, sã cahapũ
tari jire Jesure ñũno taro. 30 Ti ya macapũ sũerasinihi sã. Marta
sãre to piti bocaroihita jisinihi sã. 31 Judio masa tí wũhũi

Maríare ñahacaha tiia niha. Ñ jia ticoro to wahachũ ñña, tina ticorore nũnũ ti tari jire. “To wahmino cjirore ti siõ sãari copapũ tiiro waharo nina ticoro”, ni tũhoturi jimare tina. Ñ ni tũhotua ticorore nũnũ ti tari jire.

32 Ñ yoa María sã cahapũ wihiro, Jesure ñũ, to dahpori cahai na tuhcuca caha sũre.

—Puhtoro, yũ bahũ to yariahto pano mũ õi jichũ tiro yariaeraboa —nire ticoro Jesure.

33 Ñ jiro ticoro judio masa ticoro mehne tarina cũhũ ti tiichũ ñño Jesu sehe tuaro cahya ñano yajeripohna tire.

34 —¿Lázaro cjirore nohopũ siõ sãari mũsa? —ni siniture Jesu.

—Ñũi taga —ni pji wahcãre tina.

35 Ti ã nichũ tũhoro Jesu tiia wahare.

36 —Lázaro cjirore Jesu tuaro cahĩri jira —nire judio masa ti basi.

37 Wiho mejeta paina tina mehne macaina sehe õ sehe nire:

—Capari ñũerarirore ñũchũ yoariro jira ahriro Jesu. ¿Ñ jiro Lázaro cũhũre to yariaborore yũhdũchũ yoaeraboari ahriro? —nire tina ti basi.

Lázaro masa wijaaha

38 Ñ jiro pari turi Jesu tuaro cahya namore. Ñ jina sã jipihtina to masa copapũ sũhi. Tí copa tãcapũ ti sahari copa jire. Tí copapũ to pjacũ cjirore siõ sãa, tãca pjiria mehne tju biha cũri jire tina.

39 —Tãcare na pjõohga —nire Jesu.

To ã nichũ tũhoro Marta yariariro cjiro wahmiono õ sehe nire:

—Puhtoro mipũ pititia dachori waha tuhsũra to yariari baharo. Ñ jiro to pjacũ cjiro Ƴrĩbiahca —nire Jesure.

40 —“Yũhũre wacũ tuaco Cohamacũ tuaare ñũcohca”, mũhũre nimahi —nire Jesu Martare.

41 To ã niri baharo tina tãcare na pjõohre. Ñ ti na pjõori baharo Jesu sehe mũanopũ ñũ, Cohamacũre õ sehe nire:

—Mai, yũhũre mũhũ tũho tuhsũhũre. Tíre mũ yoachũ masicũ wahcheja mũhũre. 42 Ñ yoa yũhũre mũhũ dachoripe ã tũhorucura. Tíre masija. Ñ masipaihta yũhũ mũ warocariro yũ jiare õre ducuina ti masihti cjihtire mũhũre ã nii nija. Tíre



“Potocã tjira”, ti nihti cjihti cũhure ã nii nija —nire Jesu to Pucurore.

43 Æ ni tuhsu Jesu tuaro sañurucure:

—Lázaro, wijaa tagá —ni sañurucure tiro.

44 To ã nichu yariariro cjiro to wamomacarine to dahpori cũhure suhti cahsari mehne ti wahmariro cjiro, to dapure suhtiro mehne ti wahmariro cjiro, masa coparu wijaa tare juna.

—Ti wahmari cjirire pjãga —nire Jesu.

Judio masa pũhtoa sehe Jesure ñaha duamaha

(Mt 26.1-5; Mr 14.1-2; Lc 22.1-2)

45 To ã masochũ ñha, payũ judio masa Maríare ñha tarina mehne macaina Jesure wacũ tuare. 46 Wiho mejeta paina sehe, tina mehne macaina sehe fariseo curua macaina cahapũ waha, sũ, Jesu to yoarire yahuri jire tinare. 47-48 Æ jia sacerdotea pũhtoa, fariseo curua macaina pũhtoa cũhũ cahmachũ, ti basi õ sehe ni durucuha:

—Jesu payũ tahari Cohamacũ tuaa mehne yoa ño mũjana. To ã yoa ñoare mari tirore ã ñũnoca mari dũcataerachũ, jipihtina masa tirore wacũ tua, tiro mehne waha pihtiaboca. Æ yoa tiro Jesure ti pũhtoro cjihto ti sõchũ ñha, Roma macaina pũhtoa sehe “Marine cohãa nina”, ni sua, ñano yoaaahca marine. Tuhsũ, Cohamacũ wũhũre cohã duti warocaahca ti yaina surarare. Mari ya dihta cũhũre maahca tina. ¿Æ jina dohse yoanahcari mipũre? —ni durucuha tina ti basi.

49 Ti ã nipachũta paio Caifa wama tirore, tí cũhmare sacerdotea bui pũhtoro jiriho tinare õ sehe ni yahuha:

—Mũsa sehe ne masierara. 50 Judio masa jipihtina mari ya cjihtire cũiro masũno to yariachũ noana. To yariaerachũ mari jipihtina judio masare cohã pahũnocaboa. Tíre mũsa masierara —niha Caifa tinare.

51 Æ nino to mũ sũro ã nino nieraha. Sacerdotea bui pũhtoro to jichũ judio masa ya cjihtire Jesu to yariahtore Cohamacũ sehe Caifare ã ni yahu dutiha. 52 Jesu yariaro judio masa dihtare yũhdũchũ yoaro taro nierare. Æ yariaro jipihtina Cohamacũ pohna ahri yahpapũ ji siteina cũhũ cũ curuata ti jihti cjihtire yariahtiro jire Jesu. 53 Æ jia tí dachoihta tina “¿Jesure dohse yoa wajãnahcari mari?” ni durucua, tirore wajã taa nimaha.

54 Tirore ti ã wajã duachũ masino Jesu payũ judio masa watoi pari turi tinino wahaerare. Æ jiro masa marieno cahacãi Efraĩ wama tiri macapũ sãre sũho wahare. Sãre tí macai sũho tjuasinire Jesu.

55 Tí pjare pascua bose nũmũri sã judio masa sã bose nũmũri cjihto mahanocã dũhsatjiãhre. Æ jia bose nũmũri panocã masa payũ paye macari macaina Jerusalẽpũ cahmachure. Pascua macaare ti chũhto pano Cohamacũ yare yoaa taa ti ñaa buhiri cosaa taa nire. 56 Tí pjare tina Jesure

maca niri jire. Ñ jia Cohamacu wuhurpu jiina õ sehe ni durucuha:

—¿Bose numurine ñno taerabocari Jesu, musa tuhotchur?
—ni durucuha tina ti basi.

57 Ñ jia sacerdotea puhto, fariseo curua macaina cñhu õ sehe ni yahu dutiha masare:

—Jesu to jirore musa masina, yahuga sãre. Tirore ñahana tana nija —niha puhto masare.

María Jesu dahporire me sitia mehne pio payore

(Mt 26.6-13; Mr 14.3-9)

12 ¹ Jesu sã to buheina mehne Betaniapu sã suri baharo pascua dachori seis dachori waro duhsasinire. Lázaro Jesu to masoriro cjiro tí maca macariro jire. ² Sã suri baharo Jesu cñhu ya chua cjihtire yoare paina. Ñ yoa Lázaro, Jesu, sã mehne mesai nuju suhi. Sã ã nuju suri baharo Marta chure payore sãre. ³ Tuhsu, María me sitia sere nardo wama tidu maca sere cñ kilo dacho macai na ta, Jesu dahporire pio payore. Pio payo tuhsu to pjoari mehne tju cosare. To ã pio payori baharo tí wuhu noano me siti sahsea wahare. ⁴ Sã mehne macariro, Jesure ñu tuhtiinare ñohtiuro Juda Iscariote sehe õ sehe nire:

⁵ —¿Dohse yoaro ahricoro ã yoa sitejari? Tíre ticoro duaboa. Ñ duaro tres cientos dachori posa dahrari wapa wapataboa. Ñ jiro ticoro tí niñerure pjacuinare waboa —nire tiro.

⁶ Juda sehe pjacuinare yoadoho duaerare. Tiro sã niñerure wihbobasariro jiparota yacariro jire. Tuhsu, tiro sã niñerure cãa tahari na mujare. Ñ jiro “Tí niñerure naihtja” nino, ã nire Maríare tiro.

⁷ To ã nichu tuhoro õ sehe nire Jesu:

—Ñ niecu tjiga ticorore. To me sitiare yuhure to duharire yuhure pio payore, yuhure masa copapu ti siõ sãahto pano yu pjacure cahnoyuro. Pjacuina sehe musa mehne ã jirucuhca. Ñ jina tinare wa masina musa. ⁸ Yuhu sehe ahri yahparure musa mehne ã jirucusi —nire Jesu.

Sacerdotea puhto Lázarore wajã duaha

⁹ Ñ yoa Jesu Betaniapu to jichu tũho sã coyera judio masa payu tirore ñua tare. Tiro dihtare ñua taa nierare. Lázaro yariariro cjirore Jesu to masorirore tiro cñhure ñua taa nire.

10 Ti ñua sũrire masia sacerdotea pũthoa Lázaro cũhure wajã duare. 11 Lázaro yariariro cjiro Jesu to masoriro jichũ ñua payũ masa Jesure wacũ tuare. To ã masochũ ñua payũ judio masa ti sacerdotea ya buhea sehere duhunocari jire. ã ti duhuchũ ñua sacerdotea pũthoa sehe sua yũhdũa Lázarore wajã duare.

Jerusalẽpũ sũha Jesu

(Mt 21.1-11; Mr 11.1-11; Lc 19.28-40)

12 Pascua bose nũmũrine ti yoachũ payũ masa Jerusalẽpũ ñua wahari jire. Pa dachoi Jerusalẽpũ Jesu to tahto cjihtore masa tũhori jire. 13 ã jia pja pũ sahnarine na wahcã, tireore piti bocaã wahare. ã piti bocaã õ sehe ni sañurucure tina:

—Ahrirore wahche payojihna. Ahriro Cohamacũ to warocariro noano yũhdũjaro. Ahriro Israe yahpa macaina mari pũthoro tjira —ni sañurucure tina.

14 Jesu burrocã to bocariro bui pisare. “Õ seheta yoarohca”, ni joaã tiha Cohamacũ yare ti joari tjui:

15 “Jerusalẽ wama tiri maca macaina, cuiena tjiga mũsa.

Ñũga. Mũsa pũthoro burrocã bui pisa tara”, ni yahuha Cohamacũ yare ti joari tjui.

16 “To ã ni joari Jesure nino nica” ni, sã to buheina noano masierasinihi. ã masierasinipanahta mũanopũ Jesu to mũjari baharo sã ti joari cjiire wacũ boca tũho ñaha masihi. Õ sehe ni tũhotuhi: “Cohamacũ yare ti joari tju sehe Jesure yahuro nimaha. ã jia Cohamacũ yare ti joari tju to niriro seheta yoare masa Jesure”, ni tũhotu, sã masihi.

17 Lázarore ti siõ sãari copapũ jirirore Jesu to pisuchũ tireore to masochũ ñũrina cjiri yahure masare. 18 ã jia Lázarore Jesu masorire ti tũhori baharo masa payũ Jesure ñua tare. 19 Ti ã tachũ ñua fariseo curua macaina ti basi õ sehe niri jire:

—Jipihtina Jesu yaina dihta wahaa nina mipũre. ã jina mari dohse yoa masieraãa tinare —niri jire fariseo curua macaina ti basi.

Mahainacã griego masa Jesure maca taha

20 ã yoa bose nũmũri Cohamacũre ño payoa taina mehne macaina mahainacã griego masa jire. 21 ã jia tina Felipe cahapũ wihiri jire. Felipe sehe Betsaida wama tiri maca Galilea



yahpai jiri maca macariro jire. Ñ jia tiro cahapũ wihirina õ sehe niri jire tirore:

—Jesure ñũ duaja sã —niri jire tina.

22 Ti ã nichũ tũhoro Felipe Andrepũre tíre yahuro wahari jire. Ñ jia tina pũaro Jesure yahure. 23 Ti ã yahuri baharo Jesu tinare õ sehe ni yahure:

—Yũhũ masũno Cohamacũ warocariro jija. Yũhũre jipihtina ti ño payohti pja mipũre jirota nina. Mipũre yũ yariahti pja jirota nina. 24 Potocãta mũsare yahui nija. Toari yapare yahrapũ mari yaerachũ, tí yapare mari toaerachũ cũ yapata tjuarohca. Ñ jiro tí yapare mari yari baharo dicha tirohca. (Tó seheta yũ yariari baharo yũhũre masa copapũ ti siõ sãari baharo payũ masare Cohamacũ mehne ã jirucuhtina jichũ yoaihca yũhũ.) 25 Ahri yahpai mũsa jiare pjiro tũhotuboca mũsa. Ñ tũhotuna Cohamacũre wacũerana, pichacapũ wahanahca mũsa. Ahri yahpai mũsa jiare ã tũhotunocahna, Cohamacũ mehne ã jirucunahca. 26 Yũ yare yoa duana, yũ buheare noano tũhoga mũsa. Mũsa ã yoana mũsa cũhũ yũ jihtopũre jinahca. Yũ yare yoarirore yũ Pũcũ sehe wahchea mehne ñũnohca —nire Jesu.

Jesu to yariahtore yahuha

27 Ñ ni tuhsũ õ sehe ni namore:

—Mipũre yũhũ ñano yajeripohna tija. ¿Yũ Pũcũre dohse niihcari yũhũ? “Mai, yũ ñano yũhdũhtore yoai tjia yũhũre”, ¿nibocari yũhũ? Tíre nieraja yũhũ. Ñano yũhdũhtiro cjihtota ahri yahrapũre tahi. Ñ yoa yũ ñano yũhdũhti pja mipũre jiro nina —ni yahure Jesu sãre to buheinare.

28 Ñ yoa õ sehe nire to Pũcũrore:

—Mai, mũ tuariro jiare mipũre ñoga masare —nire Jesu to Pũcũrore.

To ã nichũ mũanopũ durucuro coa tare:

—Tuariro yũ jiare masare ño tuhsũhi. Mipũre ã jicũ pari turi ñoihca masare —nino coa tare.

29 To ã nino coa tachũ tũhoa tói ducuina masa payũ õ sehe nire:

—Wũpo jica ã coa taro —nire masa.

—Anjo Jesure yahuro nire —nire paina masa.

30 Ñ sehe nire Jesu sehe:

—Muanopu yuhure tuho dutiro ã nino coa taerare. Mûsa sehere tuho dutiro ã nino coa tare. **31** Mipure ahri yahpa macaina ti ñano yoari buhirire buhiri dahrerohca tinare. Ahri yahpa macaina ti puhtore watinore cohãnohca Cohamacu. **32** Æ jicu yuhure crusapu ti wahcõ dapochnu payu masare yuhu mehne macaina ti wahachu yoaihca yuhu —nire Jesu.

33 Æ nino “Crusapu to variahtore”, yahuro nire Jesu masare. **34** To ã nichu tuhoa masa sehe tirore õ sehe nire:

—Cohamacu yare ti joari tjui õ sehe nina: “Cristo jipihitia dachoripe jirohca”, ni joaa tiha. ¿To ã ni joachu mûhure masunore Cohamacu warocaritore dohse jiro baro mûhure crusapu wahcõ dapoahcari masa? ¿Masuno Cohamacu warocariro noa jijari tiro? —ni siniture tina.

35 Ti ã nichu õ sehe ni yuhtire Jesu:

—Buhriaro to ñu masichu yoaro seheta jicu masare Cohamacu yare noano masichu yoaja yuhu. Baharo curerocã mûsa mehne jisi yuhu. Mûsare yu buhechu mipure tuhoga ñaare mûsa yoerahti cjihtire Cohamacu mehne mûsa ã jirucuhti cjihtire. Yu buheare tuhoeraina nahitianoï tiniina yoaro seheta ti wahahtore masierara. **36** Yuhu buhriaro yoaro sehe jiro tjija. Æ jicu mûsare buhecu Cohamacu yare noano masichu yoaja mûsare. Mipure yu wahahto pano yuhure wacũ tuaga. Æ wacũ tuana yu yaina jinahca mûsa —nire Jesu.

Æ ni yahu tuhsu duhti wahcãa wahare.

Judio masa Jesure cahmaeraha

37 Payu tahari Cohamacu tuua mehne tinare Jesu to yoa ñopachuta judio masa payu tirore ne tuho duaerare.

38 Cohamacu yare ti joari tjui Isaia cjiro to joariro seheta ã yoaa nire tina. Õ sehe ni joaa tiha Isaia cjiro:

“Cohamacu, mû buheare sã yahuchu masa tuho duaerare.

Mû tuare tinare mû yoa ñopachuta, tíre ‘Potocã jierara’, nire tina”,

ni joaa tiha Isaia cjiro.

39 Ti ã tuho duaerachu ñuno Cohamacu tinare masierachu yoare. Tí cûhure Isaia cjiro õ sehe ni joaa tiha tjoa:

40 “Capari ñueraina yoaro sehe jiina jichu yoaa tiha Cohamacu tinare.

Æ yoa to yare masierachu yoaa tiha tinare.

Ñ jia to tuaare ñupahta tina ti ñaŕire tũho ñahaerara.
 Ñ jia to buheare tũhopahta tíre tũho ñahaerara tina.
 Cohamacu ya buheare masia, ti ñaa yoari buhirire
 cohã dutiboa.

Ñ jiro tinare yũhdũchũ yoaboa tiro”,
 ni joaa tiha Isaia cjiro Cohamacu yare ti joari tjuí. ⁴¹ Ñ ni
 joaro Isaia cjiro Cristo tuaare masino to niriro seheta Cristore
 yahu joaa tiha tjoa.

⁴² Paina Jesure ti cahmaerapachũta judio masa, sã puhtoa
 mehne macaina cũhũ payũ Jesure wacũ tuaa, tirore cahmare.
 Ñ cahmapahta tina fariseo curua macainare cuia painare
 “Jesu mehne sãahi”, ni yahu duaerare. Tíre ti yahuchũ tũhoa
 Jesure ti cahmari buhiri judio masa sã buheri wũhũpũ tinare
 sãa dutieraboa fariseo curua macaina sehe. ⁴³ Cohamacũre
 wahchechũ yoa duapahta tí yũhdoro fariseo curua macaina
 sehene wahchechũ yoa duare Jesure cahma dũcaina. Ñ jia tina
 “Jesu yaina wahahi”, ni painare yahu duaerare.

Jesu yahuare ti tũho duaerari buhiri masa buhiri tiahca

⁴⁴ Ñ yoa Jesu tuaro sañurucu, õ sehe ni yahure:

—Yũhũre wacũ tuariro, yũhũ dihtare wacũ tuaerara.
 Yũhũre warocariro cũhũre wacũ tuara tiro. ⁴⁵ Tuhsũ, yũhũre
 masiina yũhũre warocariro cũhũre masina. ⁴⁶ Buhriaro to ñũ
 masichũ yoaro seheta ahri yahpũ Cohamacu yare masichũ
 yoai tai nihi yũhũ. Ñ jicũ Cohamacu yare masare masichũ
 yoaja. Nahitianoi wahariro yoaro sehe jiriro ñaare yoarucura.
 Yũhũre wacũ tuariro tiro yoaro sehe yoasi. Yũhũre wacũ
 tuariro quihõno tũhorohca. ⁴⁷ Paina yũ yahuare tũhopahta
 yũ niriro seheta yoerara. Ti ã yoerapachũta yũ yahuare
 ti yoerari buhirire buhiri dahresi yũhũ sehe tinare. Ahri
 yahpũre buhiri dahrei tai nierahi yũhũ. Ahri yahpa
 macainare pichacũpũ wahaborinare yũhdũchũ yoah tiro cjihto
 tai nihi yũhũ. ⁴⁸ Yũhũre cahmaerainare, yũ yahua cũhũre
 cahmaerainare buhiri dahrea jiahca. Tina yũ yahuare ti
 tũhoerari buhiri ahri yahpa pihtiri dachoi buhiri tiahca.
⁴⁹ Yũhũ yũ mũ sũro yahueraja. Yũ Pũcũ yũhũre warocariro
 sehe yũhũre yahu dutire. Ñ jia yũ yahua sehe to ya durucua
 jira. ⁵⁰ To ya durucua “Quihõno jira” nina, Cohamacu
 mehne ã jirucunahca mũsa. Ñ jicũ yũ Pũcũ to yahu dutiriro
 seheta yahuja mũsare —nire Jesu.

Jesu to buheina dahporire cosaha

13 ¹ Ñ yoa pascua bose nũmũri panocã ahri yahpare to cohã wahcãhto cjihtore to Pũcũro cahapũ to wahahto cjihtore masire Jesu. Tuhsũ, ahri yahpa macainare to yainare tiro tuaro cahĩre tina mehne to jiro puro. Ñ cahĩrucura to yainare.

² Tĩ ñamine Jesu sã to buheina mehne sã chũchũ Juda Iscariotere Simo macũnore Jesure ñũ tuhtiinare ño duti tuhsũri jire watĩno sehe. ³ Tuhsũ, to Pũcũro Cohamacũ Jesure jipihtina bui to pũhtoro sũrire masire Jesu. Ñ yoa Cohamacũ cahapũ to tari cjirire, baharo mũanopũ to mũjahti cũhũre masire. ⁴ Ñ masino wahcãrũca, to suhtiro bui macanore tjuwe na, tũre cũ tuhsũ, suhtiro cahsaro mehne to pjaro yũjũi dũhtere. ⁵ Dũhte tuhsũ, waparoĩ core pio sã, sã to buheinare sã dahporire cosa dũcare. Sãre cosa tuhsũ to dũhteri cahsaro mehne pahã cohãre sã dahporire.



6 Paina buheinare cosa wahcã, Simo Pedropure sare. To dahporire to cosahto pano Pedro sehe tireore õ sehe nire:

—Pũhtoro, ¿yũ dahporire cosai tai nijari mũhũ? —nire Jesure Pedro.

7 —Michapucacã mũhũre yũ yoahtire masierara mũhũ. ã masierapacũta baharo masiĩhca mũhũ —nire Jesu.

8 —Yũ dahporire ne cosasi mũhũ —nire Pedro.

—Mũhũre yũ cosaerachũ yũ yairo jisi mũhũ —nire Jesu.

9 —Pũhtoro, yũ dahpori dihtare cosai tjiga. Yũ dahporire, yũ wamomacarine, yũ dapu cũhũre cosaga —nire Pedro.

10 To ã nichũ Jesu piti dahre buhero õ sehe nire:

—Cũiro masũno cuhsũro to pjacũre noano tju cosa pahũona. ã jiro pari turi tireore tju cosaro cahmaerara. To dahpori dihtare cosaro cahmana. Jipihtina mũsa ñaa yoari buhirire cosarina cjiri mũsa jipachũta cũiro mũsa mehne macariro to ñaa yoari buhirire cosamahnoerariro jira —nire Jesu.

11 Jesu tireore ñũ tuhtiinare ñohtirore masire. ã masino “Cũiro mũsa mehne macariro to ñaa yoari buhirire cosamahnoerariro jira”, nire.

12 Sã dahporire cosa tuhsũ, to suhtirore sãa tuhsũ, nuju sare to dujiriroihata.

—¿Michapucacã mũsare yũ yoarire tũho ñahajari mũsa?

13 Mũsa yũhũre “Buheriro”, ni pisuna, “Pũhtoro”, ni pisuna potocãta nina nica yũhũre. Mũsare buheriro, mũsa pũhtoro potocãta jija yũhũ. 14 ã jina yũhũ mũsare buheriro, mũsa pũhtoro jipaihta mũsa dahporire cosariro yũ jichũ ñũna mũsa cũhũ mũsa mehne macaina dahporire cosaga. 15 Michapucacã mũsare cosacũ, baharo mũsa yoahiti cjihtire mũsare ñoi nija. Mũsa mehne macainare mũsa yoadohohtire ñoi nija. Mũsare yũ yoariro seheta mũsa cũhũ yoaga. 16 Potocã mũsare niita nija. Mũsa yũ cahamaca yoaro sehe jiina yũ bui jierara. Mũsare buhe duti yũ warocarina jira mũsa. ã jina yũ bui jierara mũsa. ã jicũta “Yũ yoariro seheta yoaga”, nihi mũsare. 17 Ahrire masina, yũ dutiare yoana, wahcheina jinahca mũsa.

18 Mũsare jipihtinare ã nieraja. Yũ beserinare masija yũhũ. Cohamacũ to yare ti joari tjuui to ni joariro seheta ã waharohca. “Yũhũ mehne chũrirota yũhũre wajã duare”, ni joaa tiha Cohamacũ yare ti joari tjuui. 19 To ã yoahito pano ahrire yahuyui nija mũsare. Yũhũre to ã yoari baharo “Jesuta Cristo Cohamacũ warocarirota jira”, mũsa nihti cjihtire ahrire mũsare yahuyui

nija yũhũ. **20** Potocã m̄sare niita nija. Yũ warocainare cahmariro yũhũ cũhũre cahmana tiro. Tuhsũ, yũhũre cahmariro yũhũre warocariro cũhũre cahmana tiro —nire Jesu sãre to buheinare.

Juda Jesure ñũ tuhtiinare to ñohtore yahuha Jesu

(Mt 26.20-25; Mr 14.17-21; Lc 22.21-23)

21 ã ni yahu tuhsũ Jesu tuaro cahyare. ã cahyaro õ sehe ni yahure tiro sãre:

—Potocãta m̄sare nii nija. Cãiro m̄sa mehne macariro yũhũre ñũ tuhtiinare yũhũre ñonohca —nire Jesu.

22 To ã nichũ tũhona Jesure ñohtirore masierana, sã basi cahma ñũroca õi. **23** Cãiro Jesu to buheina mehne macariro yũhũ, Jesu to cahĩriro sehe to pari wahpa dujihi. **24** Yũ ã dujichũ ñũno Simo Pedro yũhũre to wamomaca mehne yoa ño, siniture:

—¿Jesure ñohtirore diro sehere nino nibocari Jesu? Yahuga sãre —ni to wamomaca mehne yoa ño, sinitu ñũre Pedro.

25 To ã nichũ yũhũ sehe Jesu cahacã dujiriro jicũ sinitu ñũhi tirore:

—Pũhtoro, ¿dirore nii nijari mũhũ? —ni sinitu ñũhi yũhũ.

26 —Ahri pãore dahra waha na, soha yũ wahtiro sehe tirota jira yũhũre ñohtiro —nire Jesu.

ã ni tuhsũ ti pão to dahra waha narirore soha tuhsũ tíre Judare Simo Iscariote macũnore ware. **27** ã yoa pãore to ñahari baharo watĩno sehe Judare ñano yoa dutiri jire. ã jiro Jesu tirore õ sehe nire:

—Mũ yoahto cjihtore cjero yoa bahrañoga mũhũ —nire Jesu Judare.

28 To ã nichũ tũhona sã mesapũ dujiina, Jesu Judare to nirire noano tũho ñahaerahi. **29** Cãina õ sehe ni tũhotumahi: “Judá sã niñerure wihboriro jira. ã jiro bose nũmũi sã chũhti cjihtire nuchũ dutiro warocare Jesu Judare. O pjacũoinare niñerure wa dutiro niboca Jesu”, ni tũhotumahi sã cãina. **30** ã yoa Juda tí pãore ñaha tuhsũ, wijaa wahare. To wijaaari pja ñami jire.

Wahma dutiare yahuha Jesu

31 To ã wijaaari baharo õ sehe nire Jesu:

—Mipɔ pinihtare yɔhɔ masɔno Cohamacɔ warocariro yɔ tuariro yɔ jia tiare ñonohca Cohamacɔ masare. ̃ jicɔ Cohamacɔ to tuariro to jiare ñoihca yɔhɔ sehe. 32 ̃ jiro Cohamacɔ to tuaare yɔ ñochɔ tiro sehe yɔ ya tuaa cɔhɔre mipɔ pinihtare ñono taro nina. 33 Yɔ pohna yɔ cahĩina, yɔhɔre tɔhoga. Mahaa dachoricã mɔsa mehne jisiniihca. Yɔ wahari baharo yɔhɔre macanahca mɔsa. ̃ jicɔ mari coyea judio masare yɔ niriro seheta mɔsa cɔhɔre nija. “Yɔ wahahtore mɔsa sehe waha masierara”, tinare yɔ niriro seheta mɔsa cɔhɔre ̃ ni yahuja. 34 Wahma dutiare mɔsare yahuihtja. Mɔsa mehne macainare cahĩga mɔsa. Mɔsare yɔ cahĩriro seheta, mɔsa mehne macainare cahĩga. 35 ̃ jina mɔsa mehne macainare mɔsa cahĩchɔ ñɔa yɔ yaina mɔsa jiare masiahca paina —nire Jesu sãre.

“Jesure masieraja”, Pedro to nihto cjihtore yahuha Jesu
(Mt 26.31 -35; Mr 14.27-31; Lc 22.31 -34)

36 To ̃ nichɔ Simo Pedro Jesure ̃ sehe ni sinitu ñɔre:

—Pɔhtoro, ¿nohorɔ wahaihcarɔ mɔhɔ? —nire Pedro.

—Yɔ wahahtopɔre mipɔre yɔhɔ mehne waha masierara mɔhɔ. Mipɔre waha masierapaihta baharo yɔ cahai wahacɔhca —nire Jesu Pedore.

37 —Pɔhtoro, ¿dohseacɔ mipɔre mɔhɔ mehne waha masierabocari yɔhɔ? Yɔhɔre ti wajã duapachɔta mɔhɔre ne duhɔsi yɔhɔ —nire Pedro Jesure.

38 —¿̃ tjijari? ¿Mɔhɔre ti wajã duapachɔta, mɔhɔ yɔhɔre duhueraihcarɔ? Potocãta mɔhɔre nii nija. Caraca to duhto pano “Jesure masieraja”, niihca mɔhɔ painare. Tia taha ̃ niihca mɔhɔ —nire Jesu Pedore.

Jesu Cohamacɔ cahapɔ wahari maha yoaro sehe jira

14 ¹ Baharo Jesu sãre ̃ sehe ni yahure:
—Ne cahya pjiro tɔhotuena tjiga. Cohamacɔre wacɔ tuaga. ̃ jina yɔhɔ cɔhɔre wacɔ tuaga. “Cohamacɔ mehne yɔhdɔnahca”, ni tɔhotuga tirore. Yɔhɔ cɔhɔre ̃ta ni tɔhotuga mɔsa. ² Yɔ Pɔcɔ to jiropɔre payɔ wɔhɔse jira. Mɔsa jihto cjihtore cahnoyui wahai nija. Tí potocã tjira. ̃ jicɔ mɔsare tíre yahuja. ³ ̃ jicɔ mɔsa jihto cjihtore cahno tuhsɔ, ̃pɔta pari turi majare tjua taihtja yɔhɔ. ̃ jina tói yɔ jiroita mɔsa

cũhũ jinahca tjoa. 4 Mipũre yũ sũhtopũre wahari mahare masi tuhsũra mũsa —nire Jesu sãre to buheinare.

5 —Pũhtoro, mũ sũhtore masieraja sã. ¿Ã jina dohse yoa mũ wahari mahare masinahcari sã? —ni sinitu ñũre Toma Jesure.

6 To ã ni sinituchũ tũhoro Jesu sehe õ sehe ni yũhtire:

—Yũhũ Cohamacũ cahapũ wahari maha yoaro sehe jiriro jija. Cohamacũ cahapũ wahachũ yoariro, potocã yahuriro, ã catirucuchũ yoariro jinocaita nija yũhũ. ã jia yũ yaina dihta yũ Pũcũ cahapũ wahaahca. 7 Panopũ yũhũre masina, yũ Pũcũ cũhũre masiboa mũsa. Mipũre tirore ñũre mũsa. ã jina tirore masi tuhsũra mũsa —nire Jesu sãre.

8 To ã nichũ Felipe sehe õ sehe nire:

—Pũhtoro, mari Pũcũre ñoga sãre. Tó purota ñũ duaja sã —nire tiro.

9 To ã nichũ Jesu õ sehe ni yahure:

—Felipe, ¿yoari pja yũhũ mehne jipaihta, mũhũ masierasinihari yũhũre? Yũhũre ñũriro yũ Pũcũ cũhũre ñũ tuhsũre. ã jicũ “Mari Pũcũre ñoga sãre” nicũ, ¿dohseacũ ã nijari mũhũ yũhũre? 10 Yũhũ yũ Pũcũ mehne pũaro jipanahta cũirota jija. ¿Tĩre “Potocã jierara”, niimeje nijari mũhũ? Mũsare yahucũ yũ mũ sũro yahui nieraja. Yũ Pũcũre yahubasai nija. ã jiro tiro yũhũ mehne jiriro to tuaa mehne yoa ñona. 11 Yũhũ yũ Pũcũ mehne pũaro jipanahta cũirota jija. Tĩre “Potocã tjira”, ni wacũga mũsa. Tĩre “Potocã tjira” nierana, Cohamacũ tuaa mehne yũ yoa ñoare wacũna, yũ Pũcũ mehne yũ cũirota jiare “Potocã tjira”, ni wacũga mũsa. 12 Potocãta mũsare nii nija. Yũhũre wacũ tuariro yũ yoariro seheta yoarohca. ã yoa tiro yũ yũhũdoro yoarohca. Yũ Pũcũ cahapũ tjuaai tai nija mipũre. ã jiro yũhũre wacũ tuariro yũ yũhũdoro Cohamacũ tuaa mehne yoa ñonohca. 13 ã jicũ yũhũre wacũ tuaina ti sinino purota yoaihca. ã yoacũ yũ Pũcũ to tuariro jiare ñoihca. 14 Yũhũre wacũ tuaina mũsa jichũ mũsa sinino purota yoaihtja —nire Jesu.

“Espíritu Santore mũsare warocaihtja”, ni yahuha Jesu

15 ã ni tuhsũ õ sehe ni namore:

—Yũhũre mũsa cahĩna, yũ dutiare noano yoanahca. 16 Yũ Pũcũre sinibasaihtja. Yũ ã sinibasachũ yũ Pũcũ sehe paioore mũsare yoadohohtirore mũsare warocarohca. ã jiro tiro mũsare

yoadohohtiro sehe jipihitia dachoripe m̄sa mehne ã jirucurohca. 17 Tiro potocãta yahuriro Espíritu Santo tjira. Ahri yahpa macaina yũhũre cahmaeraina sehe tirore masierara. Æ jia tirore cjũa masierara. Tirota m̄sa mehne ã jirucurohca. Æ jina tirore masina m̄sa.

18 'M̄sare cohãsi yũhũ. M̄sa mehne jihtiro cjihto tjua taihca yũhũ tjoa. 19 Wiho mejeta mahanocã dũhsara yũ wahahto cjihto. Yũ wahari baharo ahri yahpa macaina yũhũre wacũ tuaeraina yũhũre pari turi ñũsi. M̄sa sehe yũhũre ñũnahca. Yũ catiriro jichũ m̄sa cũhũ jipihitia dachoripe Cohamacũ mehne catirucunahca. 20 Tí dachoi yũ tjua tahti dachoi yũhũ yũ P̄scũ mehne cũirota sã jichũ masinahca m̄sa. Æ jina yũhũ mehne macaina m̄sa jichũ m̄sa mehne macariro yũ jichũ cũhũre masinahca m̄sa. 21 Yũ dutiare yoariro yũhũre cahĩirota jira. Æ jiro yũhũre cahĩirore yũ P̄scũ sehe cahĩnohca. Æ jicũ yũhũ cũhũ yũ dutiare yoarirore cahĩihca. Æ yoa yũ jia tiare noano masichũ yoaihca tirore —nire Jesu sãre to buheinare.

22 Sã mehne macariro paio Juda wama tiroro jire. Juda Iscariote Jesure ñũ tuhtiinare ñohtiro jierare tiro. Pairo Juda jire. Æ jiro tiro Jesure õ sehe ni siniture:

—Pũhtoro, ¿dohse yoajjari mũhũ tinare ã nicũ? ¿Ahri yahpa macainare mũhũre masichũ yoeracũ, dohse yoacũ sã dihtare mũhũre masichũ yoaihcarĩ mũhũ? —ni siniture Juda.

23 To ã nichũ tũhoro Jesu tirore õ sehe ni yahure:

—Yũhũre cahĩina, yũ dutiare noano yoaa nina. Ti ã yoachũ yũ P̄scũ sehe tinare cahĩnohca. Æ jina tina mehne jina tanahca sã. 24 Yũhũre cahĩerariro yũ dutiare yoerara. Tuhsũ, yũ yahua m̄sa tũhori cjiri sehe yũ ya yahua jierara. Yũhũre warocariro ya yahua sehe jira. Tiro yũ P̄scũ tjira.

25 'M̄sa mehne jisinicũ ahrire m̄sare yahusinii nija.

26 Baharo yũ sinibasachũ yũ P̄scũ Espíritu Santore warocarohca m̄sare. Tiro Espíritu Santo sehe m̄sare yoadohohtiro jiro, m̄sare buhe pahĩnohca tiro. Æ yoa m̄sare yũ yahuri cjirire m̄sare wacũchũ yoarohca tiro.

27 'M̄sare noano jichũ yoaihca yũhũ. Yũhũ yũ noano jiriro seheta noano jichũ yoaihca m̄sare. Ahri yahpa macaina ti mahĩoperiro seheta yoasi yũhũ m̄sare. Yũhũ pinihta potocãta noano jichũ yoaihca m̄sare. Cahya pjíro wacũena tjiga m̄sa. Æ jina cuiena tjiga m̄sa. 28 “Yũhũ wahaihca. Æ jicũ m̄sa

mehne jihtiro cjihto tjua taihtja tjoa”, mäsare yu ã ni yahuchü tüho tuhsüre müsa. Tíre tühona, wahcheboa müsa. Yühüre müsa potocã cahĩrina jina, wahcheboa müsa. Yu Pücu sehe yu yühodoro tuara. ã jina tiro cahapü yu wahahto cjihtore müsa masiri baharo yühüre cahĩna, wahcheboa müsa. ²⁹ Yühüre müsa wacü tuahti cjihtire yu wahahtore yahuyui nija mäsare.

³⁰ 'Ahri yahpa macaina pühtoro wafino sehe tara mipüre. To ã tachü yühü müsa mehne yu durucu batoahti pja mahanocã dühsara. Tiro sehe yühüre yühdürcu masierara. ³¹ Wiho mejeta yühüre yu Pücu to dutiriro seheta yoaja yühü. ãta yoaja yühü yu Pücüre yu cahĩare ahri yahpa macaina ti masihti cjihtire. Wahcãrucaga. Basa wahana —nire Jesu säre to buheinare.

Jesu secü yoaro sehe jiriro jira

15 ¹ Baharo piti dahre buhero säre õ sehe nire Jesu: —Yühü potocãta secü yoaro sehe jiriro jija. Yu Pücu sehe secüre ñü wihboriro yoaro sehe jiriro jira. ² Yu yaina secü düpüri yoaro sehe jiina yühü mehne macainata jira. Dicha mariea düpürire secüre ñü wihboriro to paha cohãriro seheta yu Pücu to cahmaare yoaerainare cohãna. Dicha tia düpürire secüre ñü wihboriro to cahnoriro seheta yu Pücu to cahmaare yoinare yoadohorohca tiro “Yu cahmaare yoa namojaro”, nino. ³ Yu yahuaire tühona, “Potocã tjira”, nire müsa. ã jiro yu Pücu müsa ñaa yoari buhirire cohã tuhsüre. ⁴ Yühü mehne macaina jiga müsa. ã jii müsa mehne jiihca. Secü düpüri secü mehne wahã süera düpüri jia, tí düpüri sehe dicha mariahna. Tó seheta yühü mehne macaina jierana yu Pücu cahmaare yoa masierara müsa.

⁵ Yühü secü yoaro sehe jiriro jija. Müsa sehe tü düpüri yoaro sehe jiina jira. Yühü mehne macariro mehne yu jichü dicha tia düpüri yoaro sehe tiro yu Pücu cahmaare yoara. Yühü mehne macaina jierana yu Pücu cahmaare yoa masierara müsa. ⁶ Ñaa düpürire to cohãboriro seheta yühü mehne macaina jierainare yu Pücu cohãnohca. Tí düpüri ñaia wahachü secüre ñü wihboriro tí düpürire na cahmachu pichacapü jü cohãnohca. ãta yorarohca Cohamacü yühü mehne macaina jierainare.

⁷ Yühü mehne macaina jina, yu buheare boeraboca müsa. ã boerana, müsa cahmano purota siniga. ã jicü müsa sinino

purota yoabasaihtja. **8** Yɛ Pɛsɛ cahmaare yoaina mɛsa jichɛ ñɛa “Jesu yaina jira ahrina”, ni masiahca masa. **Ǻ** jia mɛsare ñɛa yɛ Pɛsɛre ño payoahca. **9** Yɛ Pɛsɛ yɛhɛre to cahĩro sehetɛ mɛsare yɛhɛ cɛhɛ cahĩa tihi. Yɛ cahĩina jirucuga mɛsa. **10** Yɛ cahĩina jirucuina yɛ dutiare yoara. Yɛ Pɛsɛ to dutiare yoaja yɛhɛ. **Ǻ** yoacɛ to cahĩro jirucuja yɛhɛ. Tó sehetɛ mɛsa cɛhɛ yɛ dutiare yoana yɛ cahĩina jirucunahca mɛsa.

11 'Ahrire mɛsare yahuhi yɛhɛ mehne mɛsa noano wahchehto cjihtore. **Ǻ** jina tuaro wahchenahca mɛsa. **12** Ǿ sehe dutija mɛsare: Mɛsare yɛ cahĩro sehetɛ mɛsa mehne macaina cɛhɛre cahĩga. **13** Cɛiro masɛno tiro mehne macariro yaro jiborirore yariaro tiro mehne macarirore tuaro cahĩna, paina ti cahĩro yɛhdoro. **14** **Ǻ** jina yɛ dutiare yoana yɛhɛ mehne macaina jira mɛsa. **15** Potocáta yɛhɛ mehne macaina waro jira mɛsa. Mɛsa **Ǻ** jiina jichɛ jipihtia yɛ yoarire yahuja mɛsare. Cahamacɛno to pɛhoro yoarire masierara tiro. **Ǻ** jicɛ “Yɛ cahamaca wiho jiina jira mɛsa”, mɛsare nieraja. Yɛ Pɛsɛ yɛhɛre to yahurire mɛsare yahu pahñohi. **Ǻ** yahucɛ “Yɛhɛ mehne macaina jira mɛsa”, mɛsare nija mipɛre. **16** Mɛsa sehe yɛhɛre ne beserare. Yɛhɛ sehe mɛsare besei yɛ Pɛsɛ cahmaare mɛsa yoachtina cjihtire. Mɛsa **Ǻ** yoachɛ mɛsa yoaa ne wiho waro jisi. **Ǻ** jia mɛsa yoaa **Ǻ** jirucuahca. Mɛsa **Ǻ** yoachɛ yɛhɛre mɛsa wacɛ tuachɛ yɛ Pɛsɛre mɛsa sinino purota tiro mɛsare warohca. **17** Ahrire mɛsare dutija yɛhɛ: Mɛsa mehne macainare cahĩga mɛsa —ni yahure Jesu.

Jesure to yaina cɛhɛre ahri yahpa macaina ñɛ tuhtira

18 **Ǻ** yoa tiro Ǿ sehe ni yahu namore:

—Ahri yahpa macaina mɛsare ti ñɛ tuhtichɛ ñɛna ahrire wacɛga mɛsa: Mɛsare ti ñɛ tuhtihto pano yɛhɛ sehere ñɛ tuhti dɛcare tina. **19** Cohamacɛre cahmaeraina mɛsa jisnichɛ, tina mehne macainare ti cahĩro sehetɛ mɛsa cɛhɛre cahĩboa tina. Ahri yahpa macaina mɛsa jisnichɛ mɛsare besei. **Ǻ** jina mipɛre ahri yahpa macaina waro jierara mɛsa. Mɛsa **Ǻ** jierachɛ ñɛa ahri yahpa macaina mɛsare ñɛ tuhtira. **20** “Yɛ yaina jina mɛsa yɛ bui jierara”, mɛsare yɛ niri cjirire wacɛga mɛsa. **Ǻ** yɛ docai jiina jina yɛ ñano yɛhdɛriro sehetɛ ñano yɛhdɛnahca mɛsa cɛhɛ. Yɛhɛre ñano yoarinata mɛsa cɛhɛre ñano yoahca. Yɛ buhechɛ yɛhtirinata mɛsa buhechɛ cɛhɛre yɛhtiahca tiɛa. **21** Ahri yahpa macaina yɛhɛre warocarirore masierara. **Ǻ** jia

yũhũre wacũ tuaina mũsa jichũ ñna tina ñano yoahca mũsa cũhũre.

22 ʼTinare yũ buhei taerachũ yũhũre ti cahmaerari buhiri buhiri mariaboa. Mipũre tinare yũ buheri baharo “Ñaa buhiri mariahna sãre”, ni masierara tina. 23 Yũhũre ñũ tuhtiro yũ Pũcũ cũhũre ñũ tuhtira. 24 Cohamacũ to tuaa mehne paina ti ne yoerarire yoa ñohi. ʼ Ȧ yoa tinare tíre yũ yoa ñoerachũ tinare ñaa buhiri mariaboa. Cohamacũ tuaa mehne yũ yoa ñoare ti ñũri baharo yũhũre yũ Pũcũ cũhũre ñũ tuhtira tina. 25 Ȧ ñũ tuhtia Cohamacũ yare ti joari tjui dóipũta to ni joariro seheta yoaa nire tina. Ȧ sehe ni joaa tiha: “Tinare yũ ñano yoerapachũta yũhũre ñũ tuhtire tina”, ni joaa tiha dóipũta Cohamacũ yare ti joari tjui.

26 ʼYũ baharopũ mũsare yoadohohtiro, yũ Pũcũ mehne jiriro mũsare yũ warocahtiro Espíritu Santo tjira. Tiro potocãta yahurohca jira. Ȧ jiro tiro taro yũ jia tiare yahurohca mũsare. 27 Masare yũ buhe dũcachũpũta mũsa cũhũ dachoripe yũhũ mehne Ȧ jirucure. Ȧ jina mũsa cũhũ yũ jia tiare yahunahca painare —ni yahure Jesu.

16 1 Ȧ ni tuhsũ sãre Ȧ sehe ni yahu namore:
—Baharo yũ buheare yũhũ cũhũre mũsa cohãerahti cjihtire ahrire jipihtiare yahuhĩ mũsare. 2 Judio masa mari buhea wũhũsepũ mũsa sãa duachũ sãa dutisi mũsare yũ yaina mũsa jiri buhiri. Ȧ jia pa teherũ mũsare wajãa, “Cohamacũ cahmaare yoana nija”, ni tũhotuahca paina. 3 Yũ Pũcũre, yũhũ cũhũre tina masierara. Ȧ masieraa mũsare ñano yoahca tina. 4 Ȧ jina mũsare ñano ti yoachũ ñũna, “Ti Ȧ sehe yoahito panota Jesu yahu tuhsũre sãre”, ni wacũnahca mũsa. Mũsa Ȧ ni wacũhti cjihtire mipũre ahrire yahu mũhtai nija mũsare —ni yahure Jesu.

Espíritu Santo to yoahitire yahuha Jesu

Ȧ ni tuhsũ Ȧ sehe ni yahu namore Jesu:

—Wahmanopũre mũsa mehne jicũ ahrire mũsare yahuerahi. 5 Mipũ sehere yũhũre warocariro cahapũ wahaihca wahai tai nija. “¿Nohopũ wahaihcarĩ mũhũ?” yũhũre ni, ne cũiro barota sinitu ñũerara mũsa. 6 Ȧ sinitu ñũerapanahta yũ wahahtore mũsare yũ yahu mũjachũ mũsa ñano yajeripohna tira. 7 Mũsare potocãta yahuhĩ nija. Yũ wahari baharo mũsare noanocanhca. Yũ mũanopũ wahaerachũ mũsare yoadohohtiro sehe taeraboa.

Wahacũ m̄sare tirore warocaihtja yũhũ. **8** Yũ ã warocachũ tiro tarohca. ã wihiro ahri yahpa macaina ñaa yoaina ti ñaa buhiri tiare tinare masichũ yoarohca tiro. Noano jia tia cũhũre buherohca tiro masare. Tuhsũ, Cohamacũ masare to buhiri dahrehto cũhũre masichũ yoarohca masare yoadohohtiro sehe. **9** Yũhũre wacũ tuaeraina jira ahri yahpa macaina. ã jiro yoadohohtiro sehe masa ñaa yoaina ti ñaa buhiri tiare tinare masichũ yoarohca. **10** Yũ Pũcũ cahapũ wahaihca. Yũ ã wahari baharo m̄sa yũhũre ne ñũsinisi. ã jiro noano jia tia cũhũre masichũ yoarohca yoadohohtiro sehe. **11** Ahri yahpa macaina pũhtoro watĩnore Cohamacũ buhiri dahre duti tuhsũre. ã jiro Cohamacũ masare, watĩno mehne macainare to buhiri dahrehti cũhũre masichũ yoarohca yoadohohtiro sehe.

12 Pjĩro jira m̄sare yũ yahuhti cjihti. Wiho mejeta m̄sa sehe yũ yahu pahñochũ, tũho ñaha pahñoeraboa. **13** ã jiro potocã jiare yahuriro Espĩritu Santo sehe m̄sare quihõno jiare yahu pahñono tarohca. Tiro to m̄sũro m̄sare yahusi. Yũ Pũcũ tirore to yahu dutirire tiro yahurohca m̄sare. ã yoa “Baharopũ õ sehe waharohca”, ni yahuyurohca tiro sehe m̄sare. **14** ã yoa yũ yare m̄sare tiro yahurohca. ã yahuro yũhũre ño payochũ yoarohca m̄sare. **15** Jipihtia yũ Pũcũ ya yũ ya cũhũ jira. ã jicũ “Espĩritu Santo sehe yũ yare yahurohca m̄sare”, nihi m̄sare —ni yahure Jesu.

**“Cahyaina jipanahta baharo wahchenahca m̄sa”,
ni yahuha Jesu**

16 ã ni tuhsũ õ sehe ni yahu namore:

—Mahanocã baharo yũhũre ñũsi m̄sa. ã jina baharocãta m̄sa yũhũre ñũnahca tjoa —nire Jesu sãre to buheinare.

17 To ã nichũ tũhona, sã sehe mahainacã õ sehe ni durucui sã basi:

—“Mahanocã baharo yũhũre ñũsi m̄sa. ã jina baharocãta m̄sa yũhũre ñũnahca tjoa” nino, ¿dohse nino ã niri marine? ã yoa “Yũ Pũcũ cahapũ wahaihca” nino, ¿dohse jiro baro marine ã niri tiro? **18** “Mahanocã” nino, ¿dohse nino ã niri tiro? To yahurire noano tũho ñahaeraja mari —ni durucui sã basi.

19 Sã ã ni durucuchũ Jesu tirore sã sinitu duarire masino, sãre õ sehe ni yahure:

—“Mahanocā baharo yuhũre ñusi m̄sa. Ā jina baharocāta yuhũre ñnahca tjoa”, ¿yũ niri c̄jirire sinitu duajari m̄sa? ¿T̄ire yũ nirire tũho ñahaerajari m̄sa? ²⁰ Potocāta m̄sare nii nija. Yũ yariachũ ñũna m̄sa tiinahca. Tuhsũ, tuaro cahyanahca. Ā jia yuhũre ño payoeraina sehe wahcheahca. M̄sa sehe cahyaina c̄jiri jipanahta, baharo wahchenahca m̄sa. ²¹ Ō sehe jira tí: Numino niji wahc̄ono, to ñano yuhdũhto pano jira. Ā jiro ticoro tuaro cahyara. Ā cahyaparota to pohna tiri baharo ticorore pur̄irire wacũerara ticoro. Wihãrirocã ahri yahparũ to masa bajuachũ ticoro wahchera. Ā jiro ticorore pur̄irire wacũerara ticoro. ²² Tó sehta m̄sa mip̄ure cahyanahca. Baharo m̄sare ñũihca tjoa. Yuhũre ã ñũna m̄sa tuaro wahchenahca. M̄sa ã wahchechũ paina m̄sare cahyachũ yoa masisi.

²³ ’Tí dachoi yuhũre m̄sa ñũri dachoi yuhũre sinitu ñusi m̄sa. Masi tuhsũrinapũ jinahca. Potocāta m̄sare nii nija. Yuhũre m̄sa wacũ tuachũ ñũno yũ P̄uc̄ure m̄sa siniare tiro m̄sare warohca. ²⁴ Yuhũre wacũ tuaina jina, Cohamac̄ure sini masina m̄sa. Ahri dacho panoi tirore ã sinierasiniere m̄sa. Yuhũre wacũ tuatjĩahna Cohamac̄ure siniga. M̄sa ã sinichũ m̄sa sinirire m̄sare warohca, m̄sa wahche pahñohti c̄jih̄t̄ire —nire Jesu sãre.

Ñainare Jesu yuhduruc̄aha

²⁵ Ā ni tuhsũ ō sehe ni namore:

—Quit̄i mehne m̄sare yahua tihi. Ā yahupaihta baharo m̄sare quit̄i mehne yahusi yuhũ. Ā yahueracũ yũ P̄uc̄ũ sehere noano poto yahuiht̄ja m̄sare. ²⁶ Tí dachore m̄sa ya c̄jih̄t̄ire yũ P̄uc̄ure sini payosi yuhũ. Yuhũre wacũ tuana, m̄sa basi tirore sininahca. ²⁷ M̄sa yuhũre cahĩna. Ā jina yũ P̄uc̄ũ caharũ yũ tariro jichũ “Potocã tjira”, nina m̄sa. Ā niina m̄sa jichũ ñũno, yuhũre cahĩina m̄sa jichũ ñũno yũ P̄uc̄ũ sehe m̄sare cahĩna. To ã cahĩchũ tirore m̄sa sininahca. ²⁸ Yũ P̄uc̄ũ cahai jiriro jicũ ahri yahparũre tai yuhũ. Ā jicũ mip̄ure ahri yahparũ jiriro jisinicũ yũ P̄uc̄ũ caharũ wahaihca —nire Jesu.

²⁹ To ã nichũ sã to buheina ō sehe nii:

—Mip̄ũ pinihta quit̄i marieno durucui noano poto yahui nina mũhũ sãre. ³⁰ Mũhũ noano masi pahñoriro mũ jichũ mip̄ũ pinihtare sã masija. Ā jia paina mũhũre buhe masierara.

Tíre mipũre sã noano masija. Sã noano masiina jina, Cohamacu cahapu tariro mu jichu “Potocã tjira”, nija sã —nii sã Jesure.

31 Sã ã nichu Jesu õ sehe ni yũhtire sãre:

—¿Mipũre “Potocã tjira”, nijari musa juna? **32** Baharo curero jipihtina musa wũhũsepũ waha siteina jina, yũhũre cohãnahca musa. Musa ã cohãpachũta yũ Pũcu sehe yũhũ mehne jira. ã jicu yũhũ cũirota jieraja. **33** Ahrire musare yahu mũhtahi, yũhũre musa wacũ tuaa mehne musa noano jihto sehe. Cohamacũre cahmaeraina cahapu musa jichu ñano yoaaahca musare tina. Ti ã yoapachũta wahchega musa. Ahri yahpa macaina ñaa buhiri tiinare, ti pũhtoro watĩno cũhũre yũhdũrucariro jija yũhũ. ã jina yũhũre wacũ tuana wahchega musa —nire Jesu sãre to buheinare.

Jesu to buheina ya cjihtire Cohamacũre sini payoha

17 ¹ ã ni yahu tuhsu Jesu mũanopũ ñũroca mũo, Cohamacũre õ sehe ni durucure:

—Mai, mipũre mu yahu quilhõriro seheta yũhũre ñano ti yoahiti pja mu sũrota nina. Yũhũre mu macũre masare ño payochu yoaga. Mu ã yoachũ mũhũre masare ño payochũ yoaihca yũhũ cũhũ. ² Jipihtina bui pũhtoro yũhũre cũre mũhũ. ã jicu yũhũre mu warinare mũhũ mehne ã jirucuchũ yoaihca yũhũ. Tuhsu, mũhũre masare ño payochũ yoaihca yũhũ. ³ Mũhũ dihta Cohamacu waro jira. Yũhũ Jesucristo mu warocariro jija. ã jia jipihtina mũhũre masiina, yũhũ cũhũre masiina mũanopũ mari mehne ã jirucuahca —nire Jesu.

⁴ ã ninota õ sehe ni namore Cohamacũre:

—Ahri yahpũre mu yoa dutiri cjirire yoa pahũoja yũhũ. ã yoacu mũhũre masare ño payochũ yoaja yũhũ. ⁵ Ahri yahpa to jihto pano mũhũ mehne yũ jichũ jipihtina yũhũre ti ño payo mũhtariro seheta mipũre yũhũre ti ño payochũ yoaga tjoa.

⁶ Ahri yahpai jiinare yũhũre mu warinare mũhũre masichũ yoahi. Mu warina mu yaina jira. ã jicu tinare ware mũhũ yũhũre. ã jia mu dutiare yoare tina. ⁷⁻⁸ Yũhũre mu yahurire tinare buhehi. Yũ ã buhechũ tũhoa yũ buheare cahmare tina. ã jia potocãta mu cahai tariro yũ jichũ masina tina. Tuhsu, mu warocariro yũ jichũ “Potocã tjira”, ni tũhotura tina. ã yoa jipihtia yũ ya mu ya ti jichũ masina tina.

⁹ Ti ya cjihtire mũhũre sini payoi nija. Paina ya cjihti sehere sini payoi nieraja yũhũ. Yũhũre mu warina mu yaina jira. ã

jicü ti ya cjihtire sini payoi nija mûhure. **10** Tina jipihtina mü yaina jira. Æ jia mü yaina sehe yu yaina jira. Yûhure wacü tuaa yu tuariro jiare masichü yoara tina masare.

11 'Mipûre ahri yahparûre tjuasi yûhü. Mü cahapü wawai tai nija. Yu ã wahapachûta mipûre yûhure mü warina ahri yahpare tjuaahca. Mai, mûhü noariro jira. Yûhure mü warinare mü tuaa mehne ñü wihbobasaga. Mü ã ñü wihbochü mari cûirota mari jiro seheta tina cûhü cû curuata jiahca. **12** Tina mehne jicü mü tuaa mehne tinare noano ñü wihbohi. Cûiro pinihta pichacapü waharohca mü yare ti joari tjui to yahuriro seheta.

13 'Mipûre mü cahai wawai tai nija. Æ jicü ahri yahpai ahri jipihtiare yu yainare yahuja yûhü mehne ti noano wahchehto cjihtore. **14** Mü yare yahui tinare. Tina yu yoaro seheta ahri yahpai ji dojahtina jierara. Æ jia ahri yahpa macaina sehe tinare ñü tuhtira. **15** "Ahri yahpai jiinare, yu yainare naaga", nieraja. Æ nierapaihta tinare noano ñü wihboga "Watîno ñaare yoa dutiri", tinare nicü. **16** Ahri yahpa macariro jieraja. Tina cûhü yu yoaro seheta ahri yahpai ji dojahtina jierara. **17** Yu yainare mü buhea mehne noaina wahachü yoaga tinare. Mü yahua sehe potocã tjira. **18** Ahri yahparûre yûhure mü warocariro seheta yûhü sehe yu yaina cûhure mü yare buhe duticü warocahi. **19** Mü cahmaare yoah tiro cjihtore yariahtiro jicü yu pjacure waja. Æ waja yûhü yu yaina cûhü mü cahmaare potocã ti noano yoah ti cjihtire.

20-21 ' "Yu yaina mipûre jiina dihtare yoadohoga", ni sini payoeraja yûhü. Yu yaina painare yu yare ti buheri baharo paina cûhü yûhure wacü tuaahca. Tina cûhure yoadohoga, yu yaina jipihtina cû curuai ti jihto cjihto sehe. Yûhü mûhü mehne mari pûaro jipanahta cûiro tjija. Mari cûirota mari jiro seheta tina cûhü mari mehne cû curuaihta jijaro. Cû curuaita jijaro mü warocariro yu jiare jipihtina masa "Potocã tjira" ti nihto sehe. **22** Yûhure mü masichü yoariro seheta yu yainare yu jia tiare masichü yoai. Tinare yu ã masichü yoachü cûirota mari jiriro seheta tina cûhü cû curuaita jiahca. **23** Yûhü tina mehne jija. Tuhsü, mûhü yûhü mehne jira. Mari ã jiina jichü yu yaina potocãta cû curuaita noano jiahca. Cû curuaita ti jichü ñü mü warocariro yu jiare ahri yahpa macaina masiahca. Tuhsü, yûhure mü cahîriro seheta yu yaina cûhure mü cahîare masiahca masa.

24 'Mai, ahri yahpa to ji dũcahto pano yũhũre cahĩa tire mũhũ. Ā cahĩcũ yũ masi pahñoriro, si siteriro yũ jichũ ñore mũhũ. Ā jicũ yũhũre mũ warina yũhũ mehne ti jichũ cahmaja masi pahñoriro, si siteriro yũ jichũ ti masihtĩ cjihtire. 25 Mai, mũhũ noariro jira. Ahri yahpa macaina ñaina mũhũre masierara. Yũhũ sehe mũhũre masija. Ā jia mũ warocariro yũ jichũ masina yũ yaina. 26 Mũhũre tinare masichũ yoai. Baharopũ cũhũre mũhũre tinare masichũ yoaihtja yũhũre mũ cahĩriro seheta painare ti cahĩhti cjihtire. Ā jicũ yũ yaina mehne jiihca —nire Jesu Cohamacũre.

Jesure peresu yoaha

(Mt 26.47-56; Mr 14.43-50; Lc 22.47-53)

18 1 To ã niri baharo Jesu sã cũhũ to buheina Cedrõ wama tiri mare pahã, olivo wama tia yucũri ti toari wesepũ sui. 2 Payũ tahari tí wesei, tí yucũ docai sã Jesu mehne cahmachua tii. Ā jiro Juda Jesure ñũ tuhtiinare ñohtiro tí wesere masire. 3 Ā masino pũa curua surarare mũ tã tare tí wesepũ Jesure ñono taro. Cũ curua surara waro jire. Pa curua surara Cohamacũ wũhũre cohtaina jire. Tina sacerdotea pũhtoa, fariseo curua macaina ti warocaina jire surara, Cohamacũ wũhũre cohtaina mehne. Ā taa sihãa pocare, sihãa yucũri cũhũre sihã tare. Ti wamoa cũhũre cjuare tina. 4 Tí wesepũ ti wihiri baharo Jesu to ñano wahahtore masino, tinare piti boca, õ sehe ni siniture:

—¿Noare macana nijari mũsa? —nire Jesu.

5 —Jesu Nazare macarirore macaja sã —ni yũhtire tina.

—Tiro tjija yũhũ —nire Jesu.

Juda sehe, Jesure ñaha dutiro ñoriro tina mehne jire.

6 Ā jia “Tiro tjija yũhũ”, Jesu to nichũta tina sehe cũaa waha, yahrapũ du siti mũa bora caha sũre. 7 Ti ã wahachũ ñũno tinare pari turi õ sehe ni siniture Jesu:

—¿Noare macana nijari mũsa? —nire.

—Jesu Nazare macarirore macana nija sã —ni yũhtire tina tjoa.

8 —“Tiro tjija”, ni tuhsũmahicũ yũhũ mũsare. Ā jina yũhũre ñahana, ahrinare yũhũ mehne macainare peresu yoaena tjiga mũsa —nire Jesu.

9 Ñ sãre cahĩno ne cũirore butichũ yoerare. Ñ yoaro tó pano Cohamacũre to niriro seheta yoaro nire tiro. “Yũhũre mũ warinare ne cũirore boerahi”, to niriro seheta yoaro nire Jesu. 10 Ñ yoa Simo Pedro ñosari pjĩne cjuaro, tí pjĩne tuã we naroca, sacerdotea bui pũhtoro cahamacũno Malco wama tiriro cahmonore cjã pahrẽnocare. To poto bũhũsehe macari cahmonore cjã pahrẽnocare. 11 Ñ to cjã pahrẽchũ ñũno Jesu tirore õ sehe nire:

—Mũ ñosari pjĩne wihboga. Yũ Pũcũ yũhũre to ñano yũhdũ dutiriro seheta ñano yũhdũihtja yũhũ —nire Jesu Pedrore.

Sacerdotea bui pũhtoro cahapũ Jesure naaha tina

(Mt 26.57-58; Mr 14.53-54; Lc 22.54)

12 To ã ni tuhsũchũta surara, ti pũhtoro mehne, Cohamacũ wũhũre cohtaina surara cũhũ Jesure ñaha, tirore dũhtere.

13 Dũhte tuhsũ Ana cahapũ naa mũhtare tina. Ana sehe Caifa marechũno jire. Caifa sehe tí cũhmare sacerdotea bui pũhtoro jire. 14 “Judio masa ya cjihtire cũiro masũno yariachũ noana”, niriro cjiro jire Caifa sehe.

“Jesure masieraja”, niha Pedro

(Mt 26.69-70; Mr 14.66-68; Lc 22.55-57)

15 Ñ jina yũhũ Simo Pedro mehne Jesure yoa curerorũ ñũ nũnũ tii. Yũhũ sehe sacerdotea bui pũhtoro to ñũ masiriro jicũ Jesu baharo pũhtoro wũhũi jiri sahrĩnorũ sãa wahaĩ. 16 Yũ ã sãachũ Pedro sehe sahrĩno sopacai tjuarũcũ sũre. Ñ jicũ majare wijaa ta, sopacare cohtaricorore sinitu ñũi “Ahrĩro Pedro sãa ta masijari”, nicũ. Yũ ã sinitu tuhsũchũ ticoro Pedrore sãa ta dutire. To sãa ta dutiri baharo yũhũ Pedrore na sãa wahaĩ. 17 Yũ ã na sãachũ ñũno sopacare cohtaricoro sehe Pedrore õ sehe ni siniture:

—¿Jesu buheina mehne macariro jierajari mũhũ? —nire ticoro Pedrore.

—Jieraja yũhũ —ni yũhtire Pedro sehe.

18 Sã sũhto pano tó macaina cahamaca, surara mehne ti sohmahti pichacare wijã tuhsũri jire. Yũsũa nire. Ñ jia tina tí pichaca dũhtũ cahai ducua, sohmaa nire. Ti ã sohmachũ ñũno, Pedro cũhũ waha, sohmare.

Sacerdotea pũhtoro Jesure sinituha
(Mt 26.59-66; Mr 14.55-64; Lc 22.66-71)

19 Ñ yoa sacerdotea bui pũhtoro Jesu buherire, sãre to buheina cũhũre sinitu ñãri jire Jesure. 20 To ã sinituchũ Jesu sehe õ sehe ni yũhtiri jire tirore:

—Jipihtinare buhecũ ti panoi ducuhi. Ñ buhecũ judio masa mari buhea wũhũsei Cohamacũ wũhũ cũhũre ã buherucuhi. Mũsa ñũenoi buherahi yũhũ. 21 ¿Dohseacũ yũhũre sinitujari mũhũ? Sinitu duacũ yũ buheinare sinitu ñũga. Yũ buherire tina masina —ni yũhtiri jire Jesu.

22 To ã nichũ tũhoro tõi ducuriro surara sehe to wamomaca mehne Jesure cjãri jire.

—Ñ nii tjiga sacerdotea bui pũhtorore —niri jire surara sehe Jesure.

23 To ã nichũta Jesu õ sehe niri jire:

—Ñnano yũ ni durucurire yahuga yũhũre. ¿Potocãta mũsare yũ yahupachũta, dohseacũ yũhũre cjãjari mũhũ? —niri jire Jesu surarare.

24 Baharo Ana Jesure paina ti dũhterirore Caifa sacerdotea bui pũhtoro cahapũ warocari jire.

“Jesure masieraja”, pari turi niha Pedro
(Mt 26.71-75; Mr 14.69-72; Lc 22.58-62)

25 Ñ yoa Simo Pedro pichaca dũhtũ cahai ducuro, sohmano nire. Ñ to sohmarucuchũ ñũa, tó macaina tirore õ sehe ni siniture:

—¿Mũhũ cũhũ Jesu buheina mehne macariro jierajari mũhũ? —nire tina Pedrore.

—Jieraja yũhũ —ni yũhtire Pedro.

26 Tuhsũ, sacerdotea bui pũhtoro cahamacã mehne macariro, Pedro to cahmono cjã pahrẽriro coyeyiro sehe Pedrore õ sehe ni siniture:

—¿Jesure ti ñahari wesei yũ jichũ mũhũ cũhũ tiro mehne jierapahte? —ni siniture tiro Pedrore.

27 —Yũhũ tiro mehne jierahi —nire Pedro. To ã nichũta caraca dure.

Jesure Pilato sinituha

(Mt 27.1-2, 11-14; Mr 15.1-5; Lc 23.1-5)

28 Ñamiwacũnu jichũ Caifa ya wũhũpũ jirina Jesure naa wijaa, tí maca macaina pũhtoro Pilato ya wũhũpũ naa wahare tina. Ñ wahapahta to ya wũhũpũ sãaerare. Pascua dachori jichũ tina tí bose nũmũri macaare chũhtina jia õ sehe nire: “Judio masũno jierara Pilato. To ã jiriro jichũ to ya wũhũre sãana, mari dutiare yũhdũrũcana niboca. Ñ jina mari sãachũ marine bose nũmũri macaa chũare chũ dutierahca”, nire tina. Ñ nia pũhtoro Pilato ya wũhũre sãaerare Jesure naahrina sehe. 29 Ti ã sãa taerachũ ñũno Pilato tina cahapũ, wũhũ sopacapũ sũrũcũ sũro, tinare õ sehe ni siniture:

—¿Yaba buhirire ahrirore yahusã duajari mũsa? —nire Pilato tinare.

30 —Ahriro to noariro jichũ mũhũre sã waeraboa. Ñariro jira tiro —ni yũhtire tina.

31 Ti ã nichũ Pilato õ sehe nire:

—Mũsa sehe tirore naahga. Ñ jina mũsa ya dutia ti niriro seheta tirore buhiri dahrega —nire Pilato tinare.

—Mũsa Roma macaina ya dutia sehe sãre masũnore wajã dutierara —nire tina Pilatore.

32 Ñ nia Jesure judio masa ti wajã duarire masichũ yoaa nire. Jesu sehe crusapũ to yariahtore tó pano to yahuriro seheta ã waharo nire. 33 Ti ã ni durucuri baharo Pilato sehe wũhũpũ majare sãa, Jesure pjirocari jire. Pjiroca tuhsũ, tirore õ sehe ni sinituri jire:

—¿Judio masa ti pũhtoro tjijari mũhũ? —ni sinituri jire Pilato.

34 —¿Mũ mũ sũrota ã sinitui nijari mũhũ yũhũre? ¿O paina sehe yũhũre ti yahusãri baharo tíre sinitu ñũjari mũhũ? —niri jire Jesu Pilatore.

35 —Judio masũno jieraja yũhũ. Mũ ya yahpa macaina, sacerdotea pũhtoa cũhũ mũhũre ware sãre. ¿Yabare ñano yoari mũhũ ti ã buhiri dahre duachũ? —niri jire Pilato.

36 —Ahri yahpa macariro pũhtoro jieraja yũhũ. Ahri yahpa macariro pũhtoro yũ jichũ yũ buheina yũhũre yoadohoboa. Judio masare yũhũre ñaha dutieraboa. Yũ pũhtoro jia ahri yahpa macaa jierara —niri jire Jesu Pilatore.

37 —¿Ñ jicũ pũhtoro jijari mũhũ ã nicũ? —niri jire Pilato.

—Mũ nino seheta pũtoro tjiija. Masa ti pũtoro jihtiro cjihto masa bajuai yũhũ. Ā jicũ ahri yahpapũ tai ti pũtoro jicũ tacũ, potocã jiare yahucũ tacũ. Jipihtina potocã jiare tũho duaina, yũ yahuare tũhora —niri jire Jesu.

38 —¿Yaba baro jijari potocã jia? Potocã jiare masihtu basioerara —niri jire Pilato.

Judio masa Jesure wajã dutiha

(Mt 27.15-31; Mr 15.6-20; Lc 23.13-25)

Ā ni tuhsũ Pilato judio masa cahai majare tjua waha, tinare õ sehe ni yahure:

—Ahriro Jesure yaba buhiri mariahna. **39** Cũhmaripe pascua jichũ cũiro peresui jirirore mũsa wio dutirucura. ¿Ā jicũ ahriro Jesureta mũsa pũtoro cjihto mũsare wiobasabocari yũhũ? —nire Pilato judio masare.

40 To Ā nichũ tũhoa judio masa õ sehe ni saũurucure:

—Tirore wioi tjiiga. Barrabá sehere sãre wiobasaga —ni saũurucure judio masa Pilatore.

Barraba sehe yaca bũcũro jire.

19 ¹ Ti Ā ni saũurucuri baharo Pilato Jesure tjana dutiri jire. To Ā dutichũ to mũa sehe tirore tjanari jire.

² Tjana tuhsũ tina pota soro dahre tuhsũ, Jesu dapu bui duhu payori jire. Duhu payo tuhsũ, pũhtoa ya suhti barore tirore sãa, payũ tahari tiro cahacãi sũrucũ, õ sehe ni bũjũperi jire tina:

³ —Noano tagũ. Judio masa pũtoro noano tagũ —ni bũjũpe, Jesu wũhũdũahi cjã mũjari jire.

⁴ Ā yoa pari turi Pilato judio masa cahapũ waha, tinare õ sehe ni yahure:

—Tũhoga mũsa. Ahrirore ñaa buhiri mariahna. Ā jicũ tíre mũsa masihtu cjihtire mũsa cahai tirore na tai tai nihi —nire tiro.

⁵ To Ā ni tuhsũchũta Jesu pota soro pisariro, pũhtoa ya suhti barore sãariro, wũhũi jiriro wijaa tare. To Ā wijaa tachũ Pilato tinare õ sehe nire:

—Ñũga. Ahriro tjira tiro —nire Pilato.

⁶ To Ā ni tuhsũchũ tũhoa, sacerdotea pũhtoa, Cohamacũ wũhũ cohtaina surara cũhũ Jesure ñũa, saũurucure:

—Crusapũ cjã puha wajãga tirore. Crusapũ cjã puha wajãga tirore —ni saũurucure tina.



—Tirore ne ñaa buhiri mariahna. Ñ jina m̄sa basita tirore naaga. Ñ jina m̄sata tirore crusap̄ c̄j̄ puha waj̄aga —nire Pilato tinare.

7 —Tiro to basi “Cohamac̄ mac̄no jija”, nia tire. Tíre to ã nich̄ s̄a dutia sehe tirore waj̄a dutira —nire tina Pilatore.

8 Ti ã nich̄ t̄horo tó pano to cuiro ȳhdoro cuia wahare Pilato sehe. 9 Ñ jiro pari turi to w̄h̄p̄re majare s̄aa, Jesure ò sehe ni sinituri jire t̄joa:

—¿Noho macariro jijari m̄h̄? —niri jire Pilato Jesure.

To ã ni sinitupach̄ta Jesu tirore ȳhtierari jire.

10 To ã ȳhtierach̄ ñ̄no Pilato tirore ò sehe ni sinitu namori jire:

—¿Ȳh̄re ȳhtierajari m̄h̄? Ȳh̄ m̄h̄re peresui jirirore wio masija. Ñ yoa m̄h̄re crusap̄ c̄j̄ puha waj̄a duti masija ȳh̄. ¿Tíre masierajari m̄h̄? —niri jire Pilato Jesure.

11 —Cohamac̄ m̄h̄re to dutierach̄ ȳh̄re ñ̄ano yoape dutieraboa m̄h̄. Ȳh̄re ñ̄ tuhtiinare ñoriro sehe m̄ ȳhdoro ñ̄ano buhiri tira —niri jire Jesu Pilatore.

12 To ã nich̄ t̄horo Pilato sehe tirore wio duari jimare. To ã wio duapach̄ta pari turi judio masa ò sehe ni sañurucure:

—Jesu “P̄htoro jija” nino, mari jiphtina bui p̄htoro jirirore Roma macarirore ñ̄ tuhtiriro jira tiro. Ñ jic̄ tirore

wiocu m̄h̄u c̄h̄u mari bui p̄htoro jirirore ñu tuhtiriro jiihca —ni sañurucure judio masa Pilatore.

13 Ti ã nichu t̄horo Jesure w̄h̄u jirirore na wijaa ta, buhiri dahre dutiro taro to dujiri pahtai nuju sure Pilato sehe. Tóito buhiri dahre dutiri wapa, t̄aa mehne ti yoari wapa judio masa s̄a ya mehne Gabatá wama tire. 14 Tí dacho pascua dacho bose numu s̄a chuhti cjihtire s̄a cahnori dacho jire. Tí pjare cohari pja waro jire. Nuju su tuhsu Pilato masare õ sehe ni yahure:

—Ahriri tjira musa p̄htoro —nire tiro.

15 To ã nichu t̄hoa judio masa õ sehe ni sañurucure:

—Yariajaro tiro. Yariajaro tiro. Crusapu c̄j̄a puha wajãga tirore —ni sañurucure tina.

—¿Musa p̄htoro to jipachuta tirore crusapu c̄j̄a puha wajã dutijari musa? —nire Pilato.

To ã nichu t̄hoa õ sehe ni yuhtire sacerdotia p̄htoa:

—Mari jipihtina bui p̄htoro Roma macarirota s̄a p̄htoro jira. Pairo p̄htoro s̄are mariahna —ni yuhtire sacerdotia p̄htoa.

16 Ti ã ni durucuri baharo Pilato Jesure crusapu c̄j̄a puha wajã dutiro, tirore ware tinare, tirore wajãhtinare.

Jesure c̄j̄a puha wajãha tina

(Mt 27.32-44; Mr 15.21-32; Lc 23.26-43)

17 Ñ jia tina Jesure naa wijaare. Ti naa wijaachu Jesu sehe to crusare to basi wua naa, dapu cohã wama tiropu sure. Sã judio masa ya mehne dapu cohã Gólgota wama tire. 18 Tóropu sua tina Jesure c̄j̄a puha õre. Tuhsu, paina p̄arore c̄iuro to poto buhusehei, pairo to cõ buhusehei c̄j̄a puha dapore tina. Ñ jiro Jesu ti dacho macai jire. 19 Ti c̄j̄a puha tuhsuchu, Pilato taboa pjine joa, Jesure ti c̄j̄a puha õri crusai c̄j̄a puha õ dutire tí pjine. Ñ sehe ni joare tiro: “Ahriri Jesu Nazare macariro, judio masa bui p̄htoro jira”, ni joare Pilato tí pjine. 20 Tí pjine joaro judio masa ya dusero mehne, Roma macaina ya dusero mehne, griego masa ya dusero mehne joare tiro. Ñ yoa Jesure crusapu ti c̄j̄a puha daporiro maca cahacã jire. Tó cahacã jiina payu judio masa Pilato joarire ñu, buhere. 21 Ñ buhe tuhsu judio masa s̄a sacerdotia p̄htoa õ sehe nire Pilatore:

—“Ahriri judio masa p̄htoro jira”, ni joai tjiga. Sã p̄htoro jierara ahriri. Ñ jicu õ sehe ni joa cahnoga m̄h̄u. “Ahriri




‘Judio masa pũthoro jija’, ni cũirota to basita ã ni tãhoturiro jira”, ni joa cahnoga —nire sacerdotea pũthoa.

22 —Yũ joa mũhtariro seheta jirohca —nire Pilato tinare.

23 Jesure ti cjã puhari baharo pititiaro surara sehe Jesu suhtire ti basi witi. Ti ã witi duapachũta cũ suhtirota yoari suhtiro dohori marieni suhtiro jire. Tĩ suhtiro suhari suhtiro jire. 24 Tĩ suhtiro to ã jichũ õ sehe nire tina ti basi:

—Ahri suhtirore tũhrẽna tjiijhna. Ahri suhtirore nahtiro cjihtore masi duana, docapejihna mari —nire tina ti basi.

Ã docapea, Cohamacũ yare ti joari tjuí ti ni joariro seheta yoaa nire tina. “Yũ suhtire tina ti basi witi. ã jia yũ suhtire nahtiro cjihtore masi duaa, docapere tina”, ni joaa tiha Cohamacũ yare ti joari tjuí. To ã ni joariro seheta ã yoaa nire tina.



25 Surara ti ã yoachũ Jesu pocoro, Jesu mũono, María Cleofa namono, María Magdalena mehne Jesu crusa cahacãi ñũrucure tina. 26 ã jiro to pocoro yũhũ to cahĩro cũhũ to cahacãi sã ducuchũ ñũno to pocorore õ sehe ni yahure Jesu:

—Mĩpũre ahrĩro mũ macũ cjihto jira —nire Jesu to pocorore.

27 ã ni tuhsũ, yũhũre õ sehe ni yahure tiro:

—Mĩpũre ahrĩcoro mũ poco cjihto jira —nire Jesu yũhũre. To ã niri baharo Jesu pocorore yũ ya wũhũpũ ji dutii.

Jesu yariaa wahaha

(Mt 27.45-56; Mr 15.33-41; Lc 23.44-49)

28 To ã ni yahuri baharo õ sehe ni tãhotu masiri jire Jesu: “Jipihtia Cohamacu yũhũre dahra dutiro to cũrĩre yoa pahũohi”, ni tãhotu masiri jire Jesu. ã masino Cohamacu yare ti joari tju to ni yahuriro seheta õ sehe nire Jesu:

—Ñahma yapioca yũhũre —nire Jesu.

29 ã yoa tói vino sũẽa core posa tiri situ dujire. ã jiro tói jiriro wihmi nari sũhtere sũẽa co mehne ti sohari sũhtere yucucu hisopo wama tidu sohtoai dũhte õre. Dũhte õ tuhsu, Jesu dũseroi siõ mũo, siõ õre. 30 Tí core Jesu wihmi tuhsu õ sehe nire:

—Tó puro tũica —ninota to dapure muhrirũca, yoja su, yariaa wahare.

Surara Jesu patipahma batoĩ ñosaha ñosadu mehne

31 Tí dacho pascua bose numu pano jire. Tí bose numu macaare sã chũhti cjihtire sã cahnorĩ numu jire. ã jia pa dacho Sabado jichu tí bose numu jichu crusaripu ti wajãrinare cũ duaerare judio masa. Tí dacho Cohamacure ti ño payori dacho bose numu jire. ã jia tí dachoi ti cã puharina cjirire crusapu ti jichu cahmaerare tina. ã jia ti cã puharina cjirire ti ñũchũa cohãrine cã nuha dutia taa judio masa siniha Pilatore, ti yaria mũrocahto cjihto sehe. Ti ã yoari baharo ti pjacuri cjirire na boro bahrañoa taa nire. 32 Ti ã dutichu surara sehe crusari cahapu su, cũiro yacariro cjiro ñũchũa cohãrine cã nuhare. Pairo cũhũre ãta yoare tina. 33 ã jia Jesu ñũchũa cohãrine cã nuha tamaa, to yariariro jichu ñũa, cã nuhaerare.

34 ã cã nuhaeraa cũiro surara to patipahma batoĩ ñosadu mehne ñosare. To ã ñosachu dõihta to di, co mehne wijaare. 35 To ã wahachu ñũi yũhũ. Yũhũ ahri tjure joariro mũsare potocã yahuja. Potocã yũ yahua jichu masija yũhũ. Mũsare yahuja mũsa cũhũ Jesure mũsa wacũ tuahto sehe. 36 Cohamacu yare ti joari tju to niriro seheta ã wahare: “To cohãrine ne cũ cohãre cã nuhaerare”, to ni joariro seheta Jesu ñũchũa cohãrine ne cũ cohãre cã nuhaerare. 37 ã yoa pa tju Cohamacu yare ti joari tju õ sehe nina: “Tĩrore ti ñosariro cjirore ñũahca tina”, ni joaa tiha Cohamacu yare ti joari tju.

Jesu pjacure masa sorapu cūha
(Mt 27.57-61; Mr 15.42-47; Lc 23.50-56)

38 To yariari baharo José Arimatea macariro Jesu pjacu cjirore na bororo taro, Pilatore siniri jire. José sehe paina judio masare cuiro, Jesure wacū tuariro to jiare yahu duaerari jire. To pjacu cjirore to siniri baharo Pilato sehe to pjacure naa dutiri jire. To ã na dutichu José crusa cahai su, Jesu pjacu cjirore naa wahari jire. 39 Nicodemo cūhu me sitiare yucucu di pohca, mirra wama tia me sitia yucucu pohca mehne dahra



moreare na tari jire. Jesu pjacu cjirore masa copapu ti siõ sãahto pano ti cahnohti jiri jire tí me sitia. Ti na tari cjirore treinta kilo nucuri jire. Nicodemo sohõ jiri pja Jesu mehne to coã durucuri pja ñamipuc Jesu cahai sũriro jiri jire. ⁴⁰ ã jia tina pũaro Jesu pjacu cjirore naa, judio masa sã yariainare sã yoarucuriro seheta to pjacu cjirore me sitia mehne suhtiro cahsaro mehne wahmari jire. ⁴¹ Crusapuc Jesure ti wajãno cahai wese jire. Tí wesepuc masa copa tãcapuc wahma ti sahari copa jire. Tí copai ne yariariro cjirore siõ sãaerasinire. ⁴² Pascua dacho bose nucuri judio masa sã bose nucuri sã chũhti cjihtire sã cahnoriro dacho jire. To ã jiri dacho jichuc tí copa cahacã to crusa jichuc, tói siõ sãari jire tina Jesu pjacu cjirore.

Jesu masa wijaaha

(Mt 28.1-10; Mr 16.1-8; Lc 24.1-12)

20 ¹ Domingo ñami curero jichuc, bohreahto panocã María Magdalena Jesu masa copapu sũri jire. Tõrucu sũro tí copare ti tju bihari tãcare ti pjõo cũria tãcare ñucuri jire ticoro. ² ã ñucurico jiro sã cahapuc mũrocaa tare ticoro. Simo Pedro mehne yũhuc sã pũaro jii. Wihi, õ sehe ni yahure sãre ticoro:

—Mari pũhtoro pjacu cjirore naanocari jihre. ã jina tiro cjirore ti cũrire mari masieraja —nire ticoro sãre.

³ To ã nichuc tũhona, Pedro mehne masa copapu ñũna wahaĩ sã. ⁴ ã ñũna wahana sã pũaro mũroca wahcãĩ. ã mũrocana, yũhuc Pedrore mũroca yũhduc wahcãcuc masa copapu sũ mũhtai. ⁵ Tõrucu sũcuc muhri caha ñũroca sõi tí copapuc. Muhri caha ñũroca sõcuc tirore ti wahmari suhtiro cjiro dihtare ñucuri. ã jii tí copare sãaerahi. ⁶ Yũ ã ñucuri baharopuc Simo Pedro yũ baharo wihire. Wihi, masa copapu sãa, to pjacu cjirore ti wahmari suhtiro cjirore ñucuri tiro. ⁷ Jesu dapure ti wahmari cahsaro cũhuc ñucuri tjoa. Tí cahsaro soro coãno to turẽri cahsaro jire. ⁸ ã jicuc yũhuc cũhuc masa copapu sũ mũhtariro tí copapu sãai. Jesure to ã mariachuc ñucuc “Potocãta Jesu masa wijaari jira”, ni tũhotui yũhuc. ⁹ Tí copapu sã wahahto pano Cohamacuc yare ti joari tjui Cristo to yariahtore yahurire, to masa wijaahore yahuri cũhuc sã noano tũho ñahaerasinimai. Tí copare yũ ñucuri baharo, “Potocãta Jesu masa wijaari jira”, ni tũhotui yũhuc. ¹⁰ ã ñuc tuhsũna sã wũhũsepuc tjuua wahaĩ.

Jesu María Magdalenare bajuaha

(Mr 16.9-11)

11 Ñ yoa masa copapũ María majare tjua ta tí copa sopacapũ wihi, ducuro, tiiro niri jire. Ñ tiiparota ticoro muhi caha ñũroca sōri jire masa copapũre. 12 Ñ ñũroca sōno pũaro anjoare, yehsea suhti tiinare Jesu cjiro to coãriro cjiropũ ti dujichũ ñũri jire ticoro. Cãiro to dapu coãriro cjiroi dujiri jire. Pairo to dahpori coãriro cjiroi dujiri jire. 13 Tinare to ñũchũ tina sehe ticorore ò sehe ni sinituri jire:

—Numino, ¿dohse jiro baro tiico nijari mũhũ? —niri jire tina.

—Yũ pũhtoro pjacũ cjirore naanocari jihre. Ñ jico to pjacũ cjirore ti cũrire masieraja yũhũ —niri jire ticoro.

14 Ñ ni tuhsũ, majarerũcũ sũmahno Jesure tói ducurirore ñũri jire ticoro. Ñ ñũparota Jesure ñũ masierari jire ticoro.

15 —Numino, ¿dohse jiro baro tiico nijari mũhũ? ¿Noare macaco nijari? —niri jire Jesu ticorore.

“Ahriri ahri wesere ñũ wihboriro jira”, ni tũhotumari jire ticoro Jesure. Ñ ni tũhoturo, ò sehe niri jire ticoro:

—Mũhũta to pjacũ cjirore naariro jicũ to pjacũre mũ cũrirore yahuga yũhũre. Mũ yahuri baharo to pjacũ cjirore naaco wahacohtja —niri jire ticoro tirore.

16 To ã niri baharo Jesu ò sehe niri jire:

—María —niri jire.

To ã ni pisuchũ tũhoro majare ñũroca, ticoro hebreo ya mehne sã judio masa ya mehne ò sehe niri jire:

—Raboni —niri jire ticoro Jesure. (Raboni nino “Buheriro”, nino nina.)

17 —Yũ Pũcũ cahapũ mũjaerasinija yũhũ. Yũ ã mũjaerasinichũ yũhũre ñahaeco tjiga. Tuhsũ, paina yũ yaina cahapũ wahaga. Ti cahapũ sũco ò sehe ni yahuga tinare: “Yũ Pũcũ cahapũ wahai tai nija. Mũsa Pũcũ cũhũ jira tiro. Yũ yairo Cohamacũ cahapũ wahai tai nija. Mũsa yairo Cohamacũ cũhũ jira tiro’, nihre Jesu”, ni yahuga tinare —niri jire Jesu Mariãre.

18 To ã niri baharo María Magdalena sã Jesu buheina cahapũ wihi, yahure sãre:

—Mari pũhtorore ñũhi yũhũ —ni, Jesu ticorore to yahu dutirire yahure sãre ticoro.



Jesu to buheinare bajuaha

(Mt 28.16-20; Mr 16.14-18; Lc 24.36-49)

19 Tí dacho domingoi ñamichahai sã Jesu buheina sã coyea judio masare cuina, wãhɛɾɛ biha sãa, dujii sã. Sã ã dujichu Jesu sã watoi bajuarɛɛɛ sũro, sãre õ sehe nire:

—¿Jimajari mɛsa? Noano jiga mɛsa —nire.

20 ã ni tuhsɛ, to wamomacarine, to patipahma bato cũhɛre sãre ñore. ã jina sã tirore sã pũtorore ñna, wahchei. 21 Pari turi Jesu sãre õ sehe nire:

—Noano jiga m̄sa. Ȳu P̄sc̄u ȳuh̄ure to warocariro seheta, m̄sa c̄uh̄ure ȳu ya buheare buhehtinare warocaja —nire Jesu s̄are.

22 ã ni tuhs̄u tiro s̄are puti s̄are. ã puti s̄ano Esp̄ritu Santo s̄are to s̄ar̄ac̄u s̄u m̄a wahahtore ñono nire s̄are. Ño tuhs̄u ò sehe nire:

—M̄ip̄u Esp̄ritu Santore ñahaga m̄sa, m̄sa mehne jihtirore.

23 Paina ti ñaa yoarire m̄sa boch̄u, ãta jahca. ã jia paina ti ñaa yoarire m̄sa boerach̄u tí bori jisi —nire Jesu s̄are to buheinare.

Jesure masa wijaarirore Toma ñ̄ha

24 Jesu s̄a watoi to bajuach̄u Toma s̄uh̄d̄ariro ti ni pisuriro s̄a mehne mariahare.

25 To ã mariach̄u s̄a mehne macaina tirore yahumare:

—Mari p̄htoro s̄a ñ̄hi —ni yahumai s̄a Tomare.

S̄a ã ni yahupach̄uta ò sehe nire Toma:

—To wamomacarine ti c̄j̄a puhaa coparire ñ̄erac̄u tí coparire ȳu wamo pica mehne be ñ̄erac̄u, “Potoc̄ãta masa wijaari jira”, nisi ȳuh̄u. ã yoa to patipahma batoi jiri copare ȳu wamomaca mehne siõ s̄erac̄u, “Potoc̄ãta masa wijaari jira”, nisi ȳuh̄u tirore —nire Toma.

26 Ocho dachori baharo pari turi s̄a to buheina s̄a w̄uh̄up̄u jii. Tí pjare Toma s̄a mehne jire j̄una. Tí w̄uh̄u bihari w̄uh̄u jire. Bihari w̄uh̄u to jipach̄uta Jesu w̄uh̄up̄u s̄a taro, s̄a watoi bajuar̄ac̄u s̄uro ò sehe nire:

—¿Jimajari m̄sa? Noano jiga —nire.

27 ã ni tuhs̄u, tiro Tomare ò sehe ni yahure:

—Ñ̄uga ȳu wamomacarine. ã yoa m̄u wamo pica mehne ȳu wamomacarine ti c̄j̄a puhaa coparire be ñ̄uga. Tuhs̄u, m̄u wamomaca mehne ȳu patipahma batoi jiri copare siõ s̄õ ñ̄uga. “Potoc̄ã jierara”, nii tjiga. “Potoc̄ã tjira”, niga m̄uh̄u, —nire Jesu Tomare.

28 To ã niri baharo Toma ò sehe ni ȳuh̄tire:

—M̄uh̄u ȳu p̄htoro jira. M̄uh̄u ȳu yairo Cohamac̄u jira —nire Toma Jesure j̄una.

29 —Ȳuh̄ure m̄u ñ̄uri baharo ȳuh̄ure wac̄i tuara m̄uh̄u. Paina sehe ȳuh̄ure ñ̄erapahta ȳuh̄ure wac̄i tuaahca. ã jia tina m̄u ȳuh̄doro wahcheahca —nire Jesu Tomare.

Jesure masa ti masihti cjihtire ahri tjure joaha João

30 Ñ yoa payu paye cūhure Cohamacu to tuaa mehne yoa ñore Jesu sã mehne jiro. Tíre to yoare ahri tjuí joa pahñoerati yuhũ. **31** Ñ joa pahñoerapaita ahri tjuí yu yahuare joahi “Jesuta Cristo Cohamacu to warocariro jira. Tiro potocãta Cohamacu macũno jira”, m̄sa ni masihti cjihtire. Ñ jina m̄sa tirore wacũ tuaina Cohamacu mehne m̄sa ã jirucuhti cjihtire joahi ahri tjure.

Jesu siete to buheinare bajuaha

21 **1** Baharo Tiberia wama tiri b̄sc̄pariro dũhtu cahai sãre to buheinare Jesu pari turi bajuare tjoa. Sãre bajuaro õ sehe yoare tiro tjoa. **2** Simo Pedro, Toma sũhdũariro ti niriro, Natanae Galilea yahpai jiri maca Caná wama tiri maca macariro, Zebedeo pohna sã p̄aro, paina p̄aro buheina sã õpeinata cahmachui.

3 Sã ã cahmachuri baharo Simo Pedro sãre õ sehe nire:

—Wahi wajãí wahi nija —nire tiro.

—Sã cūhu m̄hu mehne wahanajtja —nii sã tirore.

Ñ ni tuhsu buhaa wahai. Ñ jina dohoria mehne wahai.

Wiho mejeta tí ñamine sã noano maca bohrepanahta ne cūiro wahi wajãerahi. **4** Bohrea parĩ cahachu Jesu padũroi to ducuchũ tirore ñũmai sã. Ñ ñũpanahta tirore “Jesu jira”, ni ñũ masierahi sã. **5** Ñ jiro sãre tiro õ sehe ni siniture:

—¿Ne, wahi wajãri m̄sa? —nire Jesu.

—Ne wajãeraputiati sã —ni yũhtii sã.

6 —Dohoria poto b̄h̄usehe sehe doca ñoga. Tie sehe doca ñona wahi wajãnahca m̄sa —nire sãre.

To ã nichu tũhona sã to niriroihta doca ñoi. Sã doca ño tuhsuchũ payu wahi sãare. Payu wahi sãachũ wañũnore dohoriapũ waja sãana bihoerahi sã. **7** Ñ jicu yuhũ Jesu cahĩriro Pedre õ sehe ni yahui:

—Mari pũhtorota jira siro padũroi ducuriro —nii Pedre.

Yu ã nichu tũhoro Jesuta to jichũ masino, Simo Pedro to suhtirore sãare. Wahi wajãno taro to suhtirore tjuweriro jisinare. To suhtirore sãa tuhsu, diapũ pjuroca ñojare. **8** Sã paina buheina dohoriai jina, cien metro yoaro diapũre pahsai sã. Ñ jina wañũnore wahi payu sãadũre dohoria mehne waja nũjai sã. **9** Dũhtu cahai wahã sũna pichaca niti dihta si coãri

pichaca bui Jesu to pũhõ cūrirore wahire ñwi sã. Pão cūhure ñwi sã.

10 Sã ã ñũchũ ñũno Jesu sãre õ sehe nire:

—Michapucacã mũsa wajãrinare mahainacã na tahga
—nire sãre.

11 To ã nichũ Simo Pedro sehe Jesu mehne jiro dohoriarũ samu, wañũnore, bujũina wahi ciento cincuenta y tres wahi sãadure waja majare. Payũ wahi sãapahta wañũnore tũhrẽrare.

12 —Chũsinina taga —nire Jesu sãre.

“¿Noa baro jijari mũhũ?” ni sinitu ñũerahi sã tirore. Sã pũhtoro to jichũ masii sã. 13 ã yoa Jesu pichaca caharũ sũro, pãore na, sãre witire. Wahi cūhure witire.

14 ã jiro Jesu to masa wijaari baharo padũroi bajuaro tia taha sãre to buheinare bajuaro nire.

Jesu Simo Pedro mehne sũhũduha

15 Sã chũri baharo Jesu Simo Pedore õ sehe ni siniture:

—Simo Jona macũno, ¿ahrinare mũ cahĩro yũdoro yũhure cahĩjari mũhũ? —nire Simo Pedore.

—Pũhtoro, mũhure cahĩja yũhũ. Mũhure yũ cahĩchũ masina mũhũ —ni yũhtire Simo Pedro.

—ã jicũ ovejacãre ti nuriro seheta yũ yainare buhega mũhũ —nire Jesu.

16 ã ni tuhsũ pari turi tiro Simo Pedore õ sehe ni siniture:

—Simo Jona macũno, ¿yũhure cahĩjari mũhũ? —nire Jesu.

—Pũhtoro, mũhure cahĩja yũhũ. Mũhure yũ cahĩchũ masina mũhũ —ni yũhtire Simo Pedro.

—Ovejare ñũ wihboriro ovejare to noano ñũ wihboriro seheta, yũ yainare noano buhe ñũ wihboga —nire Jesu Pedore.

17 ã ni tuhsũ pari turi tiro Simo Pedore õ sehe ni siniture:

—Simo Jona macũno, ¿potocãta yũhure cahĩjari mũhũ?
—nire Jesu tjoa.

Tia taha ã ni to sinituchũ tũhoro Simo Pedro tuaro cahyare.

—Pũhtoro, mũhũ masi pahũona. Mũhure yũ cahĩchũ masina mũhũ —ni yũhtire Simo Pedro.

—Ovejare ti nuriro seheta yũ yainare buhega mũhũ.

18 Potocã mũhure niita nija. Mũhũ wahmũno jicũ mũ suhtire sãa, mũ cahmariorũ tinia tiri jire mũhũ. ã jiricũ mũ jipachũta baharo mũ bũcũro jichũ, mũ wamomacarine mũ siõrocachũ

pauro m̄hure suhtire s̄anohca. Tuhs̄u, m̄u waha duaerarop̄u m̄hure naanohca —nire Jesu Simo Pedrore.

19 ã nino Simo Pedrore dohse waha to yariahtore yahuro nire. ã jiro Simo Pedro yariaro Cohamac̄ure “Noariro, masi pah̄ñoriro jira”, masa ti nich̄u to yoah̄tore yahuro nire Jesu. ã Pedro mehne s̄uh̄du tuhs̄uro ò sehe ni namore Jesu tirore:

—Quih̄õno ȳu buheriro seheta yoaga m̄h̄u —nire Jesu Pedrore.

Jesu to cah̄iro buheriro ahri tjure joariro jira

20 To ã nich̄ata Pedro sehe majare ñ̄uroca, ȳh̄ure Joãore Jesu to cah̄iro buherirore tinare ȳu n̄n̄u tich̄u ñ̄no Pedro Jesure siniture. Ȳh̄u sehe to ñ̄riro tó pano ò sehe niriro jii: “P̄h̄toro, ¿m̄h̄ure ñ̄u tuhtiinare ñ̄ohtiro sehe diro baro jicari tiro?” ni, Jesure sinitu ñ̄riro jii ȳh̄u. Tí pjare Jesu to pari wah̄pa ch̄u dujii ȳh̄u sehe. 21 ã jiro ȳh̄ure ñ̄no Pedro Jesure ò sehe ni siniture:

—P̄h̄toro, ¿ah̄riro sehe dohse waharoh̄cari? —ni siniture.

22 —Tíre m̄h̄ure yahueraja. Ahri yahpap̄u ȳu tjua tahto pano ah̄rirore jirucuch̄u ȳu yoach̄u tíre masierara m̄h̄u. ã jic̄u m̄h̄ure yahueraja. Quih̄õno ȳu buheriro seheta yoaga m̄h̄u —nire Jesu Pedrore.

23 Tíre to yahurire jipihtina Jesu yaina ti basi yahu sitemare. Tíre yahu sitea ò sehe nimare tina sehe: “Jesu to cah̄iro buheriro yariasi”, ni yahu sitemare ȳh̄ure Jesu yaina ti basi. Ti ã nipach̄ata “Tiro yariasi”, nino nierari jimare Jesu. “Ahri yahpap̄u ȳu tjua tahto pano ah̄rirore jirucuch̄u ȳu yoach̄u tíre masierara m̄h̄u. ã jic̄u m̄h̄ure yahueraja”, nire Jesu Pedrore.

24 Jesu buheriro ah̄rire yahuriro, ahri tjure joariro jira ȳh̄u. ã jina ahri ȳu yahua quih̄õno jich̄u masija mari.

25 Paȳu paye c̄uh̄ure Jesu yoare. To yoarire mari joa pah̄ñoch̄u tí tjuri joaa tjuri paȳbia wahaboa. ã jia tí tjurire mari wihiboch̄u m̄u s̄eraboa ahri yahpa. Wahpaa ȳh̄d̄ua wahaboa, ȳu t̄hotuch̄u. Tó puro tjira.